

臺灣商務印書館印行



詳註周美成詞片玉集  
王樵  
周士  
詞歌

蘋洲漁笛譜  
遺山先生新樂府











宛委別藏

詳註周美成詞片玉集



臺灣商務印書館發行



書中首葉印章集印於此

序

辭不輕措辭之工也閱辭必詳其所措工於  
閱者也措之非輕而閱之非詳工於閱而不  
工於措胥失矣亦奚胥望焉是知雌霓之誦  
方脫諸口而見謂知音白題八滑之事既陳  
而當世之疑已釋格矣萍實苟非推其所從  
則是物也棄物耳誰歟能知觸物而不明其  
原覩事而莫徵所自與冥行何別故曰無張  
華之博則孰知五色之珍乏雷煥之識則孰  
辨衝斗之靈况措辭之工豈不有待於閱者



之箋釋耶周美成以旁搜遠紹之才寄情長  
短句縝密典麗流風可仰其徵辭引類推古  
誇今或借字用意言言俱有來歷真足冠冕  
詞林歡筵歌席率知崇愛知其故實者幾何  
人斯殆猶屬目於霧中花雲中月雖意其美  
而皎然識其所以美則未也漳江陳少章家  
世以學問文章爲廬陵望族涵泳經籍之暇  
閱其詞病舊註之簡略遂詳而疏之俾歌之  
者究其事達其意則美成之美益彰猶獲崑  
山之片珍瑒其質而彰其文豈不快夫人之

心目也因命之曰片玉集云少章名元龍時  
嘉定辛未杪臘廬陵劉肅必欽序



月三

三





詳註周美成詞片玉集目錄

廬陵陳元龍少章集註

建安蔡慶之宗甫校正

卷之一

春景

瑞龍吟 越調

瑣窓寒 越調

風流子 大石

渡江雲 大石

應天長 商調

荔枝香 二首 大石

還京樂 大石

掃地花 雙調

卷之二

春景

解連環 商調

玲瓏四犯 大石

丹鳳吟 越調

滿江紅 仙呂

瑞鶴仙 高平

西平樂

小石

浪淘沙

歌拍

憶舊遊

越調

卷之三

春景

驀山溪

大石

少年遊

二首

秋蕊香

雙調

漁家傲

二首

般涉

南鄉子

商調



望江南

大石

浣沙溪

三首

黃鍾

迎春樂

二首

雙調

點絳脣

仙呂

一落索

二首

雙調

垂絲釣

商調

卷之四

夏景

滿庭芳

中呂

隔浦蓮

大石

法曲獻仙音 大石

過秦樓 大石

側犯 大石

塞翁吟 大石

蘇幕遮 般涉

浣沙溪 四首 黃鍾

點絳脣 仙呂

訴衷情 商調

卷之五

秋景

風流子

大石

華胥引

黃鍾

宴清都

中呂

四園竹

小石

齊天樂

正宮

木蘭花

仙呂

霜葉飛

大石

蕙蘭芳

歇指

塞垣春

大石

丁香結

商調



卷之六

秋景

氏州第一 商調

解蹀躞 商調

少年遊 商調

慶春宮 越調

醉桃源 二首 大石

點絳脣 仙呂

夜遊宮 二首 般涉

訴衷情 商調

傷情怨 林鍾

冬景

紅林擒近 二首 雙調

滿路花 仙呂

卷之七

單題

解語花 元宵 仙呂

六么令 重九 仙呂

側犯 新月 雙調

大酺 春雨 越調

玉燭新

梅花

大石

花犯

梅花

小石

醜奴兒

梅花

大石

水龍吟

梨花

越調

六醜

落花

中呂

虞美人

二首

正宮

卷之八

單題

蘭陵王

柳

越調

蝶戀花

柳

商調

西河

金陵

小石

三部樂

梅雪

大石

菩薩蠻

梅雪

正平

品令

梅花

商調

玉樓春

惆悵

仙呂

黃鸝遶碧樹

春情

雙調

卷之九

雜賦

綺寮怨

思情

中呂

拜星月

秋思

中呂

尉遲盃

離恨

雙調

遶佛閣

旅情

雙調

一寸金

江落

小石

蝶戀花

秋思

商調

如夢令

二首

小石

月中行

怨恨

商調

浣沙溪

三首

黃鍾

點絳脣

傷感

仙呂

少年遊

樓月

商調

望江南

詠伎

大石



卷之十

雜賦

意難忘

美詠

中呂

迎春樂

攜

雙調

定風波

美情

商調

紅羅襖

秋悲

大石

玉樓春

四首

大石

夜飛鵲

別情

道宮

早梅芳

留戀  
正宮

二首

鳳來朝

佳人

越調

玉團兒

美意

雙調

感皇恩

標韻

大石

虞美人

三首

正宮

詳註周美成詞片玉集目錄



詳註周美成詞片玉集卷之一

廬陵陳 元龍少章集註

建安蔡 慶之宗甫校正

春景

瑞龍吟 大石

章臺路

史記其揮犀云盧藏用夜聞龍吟也  
張敞走馬章臺街下即路也  
秦昭王作臺於咸陽漢書

還是

褪粉梅梢試花桃樹惜惜坊陌人家定巢燕

子歸來舊處

柳惲詩頻來燕語定新巢杜鰲凝竚

黯凝竚

因念箇人癡小乍窺門戶

蘇子美常云癡小失所記倚柱惜惜

何枝結是日粧吟	因陵秋	郎何唯州文宮情更	有
深了讓讓春綰賤	為感娘	今處免承約人面	侵晨
望髮山山陰賦	之其聲	獨前葵召黃能	淺
之靚為曰讓筆	賦窮如	來度燕過元效	約
願粧贈此山嘗猶	詩且故	劉麥都觀	宮
與抱叔吾詠已燕臺句	於杜牧	鄰尋里	黃障
郎俱扇詩年叔臺	景陵杜	同	風
余下明叔耳柳	後秋娘	時	映
因風障余策枝乃	賜詩序	歌	袖
諾之一袖指出其	故鄉秋	舞	盈
後不指日其巷柳	于娘有	惟	盈
果曰若若柳	過金寵	有	笑
留若若柳		舊	語
但叔柳		家	賀李

臺張望耳有詩長吟遠下燕知誰伴名園露飲

東城閑步杜詩名園依綠沈水筆談石曼卿露

時張好又以善歌入籍一作籍以一年鎮宣城復置好

往東城之縱事與孤鴻去多杜事牧逐詩恨如春草探

春盡是傷離緒官柳低金縷新杜溫庭筠柳着似行

金垂楊惜歸騎晚纖纖池塘飛雨斷腸院落一

簾風絮張景陽飛雨月柳絮朝蘭晏元獻梨花

瑣窗寒越調

文選鮑昭詩

暗柳啼鴉杜甫沙上草間柳新單衣竚立小

簾朱戶桐花半畝靜鎖一庭愁雨洒空堦更

闌未休杜甫昨屬愁春雨漁隱詩話嘉祐中

滴空堦晚無心換銀床香井故人剪燭西窓語

溫庭筠詩西窓客似楚江暝宿風燈零亂

詩我行春燈亂江鳴夜滴華棟杜少年羈旅左

敢辱高位置

遲暮嬉遊處杜甫云自正店舍無煙禁城百

五元稹詩初過寒食一百旗亭喚酒付與高

陽儔侶李賀旗亭下馬解五重注賀宜陽一

旗於上西漢酈食其謁高祖曰吾高陽酒徒



非儒也沛

想東園桃李自春小唇秀靨今在

否到歸時定有殘英待客携尊俎

李賀穠眉又

晚奩粧秀靨

風流子 大石

劉良注文選曰風言其風美之聲  
流於天下子者男子之通稱也

新綠小池塘  
新梁鮑泉春詩  
風簾動碎影舞斜

陽  
謝元暉風  
雙燕  
美金屋去來舊時巢燕  
詩委羽燕

金屋又誰爭劉禹錫  
土花繚繞前度莓牆  
賀李

三十王謝堂前燕  
建繡閣鳳幃深處幾許

詩水中荷葉土花中花  
聽得理絲簧欲說又休慮乖芳信未歌先咽

愁近清觴

杜甫清觴異味情憂極

遙知新粧了開朱戶應自待月西廂

陸瑜新粧年歌

幾纔三五隱隱羞藏臨洞戶麗情集鶯鶯與張生詩侍月西廂下迎風戶半開拂墻花樹

動疑是最苦夢魂今宵不到伊行問甚時說

與佳音密耗寄將秦鏡偷換韓香韓香出晉

悅韓壽美姿遂通焉竊奇香以與壽壽樂府云盤龍明鏡餉秦嘉辟惡生香寄韓壽美成

決用非此始對皇事天便教人霎時廝見何妨

渡江雲小石

杜甫詩江入度山雲

晴嵐低楚甸

揮犀宋迪瀟湘八景有山市晴嵐謝元暉鳳翔陵楚甸

暖

回鴈翼陣勢起平沙宋迪蕭湘八景驟驚春

在眼借問何時委曲到山家杜甫庭春風入詩可

憐妾曲塗香暈色盛粉飾爭作妍華千萬絲

陌頭楊柳漸漸可藏鴉李白孟郊楊柳織別愁

千條萬條絲廣樂

堪嗟清江東注盡舸西流杜甫清江轉江湖急

大舟謂之舸陳后山指長安日下王勃序指

下愁宴闌風翻旗尾潮濺烏紗杜甫長安於日

范鳥今宵正對初弦月杜甫詩雲傍水驛深

艤蒹葭杜甫微冥沉恨處時時自剔燈花吳融

剪刀賦鶯春向曉  
畫眉而頻剔燈花

應天長 商調

老子天長地久樂天  
詩天子長地久無終畢

條風布暖夏易緯云立至霏霧弄晴池塘遍滿春

色賦皮日休桃花正是夜堂無月沉沉暗寒食

寒見注梁間燕前社客歐陽柳燕詩長到春

來為誰似笑我閉門愁寂亂花過隔院芸香滿

地狼籍魚豢典畧曰芸香辟蠹魚

長記那回時邂逅相逢郊外駐油壁毛詩遇

溫飛卿油壁又見漢宮傳燭飛煙五侯宅韓翃

車輕金憤肥

詩日暮春城無處不飛花寒食東風御柳斜青青

草迷路陌青古樂府青煙散入五侯家尋前跡市橋

遠柳下人家猶自相識杜橋官柳詩細市

荔枝香歌指

唐禮樂志帝幸驪山楊貴妃生日命小部張樂長生殿因奏新曲未

曰有名會南楊方進荔枝亦云

照水殘紅零亂風喚去雲花南照盡日測測

輕寒簾低吹香霧韓偓詩小梅輕雪李賀詩紅

帳底吹笙黃昏客枕無慘細響當窓雨淮南

薄霧濃泉看兩兩相倚燕新乳燕新乳

是謂黃昏

樓下水漸綠  
遍行舟浦  
時李白云  
當暮往朝來

心逐片帆輕  
舉在杜柳  
岸片帆何  
日迎門小  
檻朱

籠報鸚鵡  
麗情集  
小玉歌  
西北  
檻前來  
共剪西

窓蜜炬  
李賀詩  
蜜燭

第二

夜來寒侵酒席  
露微泣  
文選謝靈運  
溪行鳥

履初會香澤  
方薰  
史記淳于髡  
曰白狼籍  
羅襦

同襟解  
重底曰  
鳥單澤  
底。鄉與  
香無端  
暗雨催  
人但

恹簾捲燈偏  
雨樂天  
滿瀟暗  
回顧始  
覺驚鴻去

雲遠  
洛神賦  
鵲

大都世間最苦惟聚散杜甫云人生在世到  
得春殘者即是開離宴細思別後柳眼花鬚  
更誰剪此懷何處消遣李商隱花鬚柳眼各有  
情

還京樂 大石調

唐禮樂志明皇自潞州入平內難  
半夜斬長樂門闕兵入宮剪逆  
後撰半夜樂此

禁煙近觸處浮香秀色相料理林通暗香  
若煬帝秀色正泥花時候奈何客裏光陰虛費

望箭波無際迎風漾日黃雲委慎子云河  
初下龍門其

流如竹箭淮南子云任去遠中有萬點相思

清淚李賀憶君清淚如鈎水杜甫

到長淮底過當時樓下慙慙爲說春來羈旅

况味李白當時樓下堪嗟誤約卒期向天涯

自看桃李李詩話有詩看他桃李想而今應恨墨

盈牋愁粧照水怎得青鸞翼飛歸教見憔悴

畫決錄注鳳下有五色青多爲鸞唐朱

掃地花雙手調假青鸞翼

舒亶詩呼童且掃花邊

曉陰翳日曹子建微正霧靄煙橫遠迷平楚



度	路	春	知	却	曰	曾	河	度	遶	聲	奔	腰	以	謝
日	淚	事	紅	成	一	聞	似	霄	回	皆	州	欲	眺	元
基	珠	能	葉	鸞	聯	葉	馬	聞	堤	有	注	舞	平	暉
度	濺	幾	是	鳳	佳	上	蹀	信	駐	曲	日	如	李	楚
日	俎	許	良	友	句	題	紅	流	馬	度	奔	絲	賀	正
將	俎	幾	媒	方	題	紅	流	去	河	樂	州	千	暗	奮
病	杜	許	愈	和	時	春	餘	一	橋	天	山	萬	然	一
傷	甫	聖	德	詩	感	淚	落	葉	避	詩	有	縷	着	暗
幽	詩	德	詩	感	時	花	入	上	雨	柳	五	文	柳	黃
素	感	詩	淚	時	花	落	入	題	津	似	色	選	宮	萬
學	李	時	淚	時	花	落	入	詩	樂	舞	鳥	曲	漏	縷
楚	賀	花	落	時	花	落	入	寄	府	腰	名	水	遲	聽
吟	傷	入	尊	入	尊	入	尊	與	洛	建	池	日	詩	鳴
病	心	入	尊	入	尊	入	尊	與	陽	橋	以	鳴	召	禽
骨	行	入	尊	入	尊	入	尊	與	道	於	鏡	鳥	鳴	按
傷	咽	入	尊	入	尊	入	尊	與	河	富	其	鳥	鳴	曲
幽	咽	入	尊	入	尊	入	尊	與	橋	平	細	于	必	小

上三十一

二

素恨入金徽見說文君更苦楊大年不奈年

幽恨寫金徽又李益詩分明似黯凝佇掩重

關遍城鐘鼓

詳註周美成詞片玉集卷之一

詳註周美成詞片玉集卷之二

春景

解連環商調

莊子曰南方無窮而有窮今曰適越而昔來連環可解也

怨懷無託嗟情人斷絕信音遼邈信妙手能

解連環戰國策始皇遣齊王后王連環曰齊多智也解此環否以示羣臣臣

不知謝秦使曰謹以引解矣破似風散雨收霧輕

雲薄燕子樓空暗塵鎖一床絃索唐張建封

好賢樂善焉焉徐奇色公納之燕于樓

杜甫詩云夜半月高絃索鳴想移根換葉盡是舊

時手種紅藥

汀洲漸生杜若

吳兢感時而思君子也杜若春

草名三謝眺詩其草則有杜若

料舟移岸曲人

衡蘭謝眺詩其草則有杜若

在天角

東坡詩天故

角人記得當日音書把閑語

閑言待揔燒却水驛春回望寄我江南梅萼

荆州記曰吳陸凱與范曄善自江南寄梅花

頭人長安與曄并贈詩曰折梅逢驛使寄與隴

有頭人長安與曄并贈詩曰折梅逢驛使寄與隴

贈江一南無所拚今生對花對酒為伊淚落

玲瓏四犯大石

穠李夭桃是舊日潘郎親試春艷自別河陽

長負露房煙臉

晉潘安仁為河陽令多栽桃李

義山紅露花  
房自密脾  
憔悴鬢點吳霜  
念想夢魂飛亂

李賀吳霜點  
歸鬢金俞  
嘆盡欄玉砌都換纔

詩夢魂飛入  
瑞歸臺路  
俞  
始有緣重見  
李後主  
詞  
雕欄

夜深偷展香羅薦  
衣劉禹錫秦娘詩錦  
暗窓前

醉眠葱蒨浮花浪  
蘂都相識誰更曾擡眼  
愈韓

詩浮花浪  
休問蒨色舊香  
但認取芳心一點

又片時一陣風雨惡  
吹分散  
皮日休桃花賦  
狂風猛雨一陣

紅去

丹鳳吟越調

丹穴出鳳  
故名丹鳳

迤邐春光無賴

杜甫無賴春  
色到江亭

翠藻翻池黃蜂

遊閣朝來風暴飛絮亂投簾幕

爾雅日出而  
風乃暴韓愈

詩柳絮

生憎暮景

杜甫生憎柳絮

倚牆臨岸杏

靨天邪榆錢輕薄

歐公詩未利天邪來請降  
館榆錢夜雨新晝

永思惟傍枕睡起無慘殘照猶在庭角

況是別離氣味坐來但覺心緒惡痛引澆愁

酒

韓愈乾愁漫解坐自累與眾異起誰相親  
數盃澆腸雖醉皎皎萬慮醒還新坡詩親

半澆瓶愁有

奈愁濃如酒無計消鑠

唐韓琬如酒風  
遲日濃如酒風

那堪昏暝荻荻半簷花落

杜甫燈前細  
雨簷花落前細

調朱柔素手問何時重握

古今詩話李九皋  
謂徐仲雅曰公均

詩如女弄粉調脂韓此時此意長怕人道着

滿江紅 仙呂

晝日移陰攬衣起春帷睡足枕樂起天攬衣推臨

寶鑑綠雲撩亂未忺粧束旋粧鎮詩掠削雲鬟

雲擾擾梳蝶粉蜂黃渾浣了胸資蝶粉幾拂

晚鬟也枕痕一線紅生肉背盡欄脉脉悄無

言尋碁局坡杜牧脉脉無言幾度春

重會面猶未卜安古詩知道路阻且長會面無限

事縈心曲高孝綽歌心日暮縈心曲樂想秦箏

依舊尚鳴金屋所初學記日秦箏恬芳草連天迷

遠望

陳智夫芳草連天萬里情

寶香薰被成孤宿

庾州翠被夜徒

□□最苦是

蝴蝶滿園飛無心撲

杜陽離編唐穆宗時禁苑

花開有蝴蝶數萬飛集花間宮人爭以羅巾撲之卒無有獲之者

瑞鶴仙

高平

悄郊原帶郭

地志山陰郭南

行路永客去車塵

漠漠

沈約詩云高聲塵未減珠履故無聲

斜陽映山落飲餘紅

猶戀孤城欄角

凌波步弱

洛神賦凌波微過

短亭何用素約

白氏六帖五里一長亭

有流鶯勸

我重解繡鞍緩引春酌

沉南云清夜

不記歸時早暮上馬誰扶醒眠朱閣

古詩云阿誰扶



上馬不省  
下樓時

驚颭動幕扶殘醉  
遠紅藥

韓愈云  
傍砌者

紅藥

嘆西園已是花深無地東風何事又惡

子曹

建詩

清夜遊西園  
西園也

任流光過卻猶喜洞天

自樂

### 西平樂

小石

後漢注曰樂觀  
名在城之西

穉柳蘇晴故溪歇  
雨川迥未覺春  
餘駘褐寒

侵

歐陽文公  
輓褐小

雨公輕寒  
斑斑落燕泥

正怜初日輕陰抵

死須遮

韓愈  
臨初日照曜

嘆事逐孤鴻盡去

注見瑞  
龍吟

身與塘蒲共晚

李賀身與  
塘蒲晚

爭知向此征途區

區佇立塵沙追念朱顏翠髮曾到處故地使

人嗟

道連三楚

多阮籍三楚

天低四野

韓文陰雲已

喬木依前臨路歌斜重慕想東陵晦迹

召史平記

者故東陵侯秦破彭澤歸來左右琴書自樂

松菊相依陶潛爲彭澤令不樂賦歸去來辭

猶存何况風流賢未華多謝故人親馳鄭驛

史記鄭當時爲太子賓客時倒融尊後漢孔

中大夫賓客常滿尊中酒不空勸此淹留韓愈

我坐客常滿尊中酒不空共過芳時翻令倦客思家陸士衡余本

淹留

詩半生為客飽思家

浪濤沙商調

劉禹錫有浪濤沙辭混錦江邊兩岸花春風吹浪濤正濤沙錦女歸剪下中驚鵲定晚霞

畫陰重霜凋岸草霧隱城堞杜甫霧隱五板郊

而堞五堞而堞南陌脂車待發左傳云巾脂車

塗車東門帳飲乍闌西漢少傅為太傅兄廣子

上疏乞骸骨上許之公卿大夫故人邑子設

去道供帳東都門外送者車數百兩辭決而

賢哉二路大觀者曰正拂面垂楊堪纜結李太白賦

掩紅淚玉手親折

麗情集灼心

與裴質書以灼

軟綃聚紅淚為寄杜念漢浦離鴻去何許經

時信音絕鴻杜贊別詩離

情切望中地遠天闊向露冷風清無人處耿

耿寒漏咽嗟萬事難忘惟是輕別東坡云李珣曰人世

萬事惟別翠尊未竭憑斷雲留取西樓殘月

漁隱夏寶松詩月羅帶光綃紋衾疊連環解

舊香頓歇怨歌永瓊壺敲盡缺杜詩長擊

歌以如意打玉恨春去不與人期弄夜色空

餘滿地梨花雪麗情集無雙歌庭

憶舊遊越調

李  
白  
有  
憶  
舊  
遊  
贈  
馬  
少  
府  
此  
地  
別  
夫  
子  
念  
來  
思  
舊  
遊

記愁橫淺黛淚洗紅鈿門掩秋宵  
柳子厚門

墜葉驚離思聽寒蟬夜泣  
起劉禹錫賦夕草亂

雨瀟瀟  
充胡曾墜葉瀟瀟九月天也鳳釵半脫

雲鬢窻影燭花搖  
折元稹鳳釵亂漸暗竹敲涼

竹  
杜甫云風相敲踈螢照曉兩地魂銷  
韓愈兩地無

銷黯  
魂然

迢迢問音信道徑底花陰時認鳴鑣  
張晏九

玉銜之  
鑣也擬臨朱戶嘆因郎憔悴羞見

郎招  
麗情集崔氏與張生詩自從別後減容

十一

二

却爲郎憔悴

舊巢更有新燕楊柳拂河橋宋之問

別河橋楊柳風夕但滿眼京塵東風竟日吹

露桃陸士衡京洛多風塵顧况瑶

詳註周美成詞片玉集卷之二

詳註周美成詞片玉集卷之三

春景

驀山溪 大石

李賀馬詩何日驀青山

湖平春水菱苕紫舡尾空翠入衣襟王維無山路元

雨空翠拊輕棖遊魚驚避說文曰棖為棖聲以驚

魚使入晚來潮上迤邐沒沙痕杜甫潮來山

四倚雲漸起鳥度屏風裏李白清溪清我心

明鏡中鳥度屏風裏

周郎逸興黃帽侵雲水西漢鄧通以權舡為黃頭郎頗注曰刺舡

皆着黃帽映青袍落日媚滄洲泛一棹夷猶未

已望謝元暉子猶我張玉簫金管不共美人遊

李太白蕭蘭管之世雨頭棠因箇甚煙霧底獨愛尊

羹美南晉張翰因秋風起乃思江

### 少年遊

鮑昭行樂詩春風太多情村花

南都石黛掃晴山雙玉臺新詠南都石黛最發

德為薄眉號遠山有黛乃晴明衣薄耐朝寒

詩六輕錄寒一夕東風海棠花謝樓上捲簾看

韓偓海棠花看



而今麗日明如洗

庾肩吾旗亭麗日明

南陌暖彫鞍舊

賞園林苦無風雨

王介甫詩中宵風雨暝春園林零落黃花滿地金春

鳥報平安

杜甫春鳥平安每日報

第二

朝雲漠漠散輕絲

張景陽騰雲似

樓閣淡

春姿

杜甫云溪窠為我回春姿

柳泣花啼

洪覺範對句九

街泥重門外燕飛遲

杜甫泥融

飛燕子融

而今麗日明金屋春色在桃枝

林逋只知春

不似當時小橋衝雨幽恨兩人知

秋藥香

雙調

乳鴨池塘水暖李賀云曲風緊柳花迎面李白

風吹柳花午粧粉指印窻眼曲裏長眉翠淺

李道賀曲鄭姬歌自從小磨來

問知社日停針線探新燕注見應寶釵落枕

春夢遠元稹鳳凰寶釵為郎戴簾影參差滿院

漁家傲般涉

楚大夫往見莊子持竿不顧是漁家傲也

灰暖香融銷永晝李賀灰暖蒲萄架上春藤

秀李嶠藤詩云曲角欄干羣雀聞清明後風

梳萬縷亭前柳王元風梳古木香

日照釵梁光欲溜山翠釵谷梁云翡翠循堦竹粉沾衣

袖韓愈竹詩云淚拂拂面紅如着酒沉吟久後漢

光武召諸將議兵云昨宵正是來時候

第二

幾日輕陰寒測測注見荔東風急處花成積

醉踏陽春懷故國洪駒父詩話長安少女舞

袖弓彎渾忘却歸未得黃鸝久住如相識

眉空帶九秋霜

賴有蛾眉能暖客詩暖客貂鼠裘長歌屢

勸金盞側歌罷月痕來照席杜甫云罷琴貪

歡適簾前重露成涓滴

杜甫云重露成涓滴

南鄉子

商調

晉國高士全隱於南鄉因以爲氏也

晨色動粧樓

元稹晨梳洗樓上

影短燭熒熒

悄未收自在開簾風不定

李益問簾風動竹風俗通

曰小風曰颼

池面水漸趁水流

吳均散漫

早起怯梳頭欲綰雲鬟又却休

雲鬟注不會

沉吟思底事凝眸兩點春山滿鏡愁

春山注

下遊

望江南

大石

樂府雜錄  
浙西日錄  
謝秋娘後改  
爲望江南  
亡望江南  
伎謝秋娘  
自李德裕  
鎮

遊妓散獨自遶回堤  
伎蘇味道遊  
芳草懷煙迷

水曲密雲銜雨暗城西  
雨易曰密雲不  
九陌未

露泥

桃李下春晚未成蹊  
言李廣傳桃李不  
牆外見

花尋路轉柳陰行馬過鶯啼無處不悽悽

浣沙溪  
黃鍾

杜甫移舫先主  
廟洗藥浣沙溪

爭挽桐花雨鬢垂小粧弄影照清池  
池司空圖

還影

出簾踏鞵趁蜂兒

跳脫添金雙腕重

漢繁欽定情詩何琵琶

撥盡四絃悲

樂天琵琶一行曲終奏撥當夜寒

誰肯剪春衣

柳公權詩春

第二

雨過殘紅濕未飛

庾信喜晴濕珠簾一行透

斜暉

周詩珠簾繡戶遲遲遊蜂釀蜜竊香

歸

金屋無人風竹亂夜篝盡日水沉微一春須

有憶人時

漢官儀注曰篝落

第三

樓上晴天碧四垂倚韓屋云淚眼樓前芳草接

天涯勸君莫上最高梯

新筍已成堂下竹新張擴詩簷前落花都上燕

巢泥皮光業行人折柳和輕忍聽林表杜鵑

啼李義山望帝春心托杜鵑

迎春樂雙調

清池小圃開雲屋文選碑文云郭

雲屋聽結春伴往來熟杜甫云青樓也李義山憶年時

縱酒盃行速看月上歸禽宿師曠水禽注陸鳥

牆裏脩篁森似束元鎮連昌宮久無辭人森似束

記名字曾刊新綠見說別來長汧翠鮮封寒

玉揮犀云楚竹初生苔封之土人所着也

第二

桃蹊柳曲閑蹤跡俱曾是大堤客李太白昔為

上公樓解春衣貫酒城南陌杜甫朝回日典

城陌頻醉卧色晉阮籍公邑家婦有美

豐常從婦飲籍醉便卧其側夫不

疑之此云疑此云姬事注在側犯中更誰念玉溪消

鬢點吳霜嗟早白李賀吳霜更誰念玉溪消

息李商隱號玉溪生九日尊前有詩云十他日水



雲身相望處無南北

點絳脣 仙呂

鮑昭蕙心賦東都號妙姬南安

臺上披襟快風一瞬收殘雨

有風颺然而至王乃披襟而當之柳絲輕舉

蛛網粘飛絮

杜甫飛絮遊絲亦舉

極目平蕪應是春歸處愁凝竚楚歌聲告

詠史八千兵村落黃昏鼓

樓懸一鼓雙槌亂擊聲布

一落索 雙調

眉共春山爭秀可憐長皺樂天宛轉蛾眉遠山色清淚如莫將

清淚濕花枝恐花也如人瘦李賀云清淚如

曉時花淚

清潤玉簫閑久知音稀有玉臺新詠枝成詩不

知音欲知日日倚欄愁但問取亭前柳杜甫問

柳尋花到野亭

第二

杜宇思歸聲苦和春催去韓愈催歸日未西

倚欄一霎酒旗風歐陽公西任撲面桃花雨

李賀詩况是青春日將

暮桃花亂落如紅雨

目斷隴雲江樹柳惲隴首秋雲飛難逢尺素  
魚文選呼童烹鯉謝眺雲中辨江樹落霞隱隱日平西料想是分  
携處

垂釣絲商調

縷金翠羽粧成纔見眉嫵雲齊廣錄高氏詩

王君內傳南極夫人被青羽裙漢張敞守衣

倚繡簾看舞風絮愁幾許寄鳳絲鴈柱王建

飛入四條糾貫休

春將暮向層城花路鈿車似水時時花徑相

遇淮南子崑崙上有層城九重鈿車口口舊

遊伴侶還到曾來處門掩風和雨梁間燕語

問那人知否

山谷莊色

詩伎

借問

琵琶

得聞

否語

靈君

多

奈此雲窻霧閣何  
出漁隱有本末

詳註周美成詞片玉集卷之三

詳註周美成詞片玉集卷之四

夏景

滿庭芳 中呂

柳子厚贈江華長老詩云滿庭芳草積

風老鷺雛雨肥梅子杜甫詩紅梅午陰嘉樹清

圓劉夢得詩曰午有樹陰正左傳昭公二年季氏有嘉樹焉地卑山近衣

潤費爐煙杜甫詩又挈卑濕地初衫裏人靜

烏鳶自樂小橋外新綠濺濺杜甫詩樂木蘭詞但

聞黃河凭欄久黃蘆苦竹擬泛九江舫琵琶天

行住近湓江地低濕黃蘆苦竹杜甫詩聞道巴山裏春舡正好行都將百年興一

望九  
江城

年年如社燕飄流瀚海來寄脩椽西漢霍去

日瀚海崔浩注曰羣鳥之所解羽故且莫思身外

長近尊前杜甫詩茅茨寄短椽無窮憔悴江南

倦客不堪聽激管繁絃歌筵畔先安簟枕容

我醉時眠陶潛謂客云我

隔浦蓮大石

新篁搖動翠葆謝眺詩翠葆隨風新竹如動此

曲徑通深窈杜甫詩小夏果新收脆金丸落

驚飛鳥韓愈詩冰盤夏薦碧實脆濃靄迷岸

李賀詩肯把金丸落飛鳥

草蛙聲鬧驟雨鳴池沼韓愈食蝦蟇強名爲

聲相呼和无理只取鬧

水亭小浮萍破處簾花簷影顛倒張子野詩

見山影杜甫詩綸巾羽扇困卧北窗清曉世說

云謝萬詣簡文帝著白綸巾蜀志云諸葛亮乘素車葛巾白羽扇指揮三軍晉陶潛常言

夏口口閑時高卧北窗之下清風屏裏吳山

夢自到驚覺依然身在江表溫庭筠詩屏上

管悲江表言江南也

法曲獻仙音 大石

唐志元宗知音律又酷愛法曲又云夢仙子十輩御卿雲而下列於

庭各執樂器  
獻仙音也

蟬咽涼柯燕飛塵幕涼蟬介甫牆西樹詩渺渺

簾幕中間漏閣籤聲時度陳紀雞人詞漏傳

籤於階上使鎗然有倦脫綸巾困便湘竹桐

陰半侵朱戶向抱影凝情處時聞打窓雨選文

云落欲明花巷士抱影守空廬韓

耿無語歎文園近來多病情緒嬾尊酒易成

間阻杜甫詩文園多病縹緲玉京人想依然

京兆眉嫵雲翹夫人云藍橋便是神仙宅何

翠幕深中對徽容空在紈素潘安仁賦翠幕

點以雲布麗情



集云崔徽善歌舞慕敬中後使卹夏盡其待  
形容驛使由梁郡持與敬中此之類也

花前月下見了不教歸去  
梅花神花娘歌月

離河已見遠

### 過秦樓大石

水浴清蟾葉喧涼吹  
李商隱云風葉共成喧

巷陌馬聲閑依露井  
唐太宗詩涼吹肅離宮

笑撲流螢惹破畫羅輕扇  
孟蜀花蕊夫人詩

輕羅寶扇人靜夜久凭欄愁不歸眠立殘更

箭  
周禮挈壺氏漏水法嘆年華一瞬人今千

里夢沉書遠

空見說鬢怯瓊梳容銷金鏡李白詩了明玉金

前漸嬾趁時勻染梅風地溽虹雨苔滋李賀

雨霽杜甫詩楚薄王勃云虹銷一架舞紅都變

宋景文落花詩墜絮飄紅誰信無慘爲伊才

減江淹南史江淹少嘗宿於夢郭璞取其筆

自此爲詩無美情傷荀倩曹氏說云荀奉倩妻

再得熱人奉倩嘗不以冷身熨之妻亡嘆曰佳人難

但明河影下還看稀星數點杜甫詩云明河

星乍  
有無

側犯 大石

暮霞霽雨小蓮出水紅粧靚	看步韞江妃照明鏡	子闌新粧輕步	凌波踏明鏡	秉燭遊人靜	金環皓腕雪藕清泉瑩	甫詩佳人誰念省滿身香猶是舊荀令	雪藕絲人誰念省滿身香猶是舊荀令	駙馬詩焚香荀令偏憐小蓋荀令	擬國婚之選不欲連姻帝室乃遠適長沙尋	獲不見說胡姬酒壚寂靜	奴姓馮名子都依倚將軍勢調笑酒家胡	姬年十五春日獨當壚長裾連理帶廣袖合	歡孺左傳注胡姬煙鎖漠漠藻池苔井	乃齊景公妾也
多何蓮出詩霧風定	江妃本出洛神賦張文	飛螢度暗草秉燭遊花徑	飛螢度暗草秉燭遊花徑	追涼就槐影	文選美女篇擣袖見	李端	荀令	荀令	荀令	羽林郎新詠云卒延年	胡	胡	胡	胡

生煙紛漠漠杜甫  
詩翠苔生古井

塞翁吟大石

暗葉啼風雨李賀云木  
窗曉色新李賀云散水  
雞人唱罷曉瓏瑤李賀云散水  
蓉蘄州葦展雙紋浪九域志云蘄州葦葉水紋

寒輕帳翠縷如空夢念遠別淚痕重淡鈿臉

斜紅謝翱遇鬼詩斜月照人今夜夢落花啼

侵紅臉落

仲蕭鄰詩纖腰有蜀紙堪憑寄恨韓偓

心柳寬帶爲思君有蜀紙堪憑寄恨韓偓

非學柳寬帶爲思君有蜀紙堪憑寄恨韓偓

恨詩云蜀紙等今夜洒血書詞剪燭親封韓愈

達可妻詩剪燭親封錦字書毛菖蒲漸老早

晚成花教見薰風

蘇幕遮般涉

燎沉香消溽暑坡詩沉香作庭燎沈鳥雀呼

晴侵曉窺簷語葉上初陽乾宿雨水面清圓

一一風荷舉蘇子美鶯啼霜樹聲清圓燕立

故鄉遙何日去家住吳門久作長安旅五月

漁郎相憶否小楫輕舟夢入芙蓉浦

浣沙溪

日射歌紅蠟蒂香

溫岐卿云融蠟作杏蒂

風乾微汗粉

襟涼碧紗對掩簾紋光

自剪柳枝明畫閣

爲柳所暗而

戲拋蓮葯種

橫塘

爾雅曰荷芙蕖其實蓮其中葯揮犀云投蓮葯於畚甕種之則花碧元祐中畿

縣民池中生此術

長亭無事好思量

## 第二

翠葆參差竹徑成新荷跳雨淚珠傾

梵崇云

雨看跳珠杜甫云棹拂荷珠碎却圓曲欄斜轉小池亭

風約簾衣歸燕急水搖扇影戲魚驚

杜甫詩

浪搖柳梢殘日弄微晴

第三

薄薄紗厨望似空  
簾紋如水浸芙蓉  
東坡紋如云

如烟帳起來嬌眼未惺惚

強整羅衣擡皓腕  
更將紈扇掩酥臂  
新班姬詩

之紈素裁為合歡扇  
晉王珣與嫂婢有情  
嫂捷

悴復團扇持許郎自遮面  
焦羞郎何事面微紅

古詩云今日牛羊上  
午

第四

寶扇輕圓淺畫繒  
象牀平穩細穿藤  
齊孟嘗

象牀之飛蠅不到避壺冰  
鮑昭云清

翠枕面涼頻憶睡玉簫手汗錯成聲日長無

力要人凭

北夢瑣言嚴遵美以紫衣僧來謝語書致掌中及叙致手汗模糊

點絳脣

征騎初停酒行莫放離歌舉

孫楚有離歌詩李賀云離歌繞

絃懦柳汀蓮浦看盡江南路

苦恨斜陽冉冉催人去空回顧淡煙橫素白李

云林煙橫積素不見揚鞭處李賀云楊鞭何

訴衷情

商調

出林杏子落金盤齒軟怕嘗酸可惜半殘青

紫猶有小唇丹

莊子云唇若激丹



南陌上落花閒雨班班李白云朝步落  
歐公云小雨班花  
作閒  
泥燕不言不語一段傷春都在眉間論語鄉黨  
篇食不語  
寢不言

詳註周美成詞片玉集卷之四

132

133

詳註周美成詞片玉集卷之五

秋景

風流子 大石

前注見卷

楓林凋晚葉杜甫詩玉露凋傷楓樹林關河迥楚客慘將

歸關境上門也河孟津也楚客宋玉九辨望

一川暝靄鴈聲哀怨半規涼月人影參差文

詩半規殘月亭亭照杜牧詩酒醒後淚花銷

鳳蠟杜詩花催蠟炬謂南史風幕捲金泥李

主詞曲欄朱箔砧杵韻高喚回殘夢吳詩

杵聲綺羅香減牽起餘悲

亭臯分襟地柳惲詩亭臯木葉下難拚處偏

是掩面牽衣魏文帝辭別詩妻抱何況怨懷

長結重見無期江淹賦悲此期懷想寄恨書中

銀鈎空蒲晉索靖能草斷腸聲裏玉筍還垂

李義山詩斷腸聲裏唱陽關白氏六多少暗

愁密意惟有天知雙垂如玉筍也

華胥引黃鍾

列子曰黃帝晝寢而夢遊華胥氏之國

川源澄映煙月溟濛去舟似葉韓愈詩川源共澄映又清

湘一葉舟岸足沙平蒲根水冷留鴈唼宋玉九辨云鳬鴈皆  
 藻梁別有孤角吟秋賦萬錫秋聲對曉風鳴  
 軋紅日三竿醉頭扶起寒怯東坡詩酒醒門  
 集云青黃爲日三竿  
 離思相縈漸看看鬢絲堪鐫杜甫詩鬢髮白  
 鬢毛舞衫歌扇何人輕憐細閱張正見云休鐫  
 袖歌扇點檢從前恩愛鳳牋盈篋愁剪燈花  
 掩團紗  
 夜來和淚雙疊

宴清都 中呂

沈約遊仙詩朝上閭闔  
 宮高宴清都閣

地僻無鍾鼓杜詩地僻殘燈滅夜長人倦難

度寒吹斷梗風翻暗雨洒窓填戶李賀云棄去如斷梗樂天

諷諫云宿影瀟瀟暗雨長无睡天梗落木也

賓鴻謾說傳書算過盡千儔萬侶禮記月令

漢書漢使詣單于蘇武帛書上始信得庾信

愁多江淹恨極須賦庾信作愁賦閉戶欲驅

避愁愁已知人處江淹作恨賦試問平原蔓

草紫骨拱木斂人念古者伏恨而死聲

又恨人心自古皆有死莫不飲恨而吞聲

淒涼病損文園徽絃乍拂音韻先苦史記司馬相如

與文君歸成都嘗有消渴疾後拜為孝文園令既病免家居茂陵而死焉徽琴上之星也

淮水夜月金城暮草夢魂飛去杜牧云煙籠  
寒水月籠沙  
夜泊秦淮寄酒家又劉禹錫云淮水東邊舊  
時月夜深還過女牆來西漢趙充國願至金  
城上方畧近西羌地也其地薦草言舊  
遊之處見其夜月與暮草而傷蒐也秋霜  
半入清鏡侯老彭詩兩鬢嘆帶眼都移舊處  
王介甫詩平昔愁寬帶眼口南史沈約陳情  
書數旬革帶常應移孔孔眼也事皆祖於此  
更久長不見文君歸時認否

四園竹小石

浮雲護月未放滿朱扉文子曰日月之鼠搖  
欲明浮雲蓋之  
暗壁螢度破窻偷入書幃秋意濃閑竚立庭  
柯影裏好風襟袖先知陶淵明歸去來辭盼  
庭柯以怡顏杜牧之

思詩好風  
襟袖知

夜何其

詩夜如

江南路繞重山心知謾與前

期柰何燈前墮淚

杜甫詩客

腸斷蕭娘舊日

書辭猶在紙

麗情集

楊生賦崔娘詩清潤潘

流才子多春思

斷蕭娘一紙書

鴈信絕清宵夢又稀  
鴈信

見武事注上

### 齊天樂 正宮

綠蕪凋盡臺城路殊鄉又逢秋晚暮雨生寒

鳴蛩勸織

楊雄方

言曰

蛩幽

州謂之促

深閤

時聞裁剪

韓偓詩

分明

窓下

聞裁

雲窓

靜掩



嘆重拂羅裯頓踈花簾

韓愈云雲窓霧閣事恍惚李賀云僅厭舞

衫薄稍知花簾寒南史何憲

尚有練囊露螢

清夜照書卷

宋書車武子好讀書家貧无油以綃囊盛十螢火以照書杜甫

詩未足臨書卷

荆江留滯最久

西漢司馬遷留滯周南

故人相望處離

思何恨渭水西風長安亂葉空憶詩情宛轉

呂洞賓詩秋風吹渭水落葉滿長安

凭高眺望

禮記云可望正玉

液新菊

劉孝儀酒啓云瓊漿

蟹螯初薦

晉畢卓右手持酒盃

左手中持蟹螯拍浮酒也醉倒仙翁但愁斜照斂

晉山簡高陽有兒歌曰山公往何處道遙高陽池日夕倒載歸酤無所知杜甫詩斜陽

返照紅  
將斂

木欄花 高平

古樂府似木欄花名  
抹欄皮桂而香

郊源雨過金英秀陳叔達詩霜間開風拂霜

威寒入袖庾肩吾云勁氣綿感君一曲斷腸

歌樂天詩一曲四音并送我十分和淚酒

唐莊宗詞云和

古道塵清榆柳瘦李賀詩日繫馬旗亭人散

後李賀詩旗亭今宵燈盡酒醒時可惜朱顏

成皓首

霜葉飛 大石

杜甫詩清霜洞庭  
葉故欲別時飛

露迷衰草踈星掛涼蟾低下林表素娥青女

闌嬋娟正倍添悽悄李商隱詩青女素娥俱

漸颯颯丹楓撼曉謝元暉詩曉橫天雲浪魚

鱗小呂氏春秋雲煙火山雲草莽水雲但故人相

看又透入清暉半餉特地留照顏延年云清

必照沈警感異記將別女郎曰姮娥言半飯

肯留照照織女無賴已復斜河又半

迢遞望極關山波穿千里度日如歲難到淹江

恨賦云開山無極毛詩鳳樓今夜聽秋風柰

五更愁抱二幽冥錄曰鄴城五層樓安金鳳於

靜室想玉匣哀絃閉了孟東野云玉匣五無心

重理相思調杜甫詩哀絃繞白思雪陶穀見皓

月驚離恨屏掩孤顰淚流多少李嶠詩思

蕙蘭芳引 仙呂

劉禹錫詩窮巷秋風起先催蘭蕙芳

寒瑩晚空點清鏡斷霞孤顰湛方生云青

云落霞與飛對客館深局霜草未衰更綠吳融

賦旅館猶局謝元倦遊厭旅史記司馬長但

暉詩春草秋更綠

夢遶阿嬌金屋

漢武故事曰若得阿嬌當作金屋貯之

想故人

別後盡日空疑風竹

李益詩開簾風動竹疑是故人來

塞北毼毼

風俗通云織毛褥謂之毼毼

江南

圖障是處溫燠更花管雲牋猶寫寄情舊曲

音塵迢遞但勞遠目

謝莊月賦美人適兮音塵闊言語音風塵之遠

目也韓愈詩遠目增雙明

今夜長爭柰枕單人獨

魏文帝

長秋夜

### 塞垣春 大石

後漢鮮卑傳云漢起塞垣所別內外異殊俗也塞垣謂邊塞也

地也

暮色分平野杜詩云星垂平野闊傍葦岸征帆卸煙村

極浦杜甫詩樽罍臨極浦樹藏孤館秋景如畫漸別離

氣味難禁也更物象供瀟洒物象萬物形色杜甫詩秋色

正瀟洒念多材渾衰減一懷幽恨難寫書周金滕

多多藝材

追念綺窓人天然自風韻嫺雅吳均詩佳日落登雍臺集蓮

珠未來綺窓蓮花掩洞戶嫺雅後漢馬援傳注花妓序富辭艷色風韻嫺雅

沈靜也雅猶竟夕起相思謾嗟怨遙夜又還將

兩袖珠淚沉吟向寂寥寒燈下河上公曰寂者無音聲寥

者空形玉骨爲多感瘦來無一把東坡云司馬大子見王度

謂客曰此兒神一如秋水而清澈骨如皓玉而  
美秀一把俗云一獨也李百藥詩一擲掌中  
腰

丁香結 商調

古詩云芳草牽悲  
遠丁香水恨深

蒼蘚泐堦淨古松詩蒼蘚冷螢粘屋庭樹望秋

先隕晉顧悅曰蒲柳漸雨淒風迅澹暮色倍

覺園林清潤詩云風雨淒淒暮色杜漢姬紈扇在

重吟翫棄擲未忍成班姬扇詩新製齊紈素裁

簾箱登山臨水恨自古銷磨不盡宋玉九辨

歲送將歸黃損詩一別人間  
歲月多歸來人事盡銷磨

牽引記試酒歸時映月同看鴈陣王勃序云

寶幄香纓李白詩瓊筵寶幄連枝錦劉馮事

拜爲五色薰爐象尺溫庭筠織錦詞象夜寒燈

暈韓愈云夢誰念留滯故國舊事勞方寸蜀志

方徐庶云今唯丹青相伴那更塵昏蠹損

詳註周美成詞片玉集卷之五



詳註周美成詞片玉集卷之六

秋景

氐州第一 商調

波落寒汀村渡向晚遙看數點帆小亂葉翻

鴉驚風破鴈東坡杜甫詩云丹楓翻鴉伴水宿天角

孤雲縹緲東坡雲煙孤臺官柳蕭疎甚上掛微

微殘照景物關情川途換日頓來催老

漸解狂朋歡意少奈猶被思牽情繞座上琴

心史記司馬相如往卓王孫家一坐盡傾機

中錦字晉竇滔妻蘇氏作回文七言詩織錦上

以寄滔辭甚清婉又李覺最紫懷抱也知人  
白詩機中織錦秦川女

懸望久薔薇謝歸來一笑賈島詩云薔薇欲

夢高唐未成眠霜空自曉文選楚襄王與宋玉望高唐觀有雲

氣王問玉曰此何氣也玉對曰所謂朝雲也昔者先王嘗遊高唐急而晝寢夢一婦人曰

妾巫山之女也願薦枕席王因幸之樂天歌曰秋燈挑盡不成眠耿耿銀河欲曙天

解蹀躞商調

古詩曰白馬黃金鞍蹀躞柳城前蹀躞黃金鞍蹀躞

候館丹楓吹盡韓詩府州三百里候館也面旋

隨風舞坡詞面旋落夜寒霜月飛來伴孤旅

還是獨擁秋衾夢餘酒困都醒滿懷離苦

甚情緒深念凌波微步子建洛神賦河洛之  
微步羅襪若神凌波幽房暗相遇淚珠都作秋  
宵枕前雨此恨音驛難通待憑征鴈歸時帶  
將愁去

少年遊 商調

并刀如水杜詩焉得并吳鹽勝雪李太白詩玉  
花君設如吳鹽如纖手破新橙古詩云纖錦  
溫工幄帷緩作博山香詩十年辭錦幄長安巧  
口獸煙不斷上注見相對坐調笙王建宮詞云  
笙吹

低聲問向誰行宿城上已三更馬滑霜濃杜詩

云只愁騎馬滑又霜濃木石滑不如休去直自少人行

慶春宮越調

雲接平岡山圍寒野路回漸轉孤城衰柳啼

鴉驚風驅鴈杜詩天風吹斷柳鴈啼殺後樓動

人一片秋聲蕭瑟樹動秋聲倦途休駕淡煙裏微

芒見星塵埃憔悴生怕黃昏離思牽縈

華堂舊日逢迎花艷參差香霧飄零韓愈詩花艷大

堤娼杜詩云香霧雲鬟濕絃管當頭偏憐嬌鳳夜深簧暖

笙清眼波傳意恨密約忽忽未成韓偓云眼波向我無

端艷許多煩惱只爲當時一餉留情一毛女詩遊  
間碧落

醉桃源 大石

冬衣初染遠山青雙絲雲鴈綾樂天縹綾篇

鴈南行染色作江夜寒袖濕欲成冰都緣珠淚零

天寶遺事楊妃初入宮與

情黯黯悶騰騰身如秋後蠅杜甫詩况乃若

教隨馬逐郎行不辭多少程

第二

菖蒲葉老水平沙臨流蘇小家李白詩云蒲

賀詩錢塘畫欄曲徑宛秋蛇晉王猷之此字

宛欄徑屈曲金英垂露華陳叔達詩云

燒蜜炬李賀詩云蜜引蓮娃酒香薰臉霞俗風

通曰南楚以再來重約日西斜倚門聽暮鷄

美色為姓飛

點絳脣 仙呂

孤館迢迢暮天草露霑衣潤王伯宣云下

我夜來秋近月暈通風信類說云月

今日原頭黃葉飛成陣杜甫詩村知人悶故

來相趁共結臨岐恨杜詩不作

夜遊宮 般涉

或曰唐明皇與虢國夫人正月十五夜遊宮中觀燈

葉下斜陽照水捲輕浪沉沉千里九歌云洞

下葉橋上酸風射眸子李賀詩魏官牽車指千

立多時看黃昏燈火市

古屋寒窻底吳融諫曉賦卧聽幾片井桐飛

墜魏文帝云兩不戀單衾再三起有誰知爲

蕭娘書一紙前注見

第二

客去車塵未斂古簾暗雨苔千點李賀云南宮古簾暗

月皎風清在處見  
柰今宵初弦吹一箭

虞世南云

彩新初弦月

池曲河聲轉

李賀詩天河夜轉漂回念歸計

眼迷魂亂明日前村更荒遠  
且開樽任紅鱗

生酒面

石憲詩鸚鵡盃中未覺  
貧寒生酒面不生鱗

訴衷情

商調

堤前亭午未融霜  
風緊鴈無行

杜甫詩風重

尋舊日岐路茸帽北遊裝

宋書沈慶之

期信杳別離長遠情傷風  
翻酒幔寒凝茶煙

又是何鄉

无雙歌云紅簾如水  
隔神仙月清



暗寸  
與深  
傳心

傷情怨  
林鍾

枝頭風勢漸小看暮鴉飛了又是黃昏閉門  
收返照杜詩云返照入江門翻石壁絕塞愁時

江南人去路綽信未通愁已先到怕見孤燈  
霜寒催睡早

冬景

紅林擒近  
雙調

高柳春纔軟凍梅寒更香暮雪助清峭孟東野詩  
人多玉塵散林塘何遜詩誰言非玉塵那堪飄風遞冷

故遣度幕穿窓似欲料理新粧李白飛燕

倚新粧呵手弄絲簧唐宮女詩云

冷落詞賦客蕭索水雲鄉舒亶詩故園正

賦梁王遊於兔園召鄒生延枚臯相援毫授

簡上注見風流猶憶東梁望虛簷徐轉回廊未

掃夜長莫惜空酒觴

## 第二

風雪驚初霽晉王子猷居山陰夜雪初水鄉

增暮寒樹杪墮毛羽簷牙掛琅玕韓愈雪詩

鸞墮毛羽也真是屑瓊纔喜堆門巷積可惜

迤邐銷殘漸看低竹翩翩清池漲微瀾

坡詩云積

雨生微瀾

步屐晴正好

杜甫詩花殘步屐遲謝靈運有登山屐遲

宴席晚方

歡梅花耐冷亭亭來入冰盤對山前橫素愁

雲變色放盃同覓高處看

謝靈運雪賦寒風積愁雲繁劉禹錫

雪詩閑時駐馬望高處捲簾看

### 滿路花 仙呂

金花落燼燈

韓愈詩囊裏排金粟鄭谷詩靜燈微落燼粟花也燼煤也銀

鑠鳴窻雪庭深微漏斷行人絕風扉不定竹

圓琅玕折

杜詩風扉掩不定杜荀鶴詩云綠竹琅

色升玉人新間閣晉裴楷容儀俊爽時謂之玉人西漢間者闕焉久不聞問

着甚惊情蘇子美詩云翠更當恁地時節

無言歌枕陳薦燕子樓詩云帳底流清血韓

下淚和抱玉泣於楚山愁如春後絮來相接杜

別詩楚岸柳何窮知他那裏爭信人心切除共

天公說不成也還似伊無箇分別

詳註周美成詞片玉集卷之六

詳註周美成詞片玉集卷之七

單題

解語花高平（元宵）

開元天寶遺事云帝與妃共賞太液池千葉蓮指妃謂左右曰何如

此解花語

風銷焰蠟杜詩云炬銷花露浥烘爐花市光相射

桂華流瓦纖雲散耿耿素娥欲下張正見詩

曙泛濫宿雲浮月下衣裳淡雅看楚女纖腰

一把杜詩云楚女簫鼓喧人影參差滿路飄

香麝

因念帝城放夜

新記曰京城街衢有金吾曉

五夜各一勅許金吾弛禁前

望千門如畫

杜工部詩駐馬

望千嬉笑遊冶

鈿車羅帕

鈿車注見前麗情集云賈生遇雲容

夫人杜蘭若臨別贈賈秋雲羅帕云此玉蠶璽織成

相逢處自有暗塵

隨馬

蘇味道詩暗

年光是也惟只見舊情衰

謝清漏移飛蓋歸來從舞休歌罷

曹子建云清夜遊西

園飛蓋相追隨

六么令

仙呂

(重九)

快風收雨亭館清殘燠池光靜橫秋影岸柳

如新沐聞道宜城酒美昨日新醅熟

宜城人見虞美人

注 輕鑣相逐衝泥策馬來折東籬半開菊

陶潛

採菊東籬下

華堂花艷對列一一驚郎目

杜牧之爲御史分司李司徒閑

居洛一喚分開筵杜御史引三爵吟曰華堂今日綺筵開誰一時回梁武帝襄陽發狂吟驚滿座兩

歌大堤諸女兒花艷驚郎目歌韻巧共泉聲

間雜琮琤玉

韓愈琮琤泉聲

惆悵周郎已老莫唱

當時曲

吳志云周瑜曉音樂時幽歡難卜杜

云幽歡明年誰健更把茱萸再三囑

杜詩云

會知誰健再把

茱萸

倒犯仙呂調新月

霽景對霜蟾  
乍昇素煙如掃  
杜詩云朝正霽景鮮  
千林

夜縞徘徊處  
漸移深窈  
李商隱詩何人正

弄孤影踟躕  
揮犀集東坡對句蛇舞袖  
西窻悄

冒霜冷貂裘  
後漢東平王蒼來朝帝以玉竿

邀雲表  
西漢武帝作銅柱仙人掌也  
共寒光

飲清醪  
蜀都賦置酒高

淮左舊遊記  
送行人歸來路  
寫駐馬望素魄

印遙碧金樞  
小月呂廷濟注曰大明故云穴也  
樞

言駐馬立望  
素月之魄遙  
愛秀色初娟好  
隋

貼西方金樞  
之穴將沒也  
愛秀色初娟好  
隋

帝云秀色念  
漂浮繇繇思  
遠道  
蔡邕樂府云

若可食  
念漂浮繇繇  
思遠道  
蔡邕樂府云



遠縣縣思

料異日宵征

詩云肅宵征

必定還相照柰

何人自衰老

漢武少壯幾時奈老何

大酺

越調春雨

西漢文帝令天下大酺

對宿煙收

劉賓客詩林清宿煙收

春禽靜飛雨時鳴高

屋

柳師道詩花裏弄春禽

牆頭青玉旆洗鉛

霜都盡嫩梢

飛雨動華屋

逼琴絲寒侵枕障蟲網

吹粘簾竹

王充論衡云天且雨琴絃緩沈約詩網蟲垂戶織

郵亭無

人處聽簷聲不斷困眠初熟奈愁極頓驚夢

輕難記自怜幽獨

杜詩云哀年怯幽獨

行人歸意速最先念流潦妨車轂荀子云消潦水不

碎瓦不塞其輻既破怎柰向蘭成憔悴後周庾信

常賦有鄉問之思遂作哀江衛玠清羸先有衛玠

疾卒時年二十七人謂看殺衛玠等閑時易傷

心目未恠平陽客雙淚落苗中哀曲平陽客

自叙曰融性好音能鼓琴吹笛爲督郵獨卧

平陽鄙塢中有洛客合逆旅吹笛爲督郵獨卧

京師逾年暫聞况蕭索青蕪國溫庭筠詩花

甚悲乃作苗賦况蕭索青蕪國

紅糝鋪地門外荆桃如菽韓愈云紅糝夜遊

共誰秉燭長何云秉燭遊夜

玉燭新雙調梅花

爾雅云四時調和謂之玉燭

溪源新蠟後見數朶江梅剪裁初就暈酥砌

玉芳英嫩故把春心輕漏崔珣詩心逸前村

昨夜想弄月黃昏時候齊夜已詩前村深雪裏

暗香浮動孤岸峭踈影橫斜濃香暗沾襟袖

林逋詩疎影橫斜水清淺暗香

尊前賦與多材問嶺外風光故人知否白帖氏

云大庾嶺上有梅花壽陽謾闌日宋武帝女壽陽公主

落其額上落成宮女奇之花拂之不去經三終不

似照水一枝清瘦參寥梅花詩數風嬌雨秀

李賀詩風嬌好亂揅繁花盈首杜詩云安得

亂揅繁花須信道羌管無情看看又奏李賀

苗奏落梅蓋古樂

花犯 小石 梅花

粉牆低梅花照眼依然舊風味杜詩云花枝

林逋詩堪笑口雖亦風露痕輕綴疑淨洗鈴

華無限佳麗王介甫梅詩不御鈴華知國色

去年勝賞曾孤倚冰盤共宴喜韓愈詩冰盤

更可惜雪中高樹香篝熏素被杜詩云雪樹

注漢官儀曰尚書每入直臺中女侍二人執

梅花如雪  
如被如  
篝

今年對花最忽忽相逢似有恨依依愁悴吟

望久青苔上旋看飛墜相將見脆圓薦酒東坡

詩不越清人正在空江煙浪裏但夢想一枝

瀟洒黃昏斜照水林逋詩

醜奴兒大梅花

肌膚綽約真仙子莊子藐姑射山有神人居焉肌膚若冰雪綽約若處

子來伴冰霜洗盡鉛黃素面初無一點粧楊妃

外傳云號國夫人不施粧粉自有美艷

尋花不用持銀燭暗裏聞香零落池塘分付

餘妍與壽陽

壽陽林逋詩見上暗香

水龍吟

越調梨花

李賀詩雌龍  
寒水光

素肌應怯餘寒艷陽占立青蕪地鮑昭云艷

杜詩云偷眼艷陽樊川照日漢辛氏三秦一記曰

樊川靈關遮路謝眺云梨啓味出靈關之陰

殘紅斂避傳火樓臺妬花風雨僧祖可詩未

花杜詩云春寒細雨出長門深閉亞簾櫳半

濕一枝在手偏勾引得黃昏淚樂天詩手撚

又云梨花一枝  
春帶雨

別有風前月底布繁英滿園歌吹樂天詩惟

吹發朱鈇退盡潘妃却酒堂齊紀百姓歌云閑武

潘妃昭君乍起琴操昭君歌曰梨葉萎其

雪浪翻空粉裳縞夜韓愈詩風揉雨練雪羞

介甫詩云積不成春意恨玉容不見瓊英謾

好與何人比樂天云玉容寂寞淚闌干談助

啖之長而肌香因名

六醜中呂落花

音志云漢儀后親蠶桑著十一弄

步搖衣青乘神蓋雲母安車駕六

醜類注曰

正單衣試酒悵客裏光陰虛擲劉賓客詩遙羨光陰不虛

擲願春暫留春歸如過翼一去無跡杜甫詩林深過

翼爲問家何在夜來風雨送楚宮傾國李西漢

年歌曰北方有佳人絕世而獨立一笑傾城再笑傾人國溫庭詩云神女來風雨送殘花

釵鈿墮處遺香澤杜詩云神女來風雨送殘花

蹊輕翻柳陌劉賓客詩桃蹊多情更誰追惜

但蜂媒蝶使時叩窻隔

東園岑寂容游池亭詩岑漸蒙籠暗碧文選

羅結高林蒙靜遠珍叢底成嘆息長條故惹

行客似牽衣待話別情無極盧全詩此殘英



小強簪巾幘

應璩詩巾幘落

終不似一朵釵頭顫

裊向人歌側漂流起莫趁潮汐

陳充落花詩終尋流水送漂流

王介甫高齋詩百

恐斷鴻尚有相思字何由

得見

撫遺云鳥衣國寄王柳詩來春縱有相思字三月天南無鴈飛

### 虞美人 正宮

金閨平帖春雲暖

江淹別賦金閨之諸彥注云金馬門也杜詩云雲暖

麝香

畫漏花前短玉顏酒解艷紅銷李太白詩

絲雲髮非素絲

一面捧心啼困不成嬌莊子西施病心而顰其里

之醜人見而美之歸亦捧心效顰里人見而走

別來新翠迷行徑窻鎖玲瓏影研綾小字夜

來封

王介甫詩小研紅綾闌詩句

斜倚曲欄凝睇數歸鴻

嵇康詩云目送歸鴻

第二

廉纖小雨池塘遍細點看萍面

韓愈云廉纖小雨不能暗

一雙燕子守朱門

溫岐卿詩一雙青瑣燕

一比似尋常時

候易黃昏

宜城酒泛浮香絮細作更闌語相將羈思亂

如雲

謝景山詩野思到春亂如雲

又是一窻燈影兩愁人

詳註周美成詞片玉集卷之七

詳註周美成詞片玉集卷之八

單題

蘭陵王 越調 柳

紺珠集北齊蘭陵長恭白晝而美風姿乃著假面對敵數立功齊人代作舞做之曰

柳陰直煙裏絲絲弄碧魏舒別柳詩絲絲隋堤

上曾見幾番拂水飄綿送行色隋煬帝疏洛

宮道皆種柳絮白朱延齡柳詩遙憐拂水輕馬有行

色登臨望故國馮衍賦云望誰惜京華倦客

杜詩云旅長亭路年去歲來應折柔條過千

食京華春

尺攀魏文帝柳賦柔條婀娜而施紳文選詩但

感別經時

閑尋舊蹤跡又酒赴哀絃燈照離席杜詩云

白雪韓愈日蝕油梨花榆火催寒食樂天云

燈不照席反用爾梨花榆火催寒食樂天云

變國寒食清明周禮春官四時愁一箭風快半篙

波暖歐陽詢詩急風吹中半篙回頭迢遞

便數驛望人在天北

悽惻江淹別賦行悽惻恨堆積漸別浦縈回

水窮島嶼之縈浦津堠岑寂斜陽冉春無極

念月榭携手詩云携手同行露橋聞笛李白聞笛詩

柳折沉思前事似夢裏淚暗滴

蝶戀花 商調 柳

愛日輕明新雪後 左傳注曰 柳眼星星漸欲

穿窻牖 杜荀鶴詩柳欲開春眼南史何長不

待長亭傾別酒 許渾詩道遠書難 一枝已入

騷人手 韓翃詩云章臺柳似舊時也昔日青青

他人

淺淺按藍輕蠟透 古詩云春 過盡冰霜便與

春爭秀強對青銅簪白首老來風味難依舊

賈島詩匣有青銅鏡時將照鬢看

第二

桃萼新香梅落後

李若水詩

柔小桃

暗葉藏鴉

冉冉垂亭牖

李杜詩

賀詩柳葉未藏

碧鴉

舞困低迷

如著酒

樂天詩

柳似舞腰池似鏡

招拍

亂絲偏近

遊人手

雨過朦朧斜日透客舍青青特地添明秀莫

話揚鞭回別首渭城荒遠無交舊

王維贈朝

雨泥輕塵客舍青青柳色新勸君且盡一盃酒西出陽關無故人

第三

蠶蠹黃金初脫後

李賀詩

嫩云柳

暖日飛綿取

次粘窓牖不見長條低拂酒花蕊夫人詩早春楊柳引長條

贈行應已輸先手贈僧慕幽柳詩千里憑君一

鷺擲金梭飛不透古詩鷺穿絲小榭危樓處

處添奇秀何日隋堤紫馬首路長人遠空思

舊隋堤注見上

#### 第四

小閣陰陰人寂後王維詩陰陰翠幕褰風燭

影搖踈牖夜半霜寒初索酒杜詩云指點金

刀正在柔荑手唐宮女玉燭製袍夜金刀

綵薄粉輕光欲透小葉尖新未放雙眉秀鄭元

傳秀眉明目韓愈  
詩細柳艷明眉  
人呼曰飛間  
首或曰飛間  
別離情味還依舊  
魏野柳詩  
情別離

西河 大石

金陵

佳麗地  
唐大歷初嘗有樂工自撰歌即古曲  
長命西河女也加減節奏頗有新聲  
王州江南佳麗地  
南朝盛事誰記山

圍故國遶清江  
髻鬟對起  
忽濤寂寞打孤城

風牆遙度天際  
謝元暉詩  
斷崖樹猶倒倚

莫愁艇子曾繫空遺舊跡  
鬱蒼蒼霧沉半壘

夜深月過女牆來  
賞心東畔淮水  
劉禹錫金



常	烏	附	烏	如	鄰	酒	錄	山	云	話	帆	鄭	倭	處	時	故
百	衣	會	衣	說	里	旗	云	樹	千	云	去	谷	詩	住	月	國
姓	巷	入	巷	興	燕	戲	有	爵	里	賞	帆	詩	應	在	夜	周
家	口	劉	有	亡	子	鼓	白	蒼	秦	心	來	石	是	石	深	遭
今	夕	禹	曰	斜	不	甚	石	蒼	淮	亭	風	城	石	城	還	在
乃	陽	錫	烏	陽	知	處	壘	建	在	丁	浩	昔	城	西	過	朝
引	斜	詩	衣	裏	何	市	藥	康	玉	晉	渺	爲	艇	艇	女	打
唐	舊	其	之	裏	世	西	實	壘	壺	公	花	莫	子	子	牆	孤
王	時	聚	聚	即	入	歐	陽		曹	所	開	愁	來	折	來	城
榭	王	不	不	漁	尋	風	永		子	作	花	鄉	兩	兩	又	寂
航	謝	當	當	叢	常	酒	叔		建	秦	謝	莫	漿	漿	樂	寞
海	堂	作	作	話	巷	旗	市		詩	淮	春	愁	伊	催	府	回
遇	前	榭	榭	云	陌	詩	想		大	絕	悲	鬼	啞	送	詩	淮
風	燕	字	字	王	人	依	稀		容	致	涼	散	過	莫	莫	水
抵	飛	是	是	謝	家	王	謝		何	蕭	總	石	花	愁	愁	東
一	入	後	後	居	相	王			寥	斧	龜	城	塢	來	在	邊
所	尋	人	人	名	對	謝			廓	詩	荒	荒	又	韓	何	舊

見鳥衣國王以女妻之  
後榭思歸之梁上雙軒  
令榭入其  
燕呢喃後寄詩曰誤到華胥國裏來主幾人終  
日獨憐才雲軒漂去无消息酒淚春風幾人終  
離女答曰昔日相逢冥數合今時鴈飛遠苦生  
可說虛誕何有相思字三月天南无鴈飛此小  
信也

三部樂 商調 梅雪

南史羊侃嘗宴賓客三百餘人奏  
三部樂至夕侍婢俱執金花燭

浮玉霏瓊向邃館靜軒倍增清絕夜窓垂練

何用交光明月杜詩云紫窻垂文練近聞道官閣多

梅趁暗香未遠凍蕊初發杜詩云東閣官梅

香浮動倩誰摘取寄贈情人桃葉晉王獻之

月黃昏

葉其妹曰桃桃根獻之作桃葉歌  
曰桃葉復桃桃葉連桃根

迴文近傳錦字寶迴文寄之道爲君瘦損是

人都說杜詩云思瘦祆知染紅着手膠梳粘髮

轉思量鎮長墮睫李善注文選孟嘗都只爲

情深意切欲報消息無一句堪愈愁結

菩薩蠻 正平 梅雪

唐大初女蠻國貢獻其人皆危髻金冠璫珞被體故謂之菩薩蠻

銀河宛轉三千曲銀河天也出崑崙浴鳧飛

鷺澄波綠杜詩云浴鳧何處是歸舟夕陽江

上樓謝元暉詩上天際識歸舟劉賓客詩江上樓高十二梯

天憎梅浪發故下封枝雪西京雜記太平深

院捲簾看應憐江上寒韓偓詩側

品令商調  
梅花

夜闌人靜杜詩云夜語月痕寄梅梢踈影林逋詩注

前見簾外曲角欄杆近舊携手處花發霧寒成

陣沈約詩落  
花紛似霧

應是不禁愁與恨東坡云孔聖年老縱相逢

難問黛眉曾把春衫印李白詩青黛後期無

定斷腸香消盡

玉樓春仙呂  
惆悵

宴樂天  
醉詩云  
和王樓

玉琴虛下傷心淚杜詩云收書動玉琴只有

文君知曲意桃即文相如琴心簾烘樓迴月宜人

時杜詩云樓迴獨移酒又詩云樓迴獨移煖香融春有味李賀詩

茫酒  
茫煖  
茫春

萋萋芳草迷千里惆悵王孫行未已文選招

王孫遊芳山中歸芳草不可生芳萋萋王天涯回首

一消魂杜詩云賦回首可憐消魂二十四橋歌

舞地杜牧寄揚州韓判官詩二十四

黃鸝遶碧樹雙調  
春情

雙闕籠嘉氣

吳都賦

朱

闕

雙立

東漢

寒威日

晚歲華將暮

蕭子雲

歲暮賦

日暮

小院

閑庭

對

寒梅照雪淡煙凝素

沈約詩

云長

忍當

迅景

動無限傷春情緒

楚辭

云目極

千里

今傷

春

故若

動情緒也

猶賴是上苑風光

漸好

芳容將

煦

謝元暉詩

風吹動

之草際

浮注

曰風本

无光

草

煦出溫日也

草莢蘭芽漸吐

帝王

世紀

云唐

堯之

時草

夾

則十五

莢自十六

日一莢

落

且尋芳

更休思

慮這浮世甚驅馳利祿奔競塵土

晉書

云悠

悠

悠

悠

悠

悠

自薛 疑夜 飛來 到皆 達日 山夜 頂在 瓊側 樹薛 三昭 株遇 半美 夜婦 春詩 曰者 瓊魏 樹宮	以漸 為不 酒飢 名渴 也後 人	飲流 霞抱 家朴 曰仙 子人 曰項 但曼 以都 流霞 入山 一學 升仙 與我 十年 歸	張人 綽有 詩徑 不寸 如之 且珠 飲照 酒車 莫前 管後 流十 年二 度乘 唐	競焉 奔 縱有 魏珠 照乘 未買 得流 年住 王史 日記 魏寡
--	---------------------------------	---	---	---

詳註周美成詞片玉集卷之八

--	--	--	--	--	--	--	--	--	--

13



詳註周美成詞片玉集卷之九

雜賦

綺寮怨中 思情

文選魏都賦云矐日籠光於綺寮說文曰綺文繒也寮小窓也言綺

憲之人有所思而怨感耳

馬上人扶殘醉曉風吹未醒杜詩云扶醉初醒古詞云汝曉

風吹人酒醒時候映水曲翠瓦朱簷垂楊裏乍見津

亭杜詩云野當時曾題敗壁韓愈詩敗壁剝寒月蛛絲

罩淡墨苔暈青念去來歲月如流謝靈運序歲月如流

徘徊久嘆息愁思盈

去去倦尋路程

古詩云復去去荀子曰程江

陵舊事何曾再問楊瓊

江陵府古荊州舊曲也楊瓊事未詳

淒清斂愁黛與誰聽尊前故人如在想念我

最闌情何須渭城歌聲未盡處先淚零

渭城注見

前卷杜詩云吞聲躑躅涕淚零

拜星月 高平

秋思

夜色催更清塵收露

元徽夫人詩小曲幽坊

月暗竹檻燈窻識秋娘庭院

秋娘注見笑相瑞龍吟

遇似覺瓊枝玉樹暖日明霞光爛

古離別願

不異瓊樹枝晉謝元云芝蘭玉樹水眇蘭情生於庭階杜詩云明霞爛復閣

想平生稀見

韓琬集吳魚嶺鴈無消息水明蘭情別來久

畫圖中舊識

春風面

杜詩云畫圖省識春風面

誰知道自

到瑤臺畔

拾遺記云崑崙廣千步乃仙人所居

崑崙山有瑤臺十

眷戀

雨潤雲溫苦驚風吹散念荒寒寄宿無人館

重門閉敗壁秋蟲歎怎奈向一縷相思隔溪

山不斷

杜詩云秋聲賦但聞四壁助予之嘆息

歐公詩秋聲賦但聞四壁助予之嘆息

尉遲孟大石

離恨

隋堤路漸日晚密靄生深樹陰陰淡月籠沙

杜牧詩煙籠寒水月籠沙夜泊秦淮寄酒家

還宿河橋深處無情

畫舸都不管煙波隔南浦等行人醉擁重衾

載將離恨歸去唐鄭仲賢詩亭亭畫舸繁寒

波與風雨載將  
離恨過江南

因念舊客京華長偎傍疎林小檻歡聚冶葉

倡條俱相識李義山詩冶葉仍慣見珠歌翠

舞楊妃外傳明皇令宮伎佩七寶璫舞霓裳羽衣曲曲終珠翠可掃樂天寄賈常州

崔湖州珠翠歌鍾俱遠如今向漁村水驛夜

如歲焚香獨自語有何人念我無慘上戰國策

愁民無聊賴夢魂疑想鴛侶司馬長卿賦忽寢寐而夢想兮若君之在傍

遶佛閣大石  
旅情

暗塵四斂注見前篇樓觀迥出高映孤館清漏將

短厭聞夜久籤聲動書幔桂華又滿韓愈賦桂華吐

耀開步露草偏愛幽遠斯在詩云湛湛露花氣

清婉杜詩云花氣望中迤邐城陰度河岸避何

詩城陰度壘墨

倦客最蕭索醉倚斜橋穿柳線還似汴堤虹

梁橫水面李白詩雙橋落彩虹蘇子看浪颭

春燈杜詩云風亂舟下如箭龍門其流如竹箭

此行重見歎故友難逢羈思空亂兩眉愁向

誰舒展古詩云兩條眉鎖萬年愁

一寸金小石江落

州夾蒼崖下枕江山是城郭望海霞接日紅

翻水面晴風吹草青搖山脚波暖鳬鷺作沙

痕退夜潮正落疎林外一點炊煙山谷詩岑寂無炊煙

渡口參差正寥廓吳融詠曉賦參差而物象將開又云動乾坤之寥廓

參差幽遠貌寥廓

自歎勞生經年何事京華信漂泊念渚蒲汀

柳空歸閑夢崔豹古今注曰蒲柳生水邊杜詩云渚蒲芽白水荇青風

輪兩楫終辜前約情景牽心眼流連處利名

易薄回頭謝冶葉倡條便入漁釣樂張銑注歸田賦

曰且與漁釣之父同樂

蝶戀花 商調

(秋思)

梁簡文帝紹古歌云  
翻堦蛺蝶戀花情

月皎驚鳥棲不定白畢公叔早行詩火遠天不俱

一定拂霜下更漏將殘輾輾牽金井金杜詩云硯寒

輾公詞金井喚起兩眸清炯炯潘安仁寡婦

不淚花落枕紅綿冷李賀詩九紅

執手霜風吹鬢影李賀詩春影去意徊徨別語

愁難聽樓上欄杆橫斗柄劉賓客詩喚喔晨

露寒人遠雞相應金樓子云桃都山人樹有

皆鳴故此  
云相應

如夢令 中呂

唐莊宗詞云如夢如夢和淚出門相送如

塵滿一絢文繡淚濕領巾紅皺楊妃外傳風

覆成賀懷智巾上又唐逸史崔生仙女擲領

初暖綺羅輕腰勝武昌官柳樓中賓客詩庾亮

昌春柳似霄肢長晝長晝困卧午窓中酒晉徐邈中

人酒為聖

第二

門外迢迢行路誰送郎邊尺素注見一巷陌

雨餘風當面濕花飛去注見第無緒無緒閑



處偷垂玉筋

胡曾詠王昭君詩明妃遠嫁泣西風玉筋雙垂出漢宮

月中行 (怨恨)

青瑣早行詩云主人燈下別羸馬  
月中行又行劉賓客晚泊詩無人能  
詠史獨自月中行

蜀絲趁日染乾紅微暖面脂融博山細篆霽

房櫳

晉東宮舊事有銅博山靜看打窓蟲  
香爐房櫳見早梅芳注

隱詩門戶暗  
蟲尤打窓

愁多膽怯疑虛幕

麗情集愛夢歌云聲不斷  
帳虛膽怯夢易破

暮景踈鍾團圍四壁小屏風啼盡夢魂中

吳孫

亮作綠琉璃屏風薄布瑩徹月下清夜舒之  
常寵四姬皆振世絕色使入四座屏風內望

之若無隔惟香  
氣不通於外

浣沙溪 黃鍾

日薄塵飛官路平眼前喜見汴河傾

宋武義帝

洛十三入年十二月自地遙人倦莫兼程

下馬先尋題壁字出門閑記勝村名

孟東野詩官家

勝村早收燈火夢傾城

注見六

第二

貪向津亭擁去車不辭泥雨濺羅襦

裴餘慶云從教

水濺羅襦濕知淚多脂粉了無餘

酒醺未須令客醉路長終是少人扶早教幽

夢到華胥

注見華胥引

第三

傷感

不爲蕭娘舊約寒何因容易到長安

蕭娘見四圍竹

注文選西都賦漢之西預愁衣上粉痕乾

幽閣深沉燈焰喜

元稹白居易詩云簾幕四垂燈焰暖杜詩云誰家爲君門外脫

小壚鄰近酒盃寬

杜詩云誰家爲君門外脫

歸鞍

點絳脣

仙呂

遼鶴歸來故鄉多少傷心地

神仙傳遼東城門華表柱有鶴

集其上人歌曰有鳥有鳥丁令威去家千歲今始歸城郭如故人民非何不學仙家累累

杜詩云欲我寸書不寄魚浪空千里劉向列

陵陽子明釣得  
白魚腹中有書

憑仗桃根說語淒涼意桃根注見愁無際舊

時衣袂猶有東門淚東門注見

少年遊黃鍾樓月

簷牙縹緲小倡樓簷牙注見前杜詩云獨立

嵯峨明涼月掛銀鈎鮑昭詩云涼月如玉鈎聒

席笙歌透簾燈火樂天詩笙歌歸院風景似

州杜牧詩春風十里揚州

當時面色欺春雪南史云北齊盧士深妻崔

雪與兒作光悅取取雪面云取桃花紅取白雪與兒洗面曾  
伴美人遊今日重來更無人問獨自倚欄愁

望江南大石

詠伎

歌席上無賴是橫波文選舞賦云目流睇而

賴是橫波黛不留儂睡意如何好寶髻玲瓏

歌王燕韓偓詩歡餘年玉起燕歌郭子橫洞冥記

留中一玉釵以與帝帝共謀欲碎之明旦視帝釵

鳳中宮人猶見此釵後宮繡中柔膩掩香羅

人好自宜多

無箇事因甚飲雙蛾劉長卿貼君怨云淺淡

梳裝疑見畫惺鬆言語勝間歌惺鬆猶何況

會婆娑

婆娑舞也詩東門之粉序曰歌  
舞於市井爾首章婆娑其下

詳註周美成詞片玉集卷之九

詳註周美成詞片玉集卷之十

雜賦

意難忘呂中（美詠）

衣染鶯黃

溫庭筠舞衣詩云偷得鶯黃黃瑣金縷

愛停歌駐拍勸

酒持觴低鬟蟬影動

杜牧詩續張會真詩低鬟蟬影動

私語口脂香

方千美人詩此些私語恐人知杜詩云口脂些些面藥隨恩澤簷

露滴竹風涼拚劇飲淋浪

麗情集漁家女吟詩曰珠簾半床月青竹

滿林風謝生答何事今宵景無人解與同王

詩好使渴來能劇飲舒宣詩空得淋浪酒

滿夜漸深籠燈就月子細端相

端正視也

知音見說無雙

樂府古詞焦仲卿妻精妙世無雙

解移宮換

羽未怕周郎

吳志周瑜少精意於音樂雖三

顧故時人語曰

長顰知有恨貪耍不成粧些

箇事惱人腸試說與何妨又恐伊尋消問息

瘦減容光

崔氏詩自從消瘦減容光

迎春樂

雙調

推攸

人人花艷明春柳憶筵上偷携手越歌停舞

罷來相就醒醒箇無些酒

比目香囊新刺繡

南越記云有比目魚傳燈錄錦繡紅香囊風吹滿院

連隔一時薰透爲甚月中歸長是他隨車後

李白詩取醉月中歸韓退之詩只知閑信馬不覺誤隨車



定風波

調商

美情

周武王渡孟津波逆流而上瞑目  
而麾曰余任天下誰敢害吾意者

於是風霽波  
罷義當出此

莫倚能歌歛黛眉嚴武詩莫倚此歌能有幾

人知杜詩云此曲只應聞天上有意他日相逢花

下底重理好聲湏記得來時劉賓客詩天

前人月底奉君王九重深處

苦恨城頭傳漏永無情豈解惜分飛休訴金

尊推玉臂杜詩云清從醉明朝有酒遣誰持

沈休文詩勿言一

尊酒明日難重持

紅羅襖 大石

畫燭尋歡去羸馬載愁歸 胡曾詠史詩比念

取酒東壚樽罍雖近採花南浦蜂蝶須知 宗冉

蜂敏未開壯丹詩密藏蠟藥  
難見微歛香濃蝶已知

自分袂天闊鴻稀 謝惠連詩飲錢野 空懷夢

約心期楚客憶江薜 楚客經云苞江薜與薜荔兮

筭宋玉未必爲秋悲 宋玉九辨云悲哉秋之爲氣也

玉樓春 四首 大石

當時隼手城東道月墮簷牙人睡了酒邊難

誰一作 使客愁驚 驚一作輕杜詩 帳底不教春

夢到

別來人事如秋草

坡詩云古今應有吳霜侵

翠葆

吳霜翠葆事注見前

夕陽深鎖

綠苔門一任

盧郎

愁裏老

南書郎新書曰要盧家

有子弟年暮而為

校書郎晚崔氏女崔有詞翰結襦

之後微有嫌色

詩曰不怨檀郎年幾大不怨檀郎官職卑自

恨妾身生較晚不見盧郎年少時

又杜荀鶴詩舉世盡從愁裏老

大堤花艷驚郎目

注見前六

秀色穠華看不

足休將寶瑟寫幽懷

西漢金日磾傳芥座上

有人能顧曲

顧曲乃周瑜事注見意難忘下

第二

平波落照涵頰玉

宋迪八景有漁村落照詩

誰揭頰玉盤

畫舸亭亭浮澹綠

鄭賢詩亭二

東京賦曰臨分何以祝深情只有別離三萬

斛韓愈詩臨分不忍去古詩云

### 第三

玉奩收起新裝了鬢畔斜枝紅裊裊

魏收詩

枝淺顰輕笑百般宜試著春衫猶更好

李義山代

離筵伎作新人橋上着春衫舊主江邊側帽簷

裁金鏤翠天機巧

子建洛神賦戴金翠之首飾

不稱野人

簪破帽

晉王濛美姿容帽破入市買之郡姬閱之遺以帽也

滿頭聊揷

片時狂頓減十年塵土貌

言面色塵埃坡土詩

第四

桃溪不作從容住秋藕絕來無續處

謝元暉詩

折輕

當時相候赤欄橋

北夢瑣言曰唐李匡

好勇曾一日

與諸遊俠輩釣於桑乾赤欄橋之側自以酒

祝之曰吾若幽州節制分則獲大魚果釣

得魚長三尺今日獨尋黃葉路

談苑云僧惟

鳳秋日送人

詩去路正黃葉

煙中列岫青無數

文選云憲

鴈背夕陽紅欲

暮

溫庭筠詩蝶翅胡人如風後入江雲杜詩

入度情似雨餘粘地絮

參寥詩禪心

夜飛鵲 正宮

梁王鴻七夕詩秋近  
鴈行稀天高鵲夜飛

河橋送人處涼夜何期斜月遠墮餘輝銅盤

燭淚已流盡霏霏李賀詩銅黃涼露霑衣淮南

荆王傳宮中生衣相將散離會處探風前津鼓介王

甫詩月落樹杪參旗華驄會意杜詩云初得

又丹青引先帝縱揚鞭亦自行遲李賀詩宛種

迢遞路回清野人語漸無聞空帶愁歸何意

重紅滿地遺鈿不見遺鈿事注斜徑都迷兔

葵燕麥向殘陽影與人齊兔葵燕麥事注但徘徊

徊班草

王介甫次韻留別詩班草數行衣上

也義唏噓酹酒極望天西  
揚雄方言云哀而

澆地曰

早梅芳 二首

留戀

花竹深房櫳好常建詩竹遇通幽處禪房花

兮風疏冷檻冷  
也師古夜閒無人到隔窗寒雨向壁

孤燈弄餘照周易李賀詩其向壁燈垂花杜詩

云水宿淚多羅袖重韓偓詩向壁意密鶯聲小

正魂驚夢怯門外已知曉晏小山詞意

去難留話未了早促登長道風披宿霧陶潛

霞開露洗初陽射林表初陽注見亂愁迷遠

覽張鏡賦縱目遠覽苦語縈懷抱謾回頭更堪歸路

杳

## 第二

繚牆深叢竹繞西都賦繚以周牆宴席臨清

沼微呈纖履故隱烘簾自嬉笑粉香粧暈薄

帶緊腰圍小看鴻驚鳳翥蒲座歎輕妙陸士衡賦

鸞翔鳳翥  
鴻驚鵲奮

酒醒時會散了回首城南道吳兢擬採桑曲云羅敷十五六

採桑城河陰高轉露脚斜飛將曉李賀詩露脚斜飛濕



寒鬼古詩云異鄉淹歲月醉眼迷登眺蔡炎登

深夜天將曉高遠路迢迢恨滿千里草江淹賦路貫千里

鳳來朝越調

逗曉看粧面小窓深弄明未遍梁武詩范露

愛殘朱宿粉雲鬟亂最好是帳中見劉緩照鏡賦詩

宿粉之猶調笑殘黃之不正

說夢雙蛾微斂錦衾溫酒香未斷待起難捨

拚任日炙盡欄煖李賀詩日炙錦嬌正未醒

芳草渡

昨夜裏又再宿桃源醉邀仙侶聽碧窓風快

珠簾半捲疎雨多少離恨苦方留連啼訴鳳  
帳曉又是匆匆獨自歸去

愁覩滿懷淚粉瘦馬衝泥尋去路謾回首煙  
迷望眼依稀見朱戶似癡似醉暗消損凭欄  
情緒澹暮色看盡棲鴉亂舞

杜詩回塘  
澹暮色

### 感皇恩

大石

露柳好風標嬌鶯能語獨占春光最多處淺  
噸深笑未肯等閑分付爲誰心子裏長長苦  
洞房見說雲深無路憑仗青鸞道情素

麗情  
集云

青鸞既許  
傳消息

酒空歌斷

杜詩云寧  
空又老畏  
歌聲斷

又被

濤江催去

韓愈有觀濤江詩

怎柰向言不盡愁無數

周易書不盡言不盡意

虞美人 正宮

三首

燈前欲去仍留戀腸斷朱扉遠未須紅雨洗

香腮待得薔薇花謝便歸來

賈島詩薔薇花謝秋風起

舞腰歌版閑時按

李賀詩又試問酒旗

一任傍

人看金爐應見舊殘煤

古春詞云金爐煙裊煤殘

莫使

恩情容易似寒灰

郭象注曰死灰亦然寂寞無情

第二

踈籬曲徑田家小雲樹開清曉天寒山色有

[illegible]

野外一聲鐘起送孤蓬

添衣策馬尋亭候愁抱惟宜酒  
□□□□□□

蒲睡鴨占陂塘

縱被行人驚散又成雙

第三

玉觴纔掩朱絃悄彈拍壺天曉

壺公入調有天中李白詩  
回頭猶認倚牆花只

向小橋南畔便生涯

銀蟾依舊當窻滿  
徐陵雜似曲秋云  
月歌顧影魂先

斷淒風猶颭半殘燈擬倩今宵歸夢到雲屏

詳註周美成詞片玉集卷之十


終

--	--	--	--	--	--	--	--	--	--	--

宛委別藏

樵歌

臺灣商務印書館發行



書中首葉印章集印於此



樵歌上

朱希真

聒龍謠

肩拍洪崖手攜子晉夢裏暫辭塵宇高步層霄俯人間  
如許算蝸戰多少功名問蟻聚幾回今古度銀潢展盡  
參旗桂花淡月飛去天風紫玉樓斜舞萬女蛺袖光  
搖金縷明廷燕闥倚青冥回顧過瑤池重借雙成就楚  
岫更邀巫女轉雲車指點虛無引蓬萊路

又

憑月攜簫遡空東羽夢踏絳霄仙去花冷街榆悄中天

風露並眞官。藥珮芬芳。望帝所紮雲容與。享鈞天九奏。  
傳觴聽龍嘯。看鸞舞。驚塵世。悔平生。歎萬感千恨。誰  
憐深素。羣仙念我好。人間難住。勸阿母。偏與金桃教酒。  
呈賸斟瓊醕。醉歸時。手授丹經。指長生路。

雨中花

嶺南  
舊作

故國當年得意。射麋上苑。走馬長楸。對蔥蔥佳氣。赤縣  
神州。好景何曾虛過。勝友是處相留。向伊川雪夜。洛浦  
花朝。占斷狂游。胡塵卷地。南走炎荒。曳裾強學應劉。  
空謔說。螭螭龍卧。誰取封侯。塞雁年年北去。蠻江日日  
西流。此生老矣。除非春夢。重到東周。

水調歌頭

淮陰作

當年五陵下結客占春游紅纓翠帶談笑跋馬水西頭  
落日經過桃葉不管插花歸去小袖挽人留換酒春壺  
碧脫帽醉青樓楚雲驚隴水散雨漂流如今憔悴天  
涯何處可消憂長揖飛鴻舊月不知今夕煙水都照幾  
人愁有淚看芳草無路認西州

又

白日去如箭達者惜分陰問君何苦長抱冰炭利名心  
冀望封侯一品僥倖昇仙三島不死解燒金聽取百年  
曲三歎有遺音會良朋逢美景酒頻斟昔人已矣松

下泉底不如今幸遇重陽佳節高處紅萸黃菊好把醉  
鄉尋澹澹飛鴻沒千古共銷魂

又

和董彌大中秋

偏賞中秋月從古到如今金風玉露相閒別做一般清  
是處簾櫳爭捲誰家弦管不動樂世足歡情莫指關山  
路空使翠蛾顰水精盤鱸魚膾點新橙鴛黃酒軟纖  
手傳觥一作杯任頻斟須待一作惜曉參橫後直到來年今  
夕十二數虧盈未必來年看得似此回明

又

和海鹽尉范行之

平生看明月西北有高樓如今羈旅常歎茅屋暗悲秋

聞說吳松江上有箇垂虹亭好結友漾輕舟記得蓬萊  
路端是舊曾遊 趁黃鵠湖影亂海光浮絕塵勝處合  
是不數白蘋洲何物陶朱張翰勸汝橙壑鱸膾交錯獻  
還酬寄語梅仙道來歲肯同不

又對月  
有感

天宇著垂象日月共回旋因何明月偏被指點古來傳  
浪語修成七寶謾說霓裳九奏阿姊寂寞嬋娟憤激書青  
奏伏願聽臣言 詔六丁驅狡兔屏癡蟾移根老桂種  
在歷歷白榆邊深鎖廣寒宮殿不許姮娥歌舞按次守  
星躔永使無虧缺長對日團圓

又

中秋一輪月只和舊青冥都緣人意須道今夕別般明  
是處登臨開宴爭看吳歌楚舞沈醉倒金尊各自心中  
事悲樂幾般情 燭摧花鶴警露忽三更舞袖未卷已  
見玉繩低轉便西傾認取眼前流景試看月歸何處因  
甚有虧盈我自闔門睡高枕笑浮生

桂枝香

南都  
病起

春寒未定是欲近清明雨斜風橫深閉朱門盡日柳搖  
金井年光自趁飛花緊柰幽人雪添雙鬢謝山攜妓黃  
壚貰酒舊愁慵整 念壯節漂零未穩負九江風笛五

湖煙艇起舞悲歌淚眼自看清影新鶯又向愁時聽把  
人間如夢深省舊溪鷓在尋雲弄水是事休問

水龍吟

放船千里凌波去畧為吳山留顧雲屯水府濤隨神女

九江東注北客蒼顏

一作翩然  
一作蒼然

壯心偏感年華將暮念

伊嵩舊隱巢由故友南柯夢遽如許回首妖氛未掃

問人間英雄何處奇謀報國可憐無用塵昏白羽鐵鎖  
橫江錦帆衝浪孫郎良苦但愁敲桂櫂悲吟梁父淚流  
如雨

又

曉來極目同雲暖空降雪花零亂平生塵想老來俗狀  
都齊驚散玉鳳凌霄素虬橫海一盃相勸任霓裳學舞  
梅妝作面終不似天裁剪正是年華美滿鬪迎春巧  
飛釵燕衝寒醉眼倚空長揖羣仙笑粲說道瑤池有人  
來報西真開宴便爭先

一作回

藥佩高馳羽駕卷東風轉

### 念奴嬌

見梅驚笑問經年何處收香藏白似語如愁却問我何  
苦紅塵久客觀裏栽桃仙家種杏到處成疎隔千林無  
伴澹然獨傲霜雪且與管領春回孤標爭肯接雄蜂  
雌蝶豈是無情知受了多少淒涼風月寄隴驛

一作驛

程遙



和羹心在忍使芳塵歇溪邊一作東風寂寞可人憐一作憐誰為攀折

又月

插天翠柳被何人推上一輪明月照我藤牀涼似水飛入瑤臺瓊闕霧冷笙簫風輕環佩玉鎖無人掣閑雲收盡海光天影相接誰信有藥長生素娥新煉就飛霜凝雪打碎珊瑚爭似看仙桂扶疎橫絕洗盡凡心滿身清露冷浸蕭蕭髮明朝塵世記取休向人說

又

晚涼可愛是黃昏人靜風生蘋葉誰做秋聲穿細柳初

聽寒蟬淒切旋採芙蓉重重沈水暗裏香交徹拂開冰  
簾小牀獨卧明月 老來應免多情還因風景好愁腸  
重結可惜良宵人不見角枕蘭衾虛設宛轉無眠起來  
閑步露草時明滅銀河西去畫樓殘角鳴咽

又

老來可喜是歷徧人間諳知物外看透虛空將恨海愁  
山一時按碎免被花迷不為酒困到處惺惺地飽來覓  
睡睡起逢場作戲 休說古往今來乃翁心裏沒計許  
許字無多般事也不鮑仙不佞佛不學棲棲孔子懶共賢  
爭從教他笑如此只如此雜劇打了戲衫脫與猷底

又

約友中秋游長橋觀倅邦式不預作念奴嬌和其韵

素秋天氣是登山臨水昔人悲處我遇清時無箇事好  
約鶯遷鴻翥旋整蘭舟多攜芳醞笑裏帆輕舉松江纜  
月望雲飛擢延佇別乘文雅風流新詞光萬丈珠連  
錦聚恨不同游指浩渺玉宇瓊樓相付桂子收香蟾輝  
採露暫輟尊前舞絲囊封寄倩他雙翠街去

又

楊子安侍郎壽

臘回春近正日添宮綫香傳梅駟玉律冰壺此際值一作  
顯天與奇才英識貫日孤忠凌雲獨志曾展回天力功  
名由命等閒却鍛鸞翮誰信夫子如今眠雲情意穩

風塵機息邂逅初心得計處伊水鷗閑波碧但恐天教  
經綸緣在未遂紫煙客君王圖舊看公歸覲京國

又

垂虹亭

放船縱櫂趁吳江風露平分秋色帆卷垂虹波面冷初  
落蕭蕭楓葉萬頃瑠璃一輪金鑑與我成三客碧空寥  
廓瑞星銀漢爭白深夜悄悄魚龍靈旗收暮靄天光  
相接瑩澈乾坤全放出疊玉層冰宮闕洗盡凡心相忘  
塵世夢想都銷歌胷中雲海浩然酒浸明月

蘇武暢

枕海山橫陵江潮去雉堞秋風殘照閑尋桂子試聽菱

歌湖上晚來涼好幾處蘭舟採蓮遊女歸去隔花相惱  
奈長安不見劉郎已老暗傷懷抱誰信得舊日風流  
如今憔悴換却五陵年少逢花倒趂過酒堅辭常是懶  
歌慵笑除奉天威掃平狂虜整頓乾坤都了共赤松攜  
手重期一作騎明月再遊蓬島

木蘭花慢

折芙蓉弄水動玉珮起秋風正柳外閑雲溪頭淡月映  
帶疏鐘人間歡謫墮久恨蛺蝶旌未返碧樓空且與時人  
度日自憐懷抱誰同當時種玉五雲東露冷夜耕龍  
念瑞草成畦瓊蔬未採人照一作塵染衰容誰知素心未已

望清都絳闕有無中寂寞歸來隱几夢聽長樂晨鐘  
云夢聽帝

樂冲融

又

和師厚  
文季  
中作  
司馬

指滎河駿嶽鎖胡塵幾經秋歎故苑花空春游夢冷萬  
斛堆愁簪纓散關塞阻恨難尋杏館覓瓜疇悽慘年來  
歲往斷鴻去燕悠悠拍幽化碧海西頭劒履問誰收  
但易水歌傳子山賦在青史名留吾曹鏡中看取且狂  
歌載酒古揚州休把霜髯老眼等閒清淚空流

洞仙歌

今年生日慶一百省歲喜趁燒燈作歡會問先生有甚

陰德神丹霜雪裏鶴在青松相似 總無奇異處只是  
天然冷淡尋常舊家計戲綵袖弄明珠滿眼兒孫一壺  
酒向花間長醉且落魄裝个老人星共野叟行歌太平  
時世

又

贈太  
易

風流老峭負不羣奇表彈走一作指超凡怎由教把俗儒  
故紙推向一邊三界外尋得一場好笑 塵緣無處趣  
應見宰官苦行公心衆難到這功名富貴有也尋常管  
做得越古超今神妙待接得衆生摠成佛向酒肆淫房  
再逞年少

又

梅紅

何人不愛是江梅紅綻雪野寒空凍雲晚照清溪綽約  
粉豔先春包絳萼姑射冰肌自暖上林花萬品都借  
風流國色天香任欣羨共素娥青女一笑相逢人不見  
悄悄霜宮月殿想乘雲長在玉皇前粲藥珮明璫侍清  
都燕

滿庭芳

鵬海風波鶴巢雲水夢殘身寄塵寰老來窮健無悶也  
無歡隨分飢食困睡渾忘了秋熱春寒清平世閑人自  
在乘興訪溪山漁竿要老伴浮江載酒艤櫂觀瀾倩



輕鷗假道白鷺隨軒直到垂虹亭上驚怪我却作仙官  
中秋月披襟四顧不似在人間

又

花滿金盆香凝碧帳小樓曉日飛光有人相伴開鏡點  
新妝臉嫩瓊肌省粉眉峯秀波眼宜長雲鬟就玉纖澣  
水輕笑換明璫檀郎猶恣意高歌鳳枕慵下銀牀問  
今日何處鬪草尋芳不管餘醒未解扶頭酒親捧瑤觴  
催人起雕鞍翠幃來露看姚黃

滿江紅

大熱卧疾浸石  
種蒲強作涼想

竹翠陰森寒泉浸幾峯奇石銷畏日溪蒲呈秀水蕉供

碧筠簾平鋪光欲動紗稠高挂空無色似月明蘋葉起  
秋風瀟湘白 不敢笑紅塵客爭肯羨神仙宅且披襟  
脫帽自適其適靖節窗風猶有待本初朔飲非長策怎  
似我心閒便清涼無南北

風流子

吳越東風起江南路芳草綠爭春倚危樓縱目繡簾初  
捲扇邊寒減竹外花明看西湖畫船輕泛水茜幄穩臨  
津嬉游伴侶兩兩攜手醉回別浦歌過南雲 有客愁  
如海江山異舉目暗覺傷神空想故園池閣卷地煙塵  
但且恁痛飲狂歌欲把恨懷開解轉更銷魂只是皺眉

彈指冷過黃昏

望海潮

丁酉西內成鄉人請作望幸曲

嵩高維嶽圖書之淵西都二室三川神鼎定金麟符刻  
玉英靈未稱河山誰再整乾坤是挺生真主浴日開天  
御歸梁苑駕回汾水鳳樓間昇平運屬當千眷凝旒  
暇日四顧依然銀漢詔虹瑤臺賜碧一新瑞氣祥煙重  
到帝居前怪鵲橋龍闕飛下人間父老懽呼翠華來也  
太平年

勝勝慢雪

紅鑪圍錦翠幄盤雕樓前萬里同雲青雀窺窗來報瑞

雪紛紛開簾放教飄灑度華筵飛入金尊鬪迎面看美人呵手旋浥羅巾莫說梁園往事休更羨越溪訪戴幽人此日西湖真境聖治中興直須聽歌按舞任流香滿酌杯深最好是賀豐年天下太平

芰荷香

金陵

遠尋花正風亭霽雨煙浦移沙緩提金勒路擁桃葉香車憑高暢

一作帳

飲照羽觴晚日橫斜六朝浪語繁華山

圍故國綺散餘霞無奈尊前萬里客歎人今何在身老天涯壯心零落怕聽疊鼓摻撾江浮醉眼望浩渺空想靈槎曲終淚濕琵琶誰扶上馬不省還家

沁園春

辭會

七十衰翁告老歸來放懷縱心念聚星高宴圍紅盛集  
如何著得華髮陳人勉意追隨強顏陪奉費力勞神恐  
未真君休怪近頻辭雅會不是無情 巖扃舊菊猶存  
更松偃梅疎新種成愛靜窗明几焚香燕坐閒調綠綺  
默誦黃庭蓮社輕輿雪溪小櫂有興何妨尋弟兄如今  
且趁花迷酒困心迹雙清

卜算子

憑高望遠雲斷路迷山簇暮寒淒緊蘭菊如斯燕子怎  
知秋盡想閨中錦換新翻暈自解佩忽忽散後鴛鴦到

今難問 只得愁成病是悔上瑤臺悞留金枕不忍相  
忘萬里再尋音信奈飄風不許蓬萊近又一番凍雨淒  
涼送歸鴻成陣

醉春風

夢仙

夜飲西真洞羣仙驚戲弄素娥傳酒袖凌風送送送吸  
盡金波醉朝天闕鬬班星拱 碧簡承新寵紫微恩露  
重忽然推枕草堂空夢夢夢帳冷衾寒月斜燈暗畫樓  
鍾動

踏歌

燕闌散津亭鼓吹扁舟發離魂黯黯隱隱陽關徹更風愁

雨細添淒切 恨結歎良朋雅會輕離缺一年價把酒  
風花月便山遙水遠分吳越 書倩雁夢借蝶重相見  
且把歸期說只愁到他日彼此萍蹤別總難如前會時  
節

鵲橋仙

溪清水淺月朧煙淡玉破梅梢未遍橫枝纖瘦有如無  
但空裏疎花數點

一本云橫枝依約影如無但風裏空香數點

乘風欲去

凌波難住誰見紅愁粉怨夜深青女濕微霜暗香散廣  
寒宮殿

又

十月  
黃菊

今年冬後黃花初綻莫怪時光較晚曉來玉露浥芳叢  
瑩秀色無塵到眼 枝筇駐屐徘徊籬畔弄酌金杯自  
泛須添羅幕護風霜要留與疎梅相見

又

姮娥怕開銀蟾傳令且與遮鸞翳鳳直須人睡俗塵清  
放雲霧一作漢冰輪徐動 山翁散髮披衣松下琴奏瑤  
池新弄曲終鶴警露華寒笑浮一作濁世饒君一作伊做夢

又

攜琴寄鶴辭山別水乘興隨雲做客囊中欲試紫金丹  
待點化鸞紅鳳碧 誰知到此玉梯無路天上難通消



信一作

息不如知趁白

一作舊

雲歸免誤使山英掃迹

又

康州同子權兄弟飲梅花下

竹西散策花陰圍坐可恨來遲幾日披香不覺玉壺空  
破酒面飛紅半溼悲歌醉舞九人而已總是天涯倦

客東風分

一作次

淚故園春問我輩如何

一作何時

去得

又

和李易安金魚池蓮

白鷗欲下金魚不去圓葉低開蕙帳輕風冷露夜深時  
獨自箇凌波直上幽蘭

一作闌

共挽

一作晚

明璫難寄塵

世教誰將傍會尋織女趁靈槎泛舊路銀河萬丈

臨江仙

西子溪頭春到也大家追趁芳菲盤雕剪錦換障泥花  
添金鑿落風展玉東西光探誰家梅最早雪兒桂子  
同攜別翻舞袖按新詞從今排日醉醉過牡丹時

又

堪笑一場顛倒夢元來恰似浮雲塵勞何事最相親今  
朝忙到夜過臘又逢春流水滔滔無住處飛光忽忽  
西沈世間誰是百年人箇中須著眼認取自家身

又

直自鳳皇城破後擘釵破鏡分飛天涯海角信音稀夢  
回遼海北魂斷玉關西月解重圓星解聚如何不見

人歸今春還聽杜鵑啼年年看塞雁二十四番回

又  
中秋

最好中秋秋夜月常時易雨多陰難逢此夜更無雲玉  
輪飛碧落銀幕換層城桂子香濃凝瑞露中興氣象  
分明酒樓燈市管絃聲今宵誰肯睡醉看曉參橫

又

生長西都逢化日行歌不記流年花間相過酒家眠乘  
風游二室弄雪過三川莫笑衰容雙鬢改自家風味  
依然碧潭明月水中天誰知閒老子不肯作神仙

又

紗帽籃輿青織蓋  
兜孫從我嬉遊綠池紅徑雨初收  
穠桃偏會笑細柳幾曾愁  
隨分盤筵供笑語花間社酒  
新醪踏歌起舞醉方休  
陶潛能嘯傲賀老最風流

又

幾日春愁無意緒  
撚金剪綵慵拈小樓終日怕凭闌  
一雙新淚眼千里舊關山  
苦恨碧雲音信斷只教征雁  
空還早知盟約是虛言  
枉裁詩字錦悔寄淚痕牋

又

信取虛空無一物  
箇中著甚商量風頭緊後白雲忙  
風元無去住雲自沒行藏  
莫聽古人閑語話終歸失馬

亡羊自家腸肚自端詳一齊都打碎放出大圓光

鷓鴣天

草草園林作洛川碧宮紅塔借風煙雖無金谷花能笑  
也有銅駝柳解眠春似舊酒依前何妨倚杖雪垂肩  
五陵俠少今誰健似我親逢建武年

又歲暮

檢盡歷頭冬又殘愛他風雪耐他一作忍些寒拖條筇一作竹  
杖家家酒上箇籃輿處處山添老大合一作轉癡頑謝  
天教我老來閑道人還了鴛鴦債紙帳梅花醉夢間

又西都作

我是清都山水郎天教嬾慢帶

一作分付與

疎狂曾批給露

一作雨

又風敕

一作奏

累奏

一作屢上

留雲借月章

詩萬首醉

千場

一作十觴酒

幾曾著眼向

一作看

侯王玉樓金闕慵歸去

且挿梅花住

一作醉

洛陽

又

唱得梨園絕代聲前朝唯數李夫人自從驚破霓裳後

楚奏吳歌扇裏新

秦嶂雁越溪砧西風北客兩飄零

尊前却

一作忽

聽當時曲側帽停盃淚滿巾

又

曾為梅花醉不歸佳人挽袖乞新詞輕紅遍寫鴛鴦帶

濃碧爭斟翡翠卮 人已老事皆非花前不飲淚沾衣  
如今但欲闔門睡一任梅花作雪飛

又

畫舫東時洛水清別離心緒若為情西風挹淚分攜後  
十夜長亭九夢君 雲背水雁回汀只應芳草見離魂  
前回共採芙蓉處風自淒淒月自明

又

竹粉吹香杏子丹試新紗帽紵衣寬日長几案琴書靜  
地僻池塘鷗鷺閑 尋汗漫聽潺湲澹然心寄水雲間  
無人共酌松黃酒時有飛仙暗往還

又許總管  
席上

至節先庚欲雪天玳筵圍錦帳青氍毹姚副帥招佳客  
太守高明別乘賢歌宛轉舞蹁躑金釵十二擁嬋娟  
老人南極星邊住也趁梅花聽管絃

又正月十四夜

鳳燭星毬初試燈冰輪展破碧棱層來宵雖道十分滿  
未必勝如此夜明留上客換瑤觥任教樓外曉參橫  
春風從舊偏憐我那更姮娥是故人

又

通處靈犀一點真快隨紫橐步紅茵箇中自是神仙住



花作簾櫳玉作人 偏淡靜最尖新等閑舞雪振歌塵  
若教宋玉尊前見應笑襄王夢裏尋

又酒

天上人間酒最尊非甘非苦味通神一盃能變愁山色  
三盞全迴冷谷春 歡後笑怒時嗔醒來不記有何因  
古詩有道陶元亮解道君當恕醉人

又酒

有個仙人捧玉卮滿斟堅勸不須辭瑞龍透頂香難比  
甘露澆心味更奇 開道域洗塵機融融天樂醉瑤池  
霓裳拽住君休去待我醒時更一盃

又虛舟

不繫虛舟取性顛浮河汎海不知年乘風安用青帆引  
逐一作送浪何須錦纜牽雲薦枕月鋪氈無朝無夜任  
橫眠太虛空裏知誰管有個明官喚做天

又

極目江湖水浸雲不堪回首洛陽春天津暢飲凌雲客  
花市行歌絕代人穿繡陌踏香塵滿城沈醉管絃聲  
如今遠客休惆悵飽向皇都見太平

樵歌上

樵歌中

朱希真

木蘭花

老後人間無處去多謝碧桃留我住紅塵回步舊煙霞  
清境開扉新院宇 隱几日長香一縷風散飛花紅不  
聚眼前尋見自家春罷問玉霄雲海路

又

探梅寄  
李士舉

前日尋梅椒樣綴今日尋梅蜂已至乍開絳萼欲生香  
略綻粉苞先有意 故人今日升沈異定是江南無駟  
使自調絃管自開尊笑把花枝花下醉

驀山溪

鄰家相喚酒熟閑相過竹逕引籃輿會鄉老吾曹幾箇  
沈家姊妹也是可憐人回巧笑發清歌相間花間坐  
高談闊論無可無不可幸遇太平年好時節清明初破  
浮生春夢難得是歡娛休要勸不須辭醉便花間卧

又

瓊蔬玉蘂久寄清虛裏春到碧溪東下白雲尋桃問李  
彈簧吹葉懶傍少年場遺楚珮覓秦簫踏破青鞵底  
河橋酒熟誰解留儂醉兩袖拂飛花空一春淒涼憔悴  
東風誤我滿帽洛陽塵喚飛鴻遮落日歸去煙霞外

又

西真姊妹只這梅花是乘醉下瑤池粉胭脂何曾梳洗  
水姿素豔無意整羣芳獨自笑有時愁一點心難寄  
雪添藥珮霜護盈盈淚塵世悔重來夢淒涼玉樓十二  
教些香去說與惜花人雲黯澹月朦朧今夜誰同睡

又

夜來雨過桃李將開遍策杖引兒童也學人隨鶯趁燕  
青天許大多少好風光一歲去一春來只恁空撩亂

西池瓊苑遊賞人何限玉勒擁朱輪各覩

一作  
騁

些新歡

舊怨都齊醉也說甚是和非我笑他他不覺花落春風

晚

又

元來塵世放著希奇事行到路窮時果別有真山真水  
登臨任意隨步白雲生三秀草九花藤滿裏瓊瑤蕊  
何須趨老浩蕩心常醉唱个快活歌更說甚黃梁夢裏  
蒼顏華髮只是舊時人不動步却還家處處新桃李

又

東風不住幾陣黃梅雨風外曉鶯聲怨飄零花殘春暮  
鴛鴦散後供了十年愁懷舊事想前懽忍記丁寧語  
塵昏青鏡休照孤鸞舞煙鎖鳳樓空問吹簫人今何處

小窗驚夢攜手似平生陽臺路行雲去目斷山無數

又

和人冬至韵

西江東去總是傷時淚北陸日初長對芳尊多悲少喜  
美人去後花落幾春風杯謔洗人難醉愁見飛灰細  
梅邊雪外風味猶相似迤邐暖乾坤仗君王雄風英氣  
吾曹老矣端是有心人追劔履辭黃綺珍重蕭生意

朝中措

先生饒病老難醫赤米厭晨炊自種畦中白菜淹成甕  
裏黃虀肥葱細點香油慢炒湯餅如絲早晚一盃無  
害神仙九轉休癡

又

先生筇杖是生涯  
挑月更擔花  
把住都無憎  
愛放行總是煙霞  
飄然攜去旗亭問  
酒蕭寺尋茶  
恰似黃鸝無定  
不知飛到誰家

又

當年挾彈五陵間  
行處萬人看  
雪獵星飛羽箭  
春遊花簇雕鞍  
飄零到此天涯  
倦客海上蒼顏  
多謝江南蘇小  
尊前怪我青衫

又

上元席上和趙  
智天時小雨

東方千騎擬三河  
燈夕試春羅  
想是蟾宮高會  
暫留暮



雨姮娥 使君燕喜王孫賦就桃葉秋波弱柳移來嬌  
舞落梅換了行歌

又

閑愁無奈指頻彈芳景為誰殘可惜良宵虛過且容草  
艸謀歡 招要楚雨留連漢珮多謝青鸞濃豔暗香爭  
暖羅帷不用遮寒

又

元宵初過少吹彈樓角綵燈殘踏雪閑尋深院攜壺試  
覓幽歡 麻姑暫語文君未寢五老雙鸞要共梅花同  
曉薄羅不奈春寒

又曉起  
看雪

夜來聽雪曉來看驚失却塵寰搖撼瓊林玉樹心疑身  
是仙官 乘風縹緲凌空逕去不怕高寒却被孤鴻相  
勸何如且在人間

又

新來省悟一生癡尋覓上天梯拋失眼前活計踏翻暗  
裏危機 莫言就錯真須悔過休更遲疑要識天蘇陀  
味元來只是黃蘗

又

登臨何處自消憂直北看揚州朱雀橋邊晚市石頭城

下新秋 昔人何在悲涼故國寂寞潮頭箇是一場春  
夢長江不住東流

又

胷中塵土久無奇今夕借清輝歌縱羣英諸彥舞狂蕙  
帶荷衣 鴛鴦湖上波平岸遠酒釀魚肥好是中秋圓  
月分明天下人知

又

紅稀綠暗掩重門芳徑罷追尋已是老如前歲那堪窮  
似他人 一杯自勸江湖倦客風雨殘春不是酴醾相  
伴如何過得黃昏

足拍醜奴兒

水仙

清露濕幽香想瑤臺無語淒涼飄然欲去依然似夢雲  
度銀潢 又是天風吹澹月珮丁東攜手西廂泠泠玉  
磬沈沈素瑟舞徧霓裳

醉落魄

泊舟津頭有感

海山翠疊夕陽殿雨雲堆雪鷓鴣聲裏蠻花發我共扁  
舟江上雨萍葉 東風落酒愁難說誰教春夢分胡越  
碧城芳草應銷歇曾識劉郎唯有半彎月

醉思仙

淮陰與楊道字

倚晴空正三洲下葉七澤收虹歎年光催老身世飄蓬

南歌客新豐酒但萬里雲水俱東謝故人解繫船訪我  
脫帽相從 人世歡易失尊俎且更從容任酒傾波碧  
燭剪花紅君向楚我歸秦便分路青竹丹楓恁時節謾  
夢憑夜蝶書倩秋鴻

感皇恩

游口口  
園感舊

曾醉武陵溪竹深花好玉珮雲鬟共春笑主人好事坐  
客雨中風帽日斜青鳳舞金尊倒 歌斷渭城月沈星  
曉海上歸來故人少舊遊重到但有夕陽衰草恍然真  
一夢人空老

又

早起未梳頭小園行徧拄杖穿花露猶泣菊籬瓜畹最  
喜引枝添蔓先生獨自笑流鶯見 著意訪尋幽香國  
豔千里移根未為遠淺深相間最要四時長看羣芳休  
怪我歸來晚

又

一箇小園兒兩三畝地花竹隨宜旋裝綴槿籬茅舍便  
有山家風味等閑池上飲林間醉 都為自家胃中無  
事風景爭來趁游戲稱心如意剗活人間幾歲洞天誰  
道在塵寰外

杏花天

挂簾等月闌干曲厭永晝勞煙一作煙勞倦局單衣汗透鮫  
綃縮脫帽梳犀枕玉移牀就碧柳翠竹寄語倩姮娥  
伴宿輕風淡露清涼足雲綴銀河斷續

又

聽蟬剪葉迎秋燕畫戟散金鋪開徧清風占住秦箏怨  
樓上衙牌易晚飛雨過繡幕盡卷借水沈龍涎旋碾  
金盃弄水停歌扇涼在冰肌粉面

又

殘春庭院東風曉細雨打鴛鴦寒峭花尖望見秋千了  
無路踏青鬪草人別後碧雲信杳對好景愁多歡少

等他燕子傳音耗紅杏開也未到

戀繡衾

木落江南感未平兩蕭蕭衰鬢到今甚處是長安路水  
連空山鎖暮雲老人對酒今如此一番新殘夢暗驚  
又是灑黃花淚問明年此會怎生

青玉案

坐上和智  
夫瑞香

芝房並蒂空稱瑞幾曾見香旖旎也不論蘭休比蕙王  
孫高韵說得的當不減唐諸李今朝影落瓊杯裏共  
才子佳人鬪高致莫道衰翁都無意為他丰韻為他情  
味消得真箇醉



又 沈蕙  
乞詞

住近沈香浦門前蕙草春  
鴛鴦飛下柘枝新見弄青梅  
初著翠羅裙怕喚拈歌扇  
嫌催上舞裯幾時微步不  
生塵來作維摩方丈散花人

蘇幕遮

瘦仙人窮活計不養丹砂  
不肯參同契兩頰家食三覺  
睡閉著門兒不管人閑事  
又經年知幾歲老屋穿空  
幸有天遮蔽不飲香醪  
常似醉白鶴飛來笑我顛顛地  
又

酒臺空歌扇去獨倚危樓  
無限傷心處芳草連天雲薄

暮故國山河一陣黃梅雨 有奇才無用處壯節飄零  
受盡人間苦欲指虛無問征路回首風雲未忍辭明主

浪淘沙

中秋陰雨同顯忠椿  
年諒之坐寺門作

圓月又中秋南海西頭蠻雲瘴雨晚難收北客相逢彈  
淚坐合恨分愁 無酒可消憂但說皇州天家宮闕酒  
家樓今夜只應清汴水嗚咽東流

又

康州  
泊船

風約雨橫江秋滿蓬窓箇中物色儘淒涼更是行人行  
未得獨繫歸航一作 擁被換殘香黃卷堆牀開愁展  
恨剪思量伊是浮雲儂是夢休問家鄉

又

白菊好開遲冷蝶空迷沾風惹露也隨時何事深藏偏  
在後天性難移 陶令最憐伊同病相醫寒枝瘦葉更  
栽培直待羣芳零落後獨殿東籬

千秋歲

貫方七月五  
日生日為壽

占秋呈瑞四海楊公子踏拖尚帶蓬壺體清新春艸句  
蕭灑蘭亭字宦情少眠雲弄月知心事 此去應無滯  
穩步煙霄地鵬萬里鶴千歲他年黃閣老訪我清溪醉  
看鳳舞貽君萬斛瑤花菜

定風波

紅藥花前欲送春  
金鞭柘彈趁芳塵  
故傍繡簾按柳綫  
恰見淡梳妝  
映瘦腰身閒倚金鋪書  
悶字尤殢為誰  
憔悴減心情  
放下彩毫勻粉淚  
彈指你不知  
人是不知人

踏莎行

太易生

梅倚江娥日舒宮  
綫老人星喚羣仙  
宴泛杯王友  
暖飛浮堆盤金橘  
光零亂聽命寬  
心隨緣適願  
癡狂羸取身長  
健醉中待

一作等

看碧桃春尊前  
莫問蓬萊淺

又

送子權赴藤

花漲藤江草  
薰鴨步錦帆  
蘭棹分風去  
二翁元是一溪

雲暫為山北山南雨 綠酒多斟白鬚休 覩飛丹約定  
煙霞侶與君先占赤城春 回撓早趁桃源路

夢玉人引

和祝  
舜俞

浪萍風梗寄人間 倦為客夢裡瀛洲姓名誤 題仙籍斂  
翮翅一作歸來愛小園 蛻籜簪篸碧新種幽花戒兒童休  
摘 放懷隨分各逍遙 飛鷄等鵬翼舍此蕭閑問君攜  
杖安適諸彥羣 英詩酒皆勍敵 太平時向花前不醉如  
何休得

一落索

一夜雨聲連曉 青鐙相照 舊時情緒此時心 花不見人

空老 可惜春光閒了陰多晴少江南江北水連雲問  
何處尋芳草

又

慣被好花留住蝶飛鶯語少年場上醉鄉中容易放春  
歸去 今日江南春暮朱顏何處莫將愁緒比飛花花  
有數愁無數

漁家傲

誰轉琵琶彈側調征塵萬里傷懷抱客散黃昏庭院悄  
燈相照春寒燕子歸來早 可惜韶光虛過了多情  
人已非年少只恐鶯啼春又老知音少人間何處尋芳草

又

石夷仲一姬去念  
之止小妓燕燕

鑑水稽山塵不染歸來賀老身  
强健有客跨鯨游汗漫  
留羽扇玉船取酒青鸞勸  
莫恨飛花容易散仙家風  
月何曾減春色一壺丹九轉堪為伴  
雕梁幸有輕盈燕

又

畏暑閑尋湖上徑  
雨絲斷送涼成陣  
風裡芙蓉斜不整  
沈紅影約回萍葉波心靜  
催喚吳姬迎小艇  
妝花燭燄明相映  
飲到夜闌人却醒  
風雨定欲歸更把闌干凭

望江南

炎晝永初夜月侵牀  
露卧一叢蓮葉畔  
芙蓉香細水風

涼枕上是仙鄉

浮世事能有幾多長白日明朝依舊

在黃花昨夜

一作非晚

是重陽不用苦思量

### 十二時

雲連芳草天連晚照山連紅葉

一作天晚

連雲衰艸連照連山紅葉西風

正搖落更前溪鳴咽

燕去鴻歸音信絕問黃花又共

誰折征人最愁處送寒衣時節

### 南鄉子

宮樣細腰身玉帶羅衫穩試新小底走來宣對御催頻  
曲殿西廂小苑門歌舞鬪輕盈不許楊花上錦茵勸  
得君王真箇醉承恩金鳳紅袍印粉痕



又

風雪打黃昏別殿無人早閉門拜了天香羅裏冷低顰  
催減銀鐙解繡裙金鴨卧殘薰看破屏風數淚痕回首  
昭陽天樣遠銷魂又過梅花一番春

行香子

寶篆香沈錦瑟塵侵日長時懶把金鍼裙腰暗減眉黛  
長顰看梅花過梨花謝柳花新春寒院落燈火黃昏  
悄無言獨自銷魂空彈粉淚難託清塵但樓前望心頭  
想夢中尋

憶帝子

元來老子曾垂教。挫銳和光。為妙因甚。不聽他強要爭。  
工巧只為忒惺惺。惹盡閑煩惱。你但莫多愁。早老你。  
但且不分不曉。第一隨風便倒。拖第二君言。亦大好管。  
取没人嫌。便總道先生俏。

桃源憶故人

飄蕭我是孤飛雁。不共紅塵結怨。幾度蓬萊清淺。側翅  
曾傍看。有時飛入西真院。許趁風光流轉。玉蕊花開  
徧。可惜無人見。

又

小園雨霽秋風

一作光

轉天氣微寒。猶暖黃菊紅蕉庭院。

翠徑苔痕軟 眼前明快眉間展  
細酌霞觴不淺一曲  
廣陵彈徧目送飛鴻遠

又

雨斜風橫香成陣春去空留春恨  
歡少愁多因甚燕子  
渾難問 碧尖蹙損眉慵  
暈淚濕胭脂紅沁  
可惜海棠  
吹盡又是黃昏近

又

西樓幾日無人到依舊綠圍紅  
遠一作紅樓下落花誰  
掃不見長安道 碧雲望斷無音  
耗倚徧闌干殘照試  
問淚彈多少濕徧樓前草

又

誰能留得朱顏住枉了百般辛苦爭似蕭然無慮任運  
隨緣去 人人放著逍遙路只怕君心不悟彈指百年  
今古有甚成虧處

又

玉笙吹徹清商後寂寞弓彎舞袖巧畫遠山不就只為  
眉長皺 靈犀望斷星難透立到淒涼時候今夜月明  
如畫人共梅花瘦

好事近

春雨細如塵樓外柳絲黃濕風約繡簾斜去透窓紗寒

碧美人慵剪上元鐙彈淚倚瑤瑟却上紫姑香火問  
遼東消息

又

春雨開元宵花綻柳眠無力風峭畫堂簾幕捲金泥紅  
濕王孫開宴聚嬌饒越山洗愁碧休說鳳皇城裏少  
年時蹤跡

又

子權攜酒與  
弟姪相訪作

驚見老仙來觸目琳琅奇絕打酒道人林下奏醉翁三  
疊接羅傾倒海雲飛物色又催別回棹晚江春雨勝  
剡溪風雪

又清明百七日洛川小飲和駒父

春去尚堪尋莫恨老來難却且趁禁煙百七醉殘英餘  
萼坐間玉潤賦妍辭情語見真樂引滿癭盃竹盞勝  
黃金鑿落

又漁父詞

搔首出紅塵醒醉更無時節活計綠蓑青笠慣被霜衝  
雪晚來風定釣絲閑上下是新月千里水天一色看  
孤鴻明滅

又

眼裏數閑人只有釣翁蕭洒已佩水仙空印惡風波不

怕此心那許世人知名姓是虛假一棹五湖三島任  
船兜兜要

又

漁父長身來只共釣竿相識隨意轉船回櫂似飛空無  
跡蘆花開落任浮生長醉是良策昨夜一江風雨都  
不曾聽得

又

撥轉釣魚船江海儘

一作盡

為吾宅恰向洞庭沽酒却錢

塘橫笛醉顏禁冷更添紅潮落下前磧經過子陵灘  
畔得梅花消息

又

短棹釣船輕  
江上晚煙籠  
碧塞雁海鷗分路占江天  
秋色錦鱗撥刺滿  
籃魚取酒價相敵  
風順片帆歸去有  
何人留得

又

猛向這過來得箇信音  
端的天與一輪釣綫領煙波  
千億紅塵今古轉  
船頭鷗鷺已陳迹  
不受世間拘束任  
東西南北

又  
茶

綠汎一甌雲  
留住欲飛胡蝶相對夜深花下洗蕭蕭風



月從容言笑醉還醒爭忍便輕別只願主人留客更  
重斟金葉

又

失却故山雲索手指空為客萼菜鱸魚留我住鴛鴦湖  
側偶然添滿一作酒舊蒨蘆小醉度朝夕吹簫月波樓

下有何人相識

又

深住小溪春好在柳枝桃葉風淡水軒人靜數教雙飛  
胡蝶日長時有一鶯啼蘭佩為誰結消散舊愁新恨  
泛琴心三疊

又

我不是神仙不會鍊丹燒藥只是愛閑湛酒畏浮名拘  
縛種成桃李一園花真處怕人覺受用現前活計且  
行歌行樂

長相思

昨日晴今日陰樓下飛花樓上雲闌干雙淚痕江南  
人江北人一樣春風兩樣情晚寒潮未平

又

海雲黃橘洲霜如箭灘流石似羊溪船十丈長人難  
量水難量過險方知著甚忙歸休老醉鄉

烏夜啼

剪勝迎春後和風入律頻催前回下葉飛霜處紅綻一枝梅  
正遇時調玉燭須添酒滿金杯尋芳伴侶休閑  
過排日有花開

沙塞子

萬里飄零南越山引淚酒催一作添愁不見鳳樓龍闕又

經一作驚秋 九日江亭閑望蠻樹口瘴煙一作雲浮腸斷

紅蕉花晚水西流

又

前調太悲再作

蠻徑尋春春早千點雪已舒一作飛梅席地挿花傳酒日

西催 莫作楚囚相泣傾銀漢洗瑤池還盡人間桃李  
拂衣歸

西江月

澹澹薰風庭院青青過雨園林銅駝陌上舊鶯聲今日  
江邊重聽 落帽酒中有趣題橋詩一作裏無心香殘  
沈水縷煙輕花影闌干人靜

又

琴上金星正照硯中鸚眼相青閑來自覺有精神心海  
風恬浪靜 且喜面前花好更聽林外鶯新甕頭清辣  
洞庭春醉裏徐行路穩

又

元是西都散漢江南今日衰翁從來顛怪更心風做盡  
百般無用 屈指八旬將到回頭萬事皆空雲間鴻雁  
草間蟲共我一般做夢

又

窮後常如囚繫老來半似心風飢蚊餓蚤不相容一夜  
何曾做夢 被我不扇不提廓然揔是虛空寺鐘官角  
任西東別弄些兒骨董

又

世事短如春夢人情薄似秋雲不須計較苦勞心萬事

原來有命 幸遇三盃美酒酒一作好 況逢一朵花新片時  
歡笑且相親 明日陰晴未定

又

日日深盃酒滿朝朝小園花開自歌自舞自開懷且喜  
無拘無礙 青史幾番春夢紅塵一作黃泉 多少奇才不須  
計較更一作與 安排領取而今現在

又

正月天饒陰雨江南寒在晨朝嬌鶯聲裏杏花梢暗淡  
綠窻春曉 好夢空留被底一作在 新愁不共香銷小樓  
簾捲路迢迢望斷天涯芳草

又

石夷仲去  
妓復歸

織素休尋往恨攀條幸有前緣隔河彼此事經年且說  
蓬萊清淺障面重新團扇傾鬟再整花鈿歌雲舞雪  
畫堂前長共阿郎相見

樵歌中

木部

丁



樵歌下

朱希真

減字木蘭花

按花弄扇碧鬬遙山眉黛晚白玉闌干倚徧春風翠袖  
寒難尋可見何似一雙青翅燕人瘦春殘芳艸連雲  
日下山

又

尋花攜柰

一作李

紅漾輕舟汀柳外小簇春山溪雨巖雲

不飽帆

相逢心

醉容易堆盤銀燭淚犀筋敲殘痛飲

何言盡酒船

一云痛飲何言犀筋敲殘玉酒船

又

東風無賴

一作桃李

春水綠波花影外載酒尋

一作晉

山被襖

相期落錦帆

吾曹一醉却笑新亭人有淚相對清言

不覺黃昏雨打船

又

閑人行李羽扇芒屨塵世外一疊溪山也解分風送客  
帆時平易醉無復驚心并濺淚長揖忘言回櫂桃花  
插滿船

又

聽琵琶

劉郎已老不管桃花依舊笑要聽琵琶重院鶯啼覓謝

家曲終人醉多似潯陽江上淚萬里東風國破山河  
落照紅

又

慵歌怕酒今日春衫驚著瘦雙燕簾櫳金鴨香沈客淚  
中琵琶重聽誰信人間多少恨落日東風吹得桃花  
滿院紅

又

秋日飲酒香山  
石樓醉中作

古人悞我獨舞西風雙淚墮鵲去無蹤木落西陵迢迢照  
紅人間難住擲下酒盃何處去樓鎖殘鍾  
一作鍾殘山北  
山南兩點鴻  
一作煙

又

無知老子元住漁舟樵舍裏暫借權監持節紆朱我甚  
慚不能者止免苦龜腸憂虎尾身退心閒剩向人間  
活幾年

又

斫魚作鮓酒面打開香可醉相喚同來草草杯盤飲幾  
杯浮生虛假昨日梅花今日謝不醉何為從古英雄  
總是癡

又

今年梅晚懶趁壽陽釵上燕月喚霜催不肯人間取次

開 低鬟掩袂愁寄玉闌金井外粉瘦香寒獨抱深心  
一點酸

又

無人惜我我自慙慙憐這箇耍峭惺惺不肯隨人獨自  
行 乾坤許大只在棘鍼尖上坐依舊多情棲著虛空  
睡到明

又

年衰人老矍鑠支離君莫笑白日青天我自心情勝少  
年 超凡入妙游戲神通隨意到酒聖詩顛舞榭虛空  
駕鐵船

又

虛空無礙你自癡迷不自在撒手但行到處空歌擁路  
迎天然美滿不用些兒心計算莫聽先生引入深山  
百丈坑

又

無人請我我自鋪氊松下坐酌酒栽詩調弄梅花作侍  
兒心歡易醉明月飛來花下睡醉舞誰知花滿紗巾  
月滿盃

又

花隨人去今夜錢塘江上雨宿酒殘更五夜

一作  
潮過

西窓

不肯明 小羅金縷結盡同心留不住何處長亭繡被  
春寒掩翠屏

又

有何不可依舊一枚閑底我飯飽茶香瞌睡之時知上  
牀 百般經過且喜青鞵踏不破小院低窓桃李花開  
春晝長

又

江南春水羅幙黃昏寒未退好箇相知唱到姮娥歛黛  
眉 夜闌人醉風露無情花有淚畫角殘時一片參旗  
紅杏西

點絳脣

淮海秋風冶城飛下揚州葉盡船催發傾酒留君別  
卧倒金壺相對天涯客陽關徹大江橫絕淚溼杯中月

又

客夢初回卧聽吳語開帆索護霜雲薄溪上

一作淡淡

芙蓉

落畫舫無情人去天涯角思量著翠蟬金雀別後新

梳掠

又

至日春雲萬般祥瑞朝來奏太平時時候樂事家家有  
玉指呵寒酥點梅花瘦金杯酒與君為壽只願人長久



又

春雨春風問誰染就江南草燕嬌鶯巧只是參軍老

今古紅塵愁了人多少尊前好緩歌低笑醉向花前一作

間倒

又

綠徑朱闌暖煙晴日春來早自家亭沼不問人尋討

攜酒提籃兒女相隨到風光好醉歌紗帽索共梅花笑

柳梢青

狂蹤浪

一作怪

跡誰料半年

一作老

天涯為客帆展霜風船

隨江月山寒波碧

如今著處添愁怎忍看參

一作魚

西

雁北洛浦鶯花伊川雲水何時歸得

又

丁丑松  
江賞月

松江勝集中秋載酒幽人閑客雲將遲疑桂娥羞澀一  
歡難得 天憐我輩淒涼借萬里晴空湛碧浩浩烟波  
堂堂風月今夕何夕

又

紅分翠別宿酒半醒征鞍將發樓外殘鐘帳前殘燭窗  
邊殘月 想伊繡枕無眠記行客如今去也心下難拚  
眼前難覓口頭難說

又

梅蒸乍熱無處散策芳菲初歇席展涼筩帳垂黃艸天  
然奇絕披襟永晝清風更薦枕良宵皓月一夢遊仙  
軟雲推倒廣寒宮闕

又

季女  
生日

秋光正潔仙家瑞草黃花初發物外高情天然雅致清  
標偏別仙翁笑酌金杯慶兒女團圓喜悅嫁與蕭郎  
鳳皇臺上長生風月

又

水雲晚照浮生了了霜風衰草日月金梭江山春夢天  
多人少赤松認得虛空便一向飛騰縹緲直上蓬瀛

回看滄海淒然長嘯

採桑子

彭浪磯。一云亂後作。

扁舟去作江南客  
旅雁孤雲萬里煙  
塵回首中原淚滿  
巾  
碧山對晚一作相映  
汀洲冷楓葉蘆根  
日落波平愁損

辭鄉去國人

又

重陽病起  
飲酒連夕

天高風勁塵寰靜  
佳節重陽葉下瀟湘  
碧海晴空一陣  
霜  
安排絃管傾芳醞  
報答秋光  
晝短歌長紅燭黃  
花  
夜未央

又

一番海角淒涼夢却到長安翠帳犀簾依舊屏斜十二  
山玉人為我調秦瑟顰黛低鬟雲散香殘風雨蠻溪  
半夜寒

憶秦娥

若無置酒朝元  
亭師厚同飲作

西江碧江亭夜燕天涯客天涯客一杯相屬此夕何夕  
月沈波冷一作殘花冷燭歌聲急秦關漢苑無消息無消息  
戍樓吹角故人難得覓一作覓

又

霜風急江南路上梅花白梅花白寒溪殘月冷村深雪  
洛陽醉裏曾同摘水西竹外常相憶常相憶玉一作寶

釵雙鳳鬢邊春色

又

吳船窄吳江岸上

一作下

長安客長安客驚塵心緒轉蓬

蹤跡 征鴻也是闕河隔孤飛萬里誰相識誰相識三

更月落斗橫西北

又

至節赴郡會赦到

歌鐘列公堂盛會酬佳節酬佳節皇恩宣布早梅爭發  
舞場推鼓催回雪金壺斂酒瓊酥熱瓊酥熱今朝不  
飲幾時懽悅

卜算子

除夕

江上見新年  
夜聽春雨有個人  
人領略春粉淡紅輕  
注 深勸玉壺春  
一作東西低唱金衣  
一作黃金縷撚底梅花揔  
是愁酒盡人歸去

又

陌上雪銷初纔得  
江梅信剪採盤金  
院落香便覺燒鐙  
近 樂事眼前多  
春酒今年勝好趁  
迎梅接柳時滿引  
金杯飲

又

碧瓦小紅樓  
芳草江南岸  
雨後紗窓幾陣寒  
零落梨花  
晚 看到水如雲  
送盡雅成點  
南北東西處處愁  
獨倚

闌干偏

又

古澗一枝梅  
免被園林鎖  
路遠山深  
不怕寒似共春相  
趣  
幽思有誰知  
託契都難可  
獨自風流  
獨自香明月  
來尋我

又

灼灼一枝桃  
粉豔天然好  
只被春風擺撼  
多顏色凋零  
早  
結子未為遲  
悔恨隨芳草  
不下山來  
不出溪待守  
劉郎老

又



旅雁向南飛風雨羣初失飢渴辛勤兩翅垂獨下寒汀  
立鷗鷺苦難親增繳憂相逼雲海茫茫無處歸誰聽  
哀鳴急

又

山曉鷓鴣啼雲暗瀧州路榕葉陰濃荔子青百尺枕榔  
樹盡日不逢人猛地風吹雨慘暗蠻溪鬼峒寒隱隱  
聞銅鼓

清平樂

亂紅深翠樓閣春風外胡蝶成團飛照水睡鴨無人驚  
起身閑更覺身輕酒壺歌扇隨行芳草綠楊堤畔一

聲初聽啼鶯

又

木樨

人間花少菊小芙蓉老冷淡仙人偏得道把一作買住西  
風一笑前身元是疎梅黃姑點碎冰肌惟有暗香長  
在飽參清露霏微

又

相留不住又趁東風去樓外夕陽芳草路今夜短亭何  
處杏花斜墜闌干朱簾不捲春寒惆悵黃昏前後離  
愁酒病厭厭

又

多寒易雨春事都相誤愁過黃昏無著處寶篆燒殘香  
縷低鬟暗摘明璫羅巾浥損殘妝簷外幾聲風玉丁  
東敲斷人腸

又

春寒雨妥花萼紅難破繡線金針慵不作要見秋千無  
那西鄰姊妹丁寧尋芳更約清明畫箇丙丁帖子前  
階後院求晴

又

當初相見君恨相逢晚一曲秦箏彈未徧無奈昭陽人  
怨便教恩淺情疎隔花空望金輿春晚不沾紅粉碧

寔自錄仙書

昭君怨

悼亡

隴月黃昏亭榭池上秋千初架燕子說春寒杏花殘  
淚斷愁難斷往事總成幽怨幽怨幾時休淚還流

浣溪沙

季欽雍雙妙麗使  
來求長短句為賦

折桂歸來懶覓官十年風月醉家山有人挾瑟伴清閑  
楚畹飛香蘭結佩藍田生暖玉連環擁書萬卷看雙  
鸞

又

元真子有漁父詞為添作

西塞山邊白鷺飛吳松興一作江上綠楊低桃花流水鱖

魚肥 青箬笠將風裏戴短蓑衣向雨中披斜風細雨  
不須歸

又

銀海清泉浸

一作洗

玉杯恰筍白酒冷偏宜水林檎嫩折

青枝 爭看使君長壽曲旋教法部太平詞快風涼雨  
火雲摧

又

碧玉闌干白玉人倚花吹葉忍黃昏蕭郎一去又經春  
眉淡翠峰愁易聚臉殘紅雨淚難勻纖腰減半綠羅  
裙

又

雨溼清明香火殘  
碧溪橋外燕泥寒  
日長獨自倚闌干  
脫箒脩篁初散綠  
褪花新杏未成酸  
江南春好與誰看

又

風落芙蓉畫扇閑  
涼隨秋色到人間  
乍垂羅幕展飛鸞  
好把深杯添綠酒  
休拈明鏡照蒼顏  
浮生難得是清歡

又

才子佳人相見難  
舞收歌罷又更闌  
密將春恨繫幽懽

結子同心香佩帶  
怕兒雙字玉連環  
酒醒燈暗忍重看

又

贈賁大夫歌者  
其人嘗在大家

晚菊花前飲  
翠蛾按花傳酒緩  
聲歌柳枝團扇別離多  
擁髻淒涼論舊事  
曾隨織女度銀梭  
當年今夕奈愁何

阮郎歸

楊花陌上撚明璫  
嬌饒一作紅新樣妝  
匆匆曾貯一襟香  
月痕金縷涼  
分淚扇掩離觴  
春殘人斷腸  
錦書難寄雁飛忙  
池塘芳草長

生查子

卧病獨眠人無月中秋節淡照碧紗燈冷看銀屏雪  
風露轉蕭寒砧杵添淒咽伏枕謾書到曉愁難說

眼兒媚

席上  
瑞香

青錦成帷瑞香濃雅稱小簾櫳主人好事金杯留客共  
倚春風不知因甚來塵世香似舊曾逢江梅退步幽  
蘭偷眼迴避芳叢

又

疊翠闌紅鬪纖濃雲雨綺為櫳只憂謝了偏須著意障  
雨遮風瑞雲香霧雖難覓薦地有時逢不妨守定從



他人嘆老入花叢

又

紫帔紅襟豔爭濃  
光彩燦䟽櫳  
香為小字瑞為高  
姓道骨仙風  
此花合向瑤池種  
可惜未遭逢  
阿環見了羞  
回眼尾愁聚眉叢

訴衷情

青垂柳綫水平池  
芳徑燕初飛  
日長事少人靜  
山繭換單衣  
簫鼓遠篆香遲捲  
簾低半牀花影  
一枕松風午  
醉醒時

又

老人無復少年歡嫌酒倦吹彈黃昏又是風雨樓外角  
聲殘 悲故國念塵寰事難言放下雲箋了紙帳下曳上  
青氈一任霜寒

又

青旗綠勝又迎春暖律應祥雲金盤內家生菜宮院編  
承恩 時節好管絃新度昇平惠風遲日柳眼梅心任  
醉芳尊

又

月中玉兔日中鴉隨我度年華不管寒暄風雨飽飯熱  
煎茶 居士竹故侯瓜老生涯自然天地本分雲山到

處為家

菩薩蠻

老人諳盡人間苦  
近來却似心頭悟  
九九是重陽  
重陽菊散芳  
出門何處去  
對面誰相語  
枕臂卧南窓  
銅鑪柏子香

又

芭蕉葉上秋風碧  
晚來小雨流蘇溼  
新甯木犀沈香遲  
斗帳深  
無人同向夕  
還是愁成憶  
憶昔結同心  
鴛鴦何處尋

又

風流才子傾城色紅纓翠幃長安陌夜飲小平康煖生  
銀字簧持盃留上客私語眉峯側半冷水沈香羅幃  
宮漏長

又

鄉闕散盡當年客春風寂寞花無色長日掩重門江山  
眼外昏畫圖高挂壁嵩少參差碧想見卧雲人松黃  
落洞門

又

芙蓉紅落秋風急夜寒紙帳霜華溼枕畔木瓜香曉來  
清興長輕丹青箬笠短棹溪光碧去覓謝三郎蘆花

何處藏

雙鷓鴣

拂破秋江煙碧一對雙飛鷓鴣應是遠來無力稍下相  
偎沙磧小艇誰吹橫笛驚起不知消息悔不當時描  
得如今何處尋覓

鼓笛令

紙帳綢衾忒暖儘自由橫翻倒轉睡覺西窓鐙一盞恰  
聽打三更三點殘夢不須深念這些箇光陰殺短解  
散疆繩休繫絆把從前一筆勾斷

西湖曲

今冬寒早風光好休怪撓先歌絮帽蟹肥一个可秤觔  
酒美三杯真合道年年閑夢垂垂了且喜風松吹不  
倒平分兩月是新春却共梅花依舊笑

風蝶令

試看何時有元來總是空丹砂只在酒盃中看取乃公  
雙頰照人紅花外莊周蝶松間禦寇風古人漫爾說  
西東何似自家識取賣油翁

謁金門

和李士舉

春怎戀樓外綠催紅殿短袖迎風愁半捲手寒無處暖  
目斷蓬萊宮院引去誰憐誰怨相見不如青翅燕舉

頭長安遠

洛妃怨

拾翠當年延佇解珮感君誠素微步過南岡獻明璫  
襟上淚難再會惆悵幽蘭心事心事永難忘寄君王

燕歸梁

帳掩秋風一半開閑將玉笛吹過雲微雨散輕雷夜參  
差認樓臺暗香移枕新涼住竹外漏聲催放教明月  
上牀來共清夢兩徘徊

相見歡

瀟州幾番清秋許多愁嘆我等

一作點

閑白了少年頭

人間事如何是去來休自是不歸歸去有誰留

又

吳中

東風吹盡江梅橘花開舊日吳王宮殿鎖蒼苔

一云長青苔

今古事英雄淚老相催長恨夕陽西去晚潮回

又

金陵城上西樓倚清秋萬里夕陽垂地大江流  
中原  
亂簪纓散幾時收試倩悲風吹淚過揚州

又

秋風又到人間葉珊珊四望煙波無盡欠青山  
浮生  
事長江水幾時閑幸是古來如此且開顏



又

吟蛩作盡秋聲月西沈悽斷餘香殘夢下層城  
人不見屏空掩數殘更還自褰帷獨坐看清燈

又

當年雨上蓬瀛燕殊庭曾共羣仙攜手鬪吹笙  
雲濤晚蛺旌散海漚輕却釣松江煙月醉還醒

又

深秋庭院初涼近重陽籬畔一枝金菊露微黃  
鱸膾韻橙虀品酒新香我是昇平閑客醉何妨

如夢令

一夜新秋風雨客恨客愁無數我是卧雲人悔到紅塵  
深處難住難住拂袖青山歸去

又

好箇中秋時節莫恨今宵無月巖壑一燈青寒浸水香  
留客留客留客相對無言無說

又

盞底一盤金鳳滿泛酒光浮動引我上煙霞智力一時  
無用無用無用踏破十洲三洞

又

真个先生愛睡睡裏百般滋味轉面又翻身隨意十方

遊戲遊戲遊戲到了元無一事

又

莫恨中秋無月月又不甜不辣幸有甕頭春閑坐暖雲  
香雪香雪香雪滿引水晶蕉葉

又

莫恨中秋無月多點金缸紅蠟取酒擁絲簧迎取輕盈  
桃葉桃葉桃葉唱我新歌白雪

又

一夜蟠桃吹折折剛道有人偷折幸自沒蹤由無奈蝶蜂  
胡說胡說胡說方朔不須耳熱

又

好笑山翁年幾不覺七十有四生日近元宵占早燒鐙  
歡會歡會歡會坐上人人千歲

春曉曲

西樓落月雞聲急夜浸疎香浙澀玉人酒渴嚼春冰曉  
色入簾橫寶瑟

柳枝

江南岸

柳枝

江北岸

柳枝

折送行人無盡時恨分離

柳

枝

酒一盃

柳枝

淚雙垂

柳枝

君到長安百事迷幾時

歸

柳枝

又

沈蕙  
乞詞

住近沈香浦門前蕙草春  
鴛鴦飛下柘枝新  
見弄青梅初著翠羅裙  
怕喚拈歌扇嫌催上舞裯  
幾時微步不生塵  
來作維摩方丈散花人

蘇幕遮

瘦仙人窮活計不養丹砂  
不肯參同契兩頰家食三覺  
睡閉著門兒不管人閑事  
又經年知幾歲老屋穿空  
幸有天遮蔽不飲香醪常似醉  
白鶴飛來笑我顛顛地  
又

酒臺空歌扇去獨倚危樓  
無限傷心處芳草連天雲薄

暮故國山河一陣黃梅雨 有奇才無用處壯節飄  
零受盡人間苦欲指虛無問征路回首風雲未忍辭明  
主

棋歌下

宛委別藏

王周士詞

臺灣商務印書館發行



書中首葉印章集印於此



王周士詞目錄

水調歌頭 二首

滿庭芳 四首

驀山溪 二首

念奴嬌 三首

鷓鴣天 三首

臨江仙 三首

浣溪沙 三首

踏莎行 三首

感皇恩

慶雙椿

漁家傲

好事近 二首

虞美人

浣溪沙

南歌子

鷓鴣天



王周士詞

長沙王以寧周士

水調歌頭

裴公亭懷古

歲晚橘洲上老葉舞愁紅西山光翠依舊影落  
酒杯中人在子亭高處下望長沙城郭獵獵酒  
帘風遠水湛寒碧獨釣綠蓑翁懷往事追昨  
夢轉頭空孫郎前日豪健頤指五都雄起擁奇  
才劍客十萬銀戈赤幘歌鼓壯軍容何似裴相  
國談道老圭峯

又呈漢陽史君

大別我知友突兀起西州十年重見依舊秀色  
照清眸常記鮪碕狂客邀我登樓雪霽杖策擁  
羊裘山吐月千仞殘夜水明樓黃梁夢未覺  
枕幾經秋與君解后相逐飛步碧山頭舉酒一  
觴今古歎息英雄骨冷清淚不能收鸚鵡更誰  
賦遺恨滿芳洲

滿庭芳

山聳方壺潮通碧海江陳自昔名家玉真仙子  
璫珮粲朝霞一種天香勝味笑楊梅不數枇杷  
難摸寫牟尼妙質光透紫丹砂咨嗟如此輩

不知何爲留滯天涯料甘心遠引無意紛華一  
任姚黃魏紫供吟賞銀燭龕紗南遊士日餐千  
顆不願九霞車

又鄧州席上

千古南陽劉郎鄉國依約楚俗秦風英姿豪氣  
耆舊笑談中璫珮來從帝所許洲花潭菊從容  
霜秋曉涼生日觀極目送飛鴻 主公天下士  
揮毫萬字一飲千鍾醉高歌起舞喚醒人龍我  
自人間漫浪平生事南北西東辭公去寒眸漱  
電曾識小安豐

又 陳覺叟雪中見過

五十七年侵尋老矣小菴初築林垞故人相過  
嘉雪舞祥霽遍野跳珠濺玉縱兒童收滿金瓶  
明年待洗光銀海袖手看昇平 先生齊物久  
蟻邱罷戰蝸角休征趣樽前身健有酒須傾隨  
分村歌社舞何須問武宿文星忘懷矣未能忘  
酒相與醉忘形

又 重午登霞樓

千古黃州雪堂奇勝名與赤壁齊高竹樓千字  
筆勢壓江濤笑問江頭皓月應曾照今古英豪

菖蒲酒衣樽無恙聊共訪臨臯  
陶陶誰晤對  
粲花吐論宮錦紉袍借銀濤  
雪浪一洗塵勞好  
在江山如畫人易老  
雙鬢難秣升平代憑高望  
遠當賦反離騷

驀山溪

和虞彥恭寄錢遜叔

平生堂上側盞歌南浦醉望五州山  
渺千里銀濤東注錢郎英遠滿腹貯精神  
窺素壁墨栖鴉  
歷歷題詩處  
風裘雪帽踏遍荆湘路  
回首古揚州  
沁天外殘霞一縷  
德星光次何日照長沙  
漁父曲竹枝詞萬古歌來暮

又游南山

琬弓繡帽戲馬秦淮道風入馬蹄輕曾踏遍淮  
堤芳草飛英點點春事已闌珊風雨橫別離多  
斷送英雄老功名終在休惜芳樽倒談笑下  
燕雲看千里風驅電掃男兒此事莫待鬢絲勞  
漢都護萬年觴玉殿春風早

念奴嬌

淮上雪

天人何意碎瓊璫玉珮書空千尺筇笠蓑衫扁  
舟下淮口煙林如織蜚觀嶙峋子亭突兀影浸  
澄淮碧綸巾鶴氅是誰獨笑攜策遙想易水



燕山有人方醉賞六花如席雲重天低酣歌罷  
膽壯乾坤猶窄射雉歸來鐵鱗十萬踏碎千山  
白紫簫聲斷喚回春滿南陌

又

雲收天碧漸風高露冷羣喧初寂遠浦歸舟荒  
渡口牽蓬橫棹隄側一帶澄江十分蟾影千里  
寒光白衿懷迎爽有人獨步攜策遙想簾捲  
瓊樓凭欄凝望此意知何極聲斷秦簫雙鳳駕  
凌厲飛仙同藉問漢乘槎採珠臨海往事空蹤  
跡莫辭吟賞終宵清景難得

又

晚煙凝碧漸漁村  
山市人歸寂寂有客飛舟遠  
顧訪應訝綸巾歌側得意忘年推誠投分高論  
追元白英標逸氣笑予窮抱真策興盡又復  
言歸秋風分袂浩蕩思無極咫尺昭山明翠壁  
那知中隱咸藉說夢難聽閉門尋夢肯念栖萍  
跡浪吟狂醉幾時還共重得

鷓鴣天 壽劉方明

昔有書生薦壽杯  
清詞妙絕賀方回  
黃花也欲爲君壽  
先向重陽六日開  
躋楚俗上春臺政

成歸去位三台明年壽酒君王勸知有傳宣勅  
使來

又壽杜士美

帝乙何年騎玉龍武夷仙伯笑相從長庚瑞應  
遊仙夢碧藕花開解愠風歌既醉樂元豐明  
良相悅壽無窮野人更有深深祝笑指三台十

八公

三台壽松  
在南岳

又壽張徽猷

桃李紛紛春事催桐花風定牡丹開天麟下作  
人間瑞玉燕清宵入夢來紅玉耐紫霞杯五

雲深處望三台君家況有庭前栢好箇擎天八  
柱材

臨江仙 和子安

眼看西園紅與紫年來幾度芳菲吾生四十漸  
知非祇思青筇笠江上雨霏霏 飲酒但知尋  
夏季不須遠慕安期丹成仙去是何時龜藏何  
必學春日正遲遲

又

此理循環如引鋸春來百草菲菲道人一笑悟  
前非功名真長物夕靄與朝霏 夢得清孫今

祿隱漫郎自許風期江樓景物得旬時平蕪三百里天濶夕陽遲

又與劉拐

問道洛陽花正好家家遮戶春風道人飲處百壺空年年花下醉看盡幾番紅此拐又從何處去飄蓬一任西東語聲雖異笑聲同一輪清夜月何處不相逢

浣溪沙

艤舟洪江步下

起看船頭蜀錦張沙汀紅葉舞斜陽杖擎驚起睡鴛鴦木落羣心瑤玉□霜和冷月浸澄江

言  
三  
月  
言  
疎蓬今夜夢瀟湘

又壽趙倅

艾勝迎薰壽縷長  
碧筩酒泛綠蒲香  
萬家喜氣在都梁  
小閣幽軒新料理  
舞衫歌扇且傳觴  
看君飛步小明光

又張金志洗兒

招福宮中第幾真  
飡花辟穀小夫人  
天翁新與玉麒麟  
我識外家西府相  
玉壺冰雪照青春  
小郎風骨已凌雲

踏莎行

夢得光宗河東右族向來到耳聲華熟游從兩  
世記金蘭風流二阮居南北 今夕何辰相親  
燈燭一廬我願依韋曲長君未可賦驪駒山人  
莫爲蒲輪促

又

我自山中漁樵冷族一邱一壑平生熟竭來江  
海寄餘生心兵語甯頻奔北 九里靈河十分  
光燭分輝借潤須鄰曲柳家兄弟莫嗔人狂奴  
小户元低促

又

位正三槐先生九族人間一夢黃梁熟邇來荆  
楚地行仙卜居深在延原北笑問從前誰調  
玉燭當筵鮑老那能曲山中飲酒是生涯欲歸  
未果成煩促

感皇恩

和才仲西山子

千古洞庭湖百川爭注雪浪銀濤正如許騎鯨  
詩客浩氣決雲飛霧背人歌歎乃凌雲去我  
欲從公翩然鵠舉未願人間相君口答簪短棹  
是我平生真語箇中煙景好煩公句

慶雙椿

汪周佐夫婦五月六日同生



問政山頭景氣嘉  
仙家綠酒薦昌牙  
仙郎玉女共乘槎  
學士文章舒錦繡  
夫人冠帔爛雲霞  
壽香來是道人家

漁家傲

往事閑思人共惜  
十年塞上煙塵亞  
百萬鐵衣馳鐵馬  
都弄罷八風斷送歸蓮社  
賣藥得錢休教化  
歸來醉卧蝸牛舍  
一顆明珠元不夜  
非□借神光穿透諸天下

好事近

詩客少微家  
世有斗南人傑  
一段素襟清韻似

玉壺冰雪 懷中卿相飽經綸况是好時節我  
有太平歌頌待形容賢業

又

此詞與前詞相犯尾句小不同今兩存之

白石讀書房世有斗南人傑一段素襟清韻似  
玉壺冰雪 仙家赤酒薦交梨道眼况超越來  
往十洲三島跨一輪新月

虞美人

宿龜山夜登秋漢亭

歸來峯下霜如水明月三千里幽人獨立瞰長  
淮誰棹扁舟一葉趁潮來 洞庭湖上雲濤觀  
憶我煙蓑伴此身天地一浮萍去國十年華髮

欲星星

浣溪沙

張國泰生日

快雨踈風六日涼  
貂蟬人著綵衣裳  
肅然心拜玉爐香  
相國趣還調鼎鼎  
潘輿指日下瀟湘  
秋來江上接歸航

南歌子

李左司生日

未折江南柳先開  
壠上梅綠情紅意  
到根荻昨夜春隨  
和氣已歸來  
忠力扶昌運  
冲和保聖胎  
陽功陰德好栽培  
他日騎鯨仙路指蓬萊

鷓鴣天

劉運判生日


瑞雪當空舞素英玳筵收得滿金瓶洗教雙眼  
明如鏡看取黃河幾度清 龜畀壽鶴爲形年  
年長願見儀刑他年林下逢彭祖喚作誰家小  
後生

王周士詞終

宛委別藏

頻洲漁笛譜

臺灣商務印書館發行



書中首葉印章集印於此

踏莎行敬賦

草窻絕妙詞

夢窗覺翁吳文英

楊柳風流蕙花清潤蘋

未數張三影沈香醉調

清平新辭

鮫室裁綃

白雪爭歌郢西湖同結杏  
花盟東風休賦丁香恨



蘋洲漁笛譜卷一

齊人周密公謹父

減字木蘭慢

西湖十景尚矣張成子嘗賦應天  
長十闕誇余曰是古今詞家未能  
道者余時年少氣銳謂此人間景  
余與子皆人間人子能道余顧不  
能道耶冥搜六日而詞成成子驚  
賞敏妙許放出一頭地異時霞翁

見之曰語麗矣如律未協何遂相  
與訂正閱數月而後定是知詞不  
難作而難於改語不難工而難於  
協翁往矣賞音寂然姑述其槩以  
寄余懷云

蘇堤春曉

恰芳菲夢醒漾殘月轉湘簾正翠崦收鐘形  
墀放仗臺榭輕煙東園夜游乍散聽金壺逗  
曉歇花籤宮柳微開露眼小鶯寂妒春眠

冰匳黛淺紅鮮臨曉鑑競晨妍怕誤却佳期  
宿妝旋整忙上雕軒都緣探芳起早看堤邊  
早有已開船薇帳殘香淚蠲有人病酒慊慊

平湖秋月

碧霄澄暮靄引瓊駕碾秋光看翠闕風高珠  
樓夜午誰擣元霜滄茫玉田萬頃趁仙查只  
赤接天潢髣髴凌波步影露濃珮冷衣涼  
明璫淨洗新妝隨皓彩過西廂正霧衣香潤  
雲鬟紺溼私語相將鴛鴦誤驚夢曉掠芙蓉

度影入銀塘十二闌干竚立鳳簫怨徹清商

斷橋殘雪

覓梅花信息擁吟袖莫鞭寒自放鶴人歸月  
香水影詩冷孤山等閑泮寒暄暖看融城御  
水到人間瓦隴竹根更好柳邊小駐游鞍  
琅玕半倚雲灣孤棹晚載詩還是醉魂醒處  
畫橋第二奩月初三東欄有人步玉怪冰泥  
沁溼錦鷄斑還見晴波漲綠謝池夢草相關

雷峯落照

塔輪分斷雨倒霞影漾新晴看滿鑑春紅輕  
橈占岸疊鼓收聲簾旌半鈎待燕料香濃徑  
遠趙蜂程芳陌人扶醉玉路徧懶拾遺簪

郊垞未厭游情雲暮合漫銷凝想罷歌停舞  
煙花露柳都付棲鶯重闌已催鳳鑰正鈿車  
繡勒入爭門銀燭擎花夜暖禁街淡月黃昏

麴院風荷

軟塵飛不到過微雨錦機張正蔭綠池幽交  
枝徑窄臨水追涼宮妝蓋羅障暑泛青蘋亂

舞五雲裳迷眼紅綃絳綵翠深偷見鴛鴦  
湖光兩岸瀟湘風薦爽扇搖香算惱人偏是  
縈絲露藕連理秋房涉江采芳舊恨怕紅衣  
夜冷落橫塘折得荷花忘却棹歌唱入斜陽

花港觀魚

六橋春浪暖漲桃雨鰕初肥正短棹輕蓑牽  
簫荇帶縈網蓴絲依倚岸紅遡遠漾仙舟誤  
入武陵溪何處金刀膾玉畫船倚柳頻催  
芳堤漸滿斜暉舟葉亂浪花飛聽暮榔聲合

鷗沈暗渚鷺起煙磯忘機夜深浪靜任煙寒  
自載月明歸三十六鱗過却素牋不寄相思

南屏晚鐘

疎鐘敲暝色正遠樹綠惜惜看渡水僧歸投  
林鳥聚煙冷秋屏孤雲漸沈雁影尚殘簫倦  
鼓別游人宮柳棲鴉未穩露梢已掛疎星  
重城禁鼓催更羅袖怯暮寒輕想綺疏空掩  
鸞綃翳錦魚鑰收銀蘭燈伴人夜語怕香銷  
漏永著溫存猶憶回廊待月畫欄倚徧桐陰

柳浪聞鶯

晴空搖翠浪。畫禽靜霽煙收。聽暗柳啼鶯新。  
簧弄巧如度秦謳。誰紉翠絲萬縷。颺金梭宛  
轉。織芳愁。風裊餘音甚處。絮花三月宮溝。  
扁舟纜繫輕柔。沙路遠。倦追游。望斷橋斜日。  
蠻腰競舞。蘇小牆頭。偏憂杜鵑喚去。鎮綿蠻  
竟日。挽春留。啼覺瓊疏。午夢翠丸驚度。西樓

三潭印月

游船人散後。正蟾影印寒湫。看冷沁鮫眠清。



宜兔浴皓彩輕浮扁舟泛天鏡裏遡流光澄  
碧浸明眸栖鷺空驚碧草素鱗遠避金鈎  
臨流萬象涵秋懷渺渺水悠悠念漢臯遺珮  
湘波步襪空想仙游風收翠奩乍啟度飛星  
倒影入芳洲瑤瑟誰彈古怨渚宮夜舞潛虬  
兩峯插雲

碧尖相對處向煙外挹遙岑記舞鷺啼猿天  
香桂子曾去幽尋輕陰易晴易雨看南峯淡  
日北峯雲雙塔秋擎露冷亂鐘曉送霜清

登臨望眼增明沙路白海門青正地幽天迴  
水鳴山籟風奏松琴虛楹半空聚遠倚闌干  
暮色與雲平明月千巖夜午遡風跨鶴吹笙  
闕

原  
関

江戸参府御用  
1

5







商西風只在垂楊外

浪淘沙

新雨洗晴空碧淺眉峯翠樓西畔畫橋東柳  
線嫩黃纔半染眼眼東風繡戶掩芙蓉帳  
減香筒遠煙輕靄弄春容雁雁又歸鶯未到  
誰寄愁紅

浣溪沙

幾點紅香入玉壺幾枝紅影上金鋪畫長人  
困鬪擣菰花徑日遲蜂課蜜杏梁風軟燕

調雛茶蘼開了有春無

浣溪沙

波影搖花碎錦鋪竹風清泛玉扶疎畫屏紋  
枕小紗櫺合色麝囊分翠繡夾羅螢扇縷  
金書十分涼意淡妝梳

浣溪沙

淺色初裁試暖衣畫簾斜日看花飛柳搖蛾  
綠妒春眉象局懶拈雙陸子寶弦愁按十  
三徽試憑新燕問歸期



東風第一枝早春賦

草夢初回柳眠未起新陰纔試花訊雛鴛迎  
曉偎香小蝶舞晴弄影飛梭庭院早已覺日  
遲人靜畫簾輕不隔春寒旋減酒紅香暈

嗟欲就遠煙催暝人欲醉晚風吹醒瘦肌羞  
怯金寬笑靨暖融粉沁珠詞緩引更巧試杏  
妝梅鬢怕等閑虛度芳期老却翠嬌紅嫩

楚宮春爲洛花度無射宮

香迎曉白看煙珮霞綃弄妝金谷倦倚畫欄

無語情深嬌足雲擁瑤房翠暖繡帳捲東風  
傾國丰稔愁紅念舊游凝竚蘭翹瑞鸞低舞  
庭綠 猶想沈香亭北人醉裏芳筆曾題新  
曲自剪露痕移取春歸華屋絲障銀屏靜掩  
俏未許鶯窺蝶宿絳蠟良宵酒半闌重繞鴛  
機醉靨爭妍紅玉

大聖樂東園餞春即席分題

嬌綠迷雲倦紅顰曉嫩晴芳樹漸午陰簾影  
移香燕語夢回千點碧桃吹雨冷落錦宮人

歸後記前度蘭橈停翠浦凭欄久謾凝想鳳  
翹慵聽金縷留春問誰最苦柰花自無言  
鶯自語對畫樓殘照東風吹遠天涯何許怕  
折露條愁輕別更煙暝長亭啼杜宇垂楊晚  
但羅袖暗霑飛絮單熬

三犯渡江雲

丁卯歲未除三日乘興棹雪訪李  
商隱周隱於餘不之濱主人喜余  
至擁裘曳杖相從於山巔水涯松

雲竹雪之間酒酣促膝笑語盡出  
笈中畫囊中詩以娛客醉歸船窓  
皤然夜鼓半矣歸途再雪萬山玉  
立相映發冰鏡晃耀照人毛髮灑  
灑清入肝鬲凜然不自支疑行清  
虛府中竒絕境也竭來故山恍然  
隔歲慨然懷思何異神游夢適因  
竊自念人間世不乏清景往往汨  
汨塵事不暇領會抑亦造物者故

爲是靳靳乎不然戴溪之雪赤壁  
之月非有至高難行之舉何千載  
之下寥寥無繼之者耶因賦此解  
以寄余懷

冰谿空翠晚滄茫雁影淺水落寒沙那回乘  
夜興雲雪孤舟曾訪故人家千林未綠芳信  
暖玉照霜華共凭高聯詩喚酒暝色奪昏鴉  
堪嗟 漸鳴玉珮山護雲衣又扁舟東下想  
故園天寒倚竹袖薄籠紗詩筒已是經年別

早暖律春動香葭愁寄遠溪邊自折梅花

露華次張宙雲韻

暖銷蕙雪漸水紋漾錦雲淡波溶岸香弄蘂  
新枝輕裊條風次第燕歸將近愛柳眉桃靨  
煙濃鴛徑小芳屏聚蝶翠渚飄鴻六橋舊  
情如夢記扇底宮眉花下游驄選歌試舞連  
宵戀醉珍叢怕裏早鶯啼醒問杏鈿誰點愁  
紅心事悄春嬌又入翠峯

桃源憶故人

流蘇靜掩羅屏小春夢苦無分曉一縷舊情  
誰表暗逐餘香裊相思謾寄流紅杏人瘦  
花枝多少郎馬未歸春老空怨王孫草

糖多令

絲雨織鶯梭浮錢點細荷燕風輕庭宇正清  
和苔面唾茸堆繡徑春去也柰春何宮柳  
老青蛾題紅隔翠波扇鸞孤塵暗合歡羅門  
外綠陰深似海應未比舊愁多

西江月

波影暖浮玉甃柳陰深鎖金鋪湘桃花褪燕  
調雛又是一番春暮碧柱情深鳳怨雲屏  
夢淺鶯呼繡窻人倦冷熏爐簾影揺花亭午  
菩薩蠻

霜風漸入龍香被夜寒微澀宮壺水滴滴是  
愁聲聲聲滴到明夢魂隨雁去飛到顰眉  
處雁已過西樓又還和夢愁

繡鸞鳳花犯賦水仙

楚江湄湘娥乍見無言灑清淚澹然春意空



獨倚東風芳思誰寄凌波路冷秋無際香雲  
隨步起謾記得漢宮仙掌亭亭明月底冰  
弦寫怨更多情騷人恨枉賦芳蘭幽芷春思  
遠誰歎賞國香風味相將共歲寒伴侶小窻  
淨沈煙熏翠袂幽夢覺娟娟清露一枝燈影  
裏

探春慢脩門度歲和友人韻

綵勝宜春翠盤消夜客裏暗驚時候翦燕心  
情呼盧笑語景物總成懷舊愁鬢如垂楊怪

穉眼漸濃如豆儘教寬盡春衫畢竟爲誰消  
瘦梅浪半空如繡便筦領芳菲忍辜詩酒  
映燭占花臨窻卜鏡還念嫩寒宮袖簫鼓動  
春城競點綴玉梅金柳厮勾元宵燈前共誰  
攜手

瑤花慢

后土之花天下無二本方其初開  
帥臣以金瓶飛騎進之天上間  
亦分致貴邸余客輦下有以一枝



1871年12月

12

長安獨客又見西風素月丹楓淒  
然其爲秋也因調夾鍾羽一解

煙水闊高林弄殘照晚蜩淒切碧礎度韻銀  
牀飄葉衣溼桐陰露冷採涼花時賦秋雪歎  
輕別一襟幽事砌蛩能說客思嗟商還怯  
怨訝長瓊壺暗缺翠扇恩疎紅衣香褪翻成  
銷歇玉骨西風恨最恨閑却新涼時節楚簫  
咽誰倚西樓淡月

鷓鴣天

燕子時時度翠簾柳寒猶未褪香綿落花門  
巷家家雨新火樓臺處處煙情默默恨厭  
厭東風吹動畫秋千拆桐開盡鶯聲老無奈  
春何祇醉眠

夜行船

蛩老無聲深夜靜新霜桀一簾燈影如夢鴻  
高烘愁月淺縈亂恨絲難整笙字嬌訛誰  
爲靚香襟冷怕看粧印繡閣藏春海棠偷暖  
還似去年風景

采綠吟

甲子夏霞翁會吟社諸友避暑於  
西湖之環碧琴樽筆研短葛練巾  
放舟於荷深柳密間舞影歌塵遠  
謝耳目酒酣采蓮葉探題賦詞余  
得塞垣春翁爲翻譜數字短簫按  
之音極諧婉因易今名云

采綠鴛鴦浦畫舸水北雲西槐薰入扇柳陰  
浮漿花露侵詩點塵飛不到冰壺裏紺霞淺

壓玻璃想明璫凌波遠依依心事寄誰移  
棹檣空明蘋風度瓊絲霜筦清脆只赤挹幽  
鄉悵岸隔紅衣對滄洲心與漚閒吟情渺蓮  
葉共分題停杯久涼月漸生煙合翠微

解語花

羽調解語花音韻婉麗有譜而亡  
其辭連日春晴風景韶媚芳思撩  
人醉撚花枝倚聲成句

晴絲罥蝶暖蜜酣蜂重簾捲春寂寂雨夢煙



梢壓闌干花雨染衣紅  
溼金鞍誤約空極目  
天涯草色闌苑玉簫人去後  
惟有鶯知得  
餘寒猶掩翠戶梁燕乍歸  
芳信未端的淺薄  
東風莫因循輕把杏鈿狼藉  
塵侵錦瑟殘日  
綠窻春夢窄睡起折花無意  
緒斜倚秋千立

### 曲游春

禁煙湖上薄游施中山賦詞甚佳  
余因次其韻蓋平時游舫至午後  
則盡入裏湖抵暮始出斷橋小駐

而歸非習於游者不知也故中山  
極擊節余閒却半湖春色之句謂  
能道人之所未云

禁苑東風外颺暖絲晴絮春思如織燕約鶯  
期惱芳情偏在翠深紅隙漠漠香塵隔沸十  
里亂弦叢笛看畫船盡入西冷閒却半湖春  
色 柳陌新煙凝碧映簾底宮眉堤上游勒  
輕暝籠寒怕梨雲夢冷杏香愁冪 詞筦疇寒  
食柰蝶怨良宵岑寂正滿湖碎月搖花怎生

去得

大聖樂次施中山蒲節韻

虹雨霽風翠紫蘋渚錦翻葵逞正小亭曲沼  
幽深簟枕夢回苔色槐陰清潤暗憶蘭湯初  
洗玉襯碧霧籠綃垂蕙領輕妝了裊涼花絳  
縷香滿鸞鏡 人間午遲漏永看雙燕將雛  
穿藻井喜玉壺無暑涼涵荷氣波搖簾影畫  
舸西湖渾如舊又孤冷蒲香驚夢醒歸舟晚  
聽誰家紫簫聲近

桂枝香雲洞賦桂

巖霏逗綠又涼入小山千樹幽馥仙影懸霜  
粲夜楚宮六六明霞洞宵珊瑚冷對清商吟  
思堪掬麝痕微沁蜂黃淺約數枝秋足別  
有雕欄翠屋任滿帽珠塵拚醉香玉瘦倚西  
風誰見露侵肌粟好秋能幾花前笑繞涼雲  
重喚銀燭寶屏空曉珍叢怨月夢回金谷

杏花天賦莫愁

瑞雲盤翠侵妝額眉柳嫩不禁愁積返魂誰

染東風筆寫出郢中春色  
人去後垂楊自  
碧詞舞夢欲尋無跡愁隨兩槳江南北日暮  
石城風急

杏花天賦昭君

漢宮乍出慵梳掠關月冷玉沙飛暮龍香撥  
重春葱弱一曲哀弦謾託君恩厚空憐命  
薄青冢遠幾番花落丹青自是難描摸不是  
當時畫錯

南樓令次陳君衡韻

桂影滿空庭秋更廿五聲一聲聲都是銷凝  
新雁舊荃相應和禁不過冷清清酒與夢  
俱醒病因愁做成展紅綃猶有餘馨暗想芙  
蓉城下路花可可霧冥冥

南樓令又次君衡韻

欹枕聽西風荃階月正中弄秋聲金井孤桐  
閒省十年吳下路船幾度繫江楓輦路又  
迎逢秋如歸興濃歎淹留還見新冬湖外霜  
林秋似錦一片片認題紅

秋霽

乙丑秋晚同盟載酒爲水月游商  
今初肅霜風戒寒撫人事之飄零  
感歲華之搖落不能不以之興懷  
也酒闌日暮憮然成章

重到西泠記芳園載酒畫船橫笛水曲夫容  
渚邊漚鷺依依似曾相識年芳易失斷橋幾  
換垂楊色謾自惜愁損庾郎霜點鬢華白  
殘菴露草怨蝶寒花轉眼西風又成陳迹歎

如今才消量減樽前孤負醉吟筆欲寄遠情  
秋水隔舊游空在凭高望極斜陽亂山浮紫  
暮雲凝碧

齊天樂

紫霞翁開譙梅邊謂客曰梅之初  
綻則輕紅未銷已放則一白呈露  
古今誇賞不出香白顧未及此欠  
事也施中山賦之余和之

宮簷融暖晨妝嬾輕霞未勻酥臉倚竹嬌顰



臨流瘦影依約樽前重見盈盈笑靨映珠絡  
玲瓏翠綃葱蒨夢入羅浮滿衣清露暗香染  
東風千樹易老怕紅顏旋減芳意偷變贈  
遠天寒吟香夜永多少江南新怨瓊疏靜掩  
任翦雪裁雲競誇輕豔畫角黃昏夢隨春共  
遠

憶舊游落梅賦

念芳鈿委路粉浪翻空誰補春痕佇立傷心  
事記宮簷點鬢候館霑襟東君護香情薄不

步瀛集卷一  
二  
筦徑雲深嘆金谷樓危避風臺淺消瘦飛瓊  
梨雲已成夢謾蝶恨淒涼人怨黃昏撚殘  
枝重嗅似徐娘雖老猶有風情不禁許多芳  
思青子漸成陰怕酒醒詞闌空庭夜月羌筦  
清

一枝春

寄閒飲客春窻促座款密酒酣意  
洽命清吭歌新製余因爲之霑醉  
且調新弄以謝之

碧澹春姿柳眠醒似怯朝來酥雨芳程乍數  
喚起探花情緒東風尚淺甚先有翠嬌紅嫵  
應自把羅綺圍春占得畫屏春聚 留連繡  
叢深處愛歌雲裊裊低隨香縷瓊窻夜暖試  
與細評新譜妝梅媚晚料無那弄顰佯妒還  
怕裏簾外籠鶯笑人醉語

一枝春

越一日寄閒次余前韻且未能忘  
情於落花飛絮閒因寓去燕楊姓

事以寄意此少游小樓連苑之詞  
也余遂戲用張氏故實次韻代荅  
亦東坡錦里先生之詩乎

簾影移陰杏癭寒乍溼西園絲雨芳期暗數  
又是去年心緒金花謾翦倩誰畫舊時眉嫵  
空自想楊柳風流淚滴軟綃紅聚羅窻那  
回歌處嘆庭花倦舞香銷衣縷樓空燕冷碎  
錦懶尋塵譜么弦謾賦記曾是倚嬌成妒深  
院悄閒掩梨花倩鶯寄語

點絳脣

雪霽寒輕興來載酒移吟艇玉田千頃橋外  
詩情迴重到孤山往事和愁醒東風緊水  
邊疎影誰念梅花冷

戀繡衾賦蝶

粉黃衣薄霑麝塵作南華春夢乍醒活計一  
生花裏恨曉房香露正深芳蹊有恨時時  
見趁游絲高下弄晴生怕被春歸了趕飛紅  
穿度柳陰

江城子賦玉盤盃芍藥寄意

玉肌多病怯殘春瘦稜稜睡騰騰清楚衣裳  
不受一塵侵香冷翠屏春意靚明月淡曉風  
輕樓中燕子夢中雲似多情似無情酒醒  
詞闌誰爲喚真真盡日瑣窗人不到鶯意嬾  
蝶愁深

綠蓋舞風輕白蓮賦

玉立照新妝翠蓋亭亭凌波步秋綺真色生  
香明璫搖淡月舞袖斜倚耿耿芳心柰千縷

情絲縈繫恨開遲不嫁東風顰怨嬌藥花  
底謾卜幽期素手採珠房粉豔初褪雨溼鉛  
腮碧雲深暗聚軟綃清淚訪藕尋蓮楚江遠  
相思誰寄棹謔回衣露滿身花氣

玲瓏四犯戲調夢窻

波暖塵香正嫩日輕陰搖蕩清晝幾日新晴  
初展綺枰紋繡年少忍負韶華儘占斷豔謔  
芳酒看翠簾蝶舞蜂喧催趁禁煙時候杏  
腮紅透梅鈿皺燕將歸海棠廝勾尋芳較晚

東風約還在劉郎後憑問柳陌舊鶯人比似  
垂楊誰瘦倚畫闌無語春恨遠頻回首

謁金門

花不定燕尾翦開紅影幾點露香蜂趕趁日  
遲簾幙靜試把翠蛾輕暈愁滿寶臺鸞鏡  
倒指一春將次盡歸期猶未穩

眼兒媚

飛絲半溼惹歸雲愁裏又聞鶯淡月秋千落  
花庭院幾度黃昏十年一夢揚州路空有



少年心不分不曉厭厭默默一段傷春

拜星月慢

癸亥春沿檄荆谿朱墨日賓送忽  
忽不知芳事落鵲聲草色閒郡僚  
閒載酒相慰薦長歌清醕政爾供  
愁客夢栩栩已蜚度四橋煙水外  
矣醉餘短弄歸日將大書之垂虹  
膩葉陰清孤花香冷迤邐遷芳洲  
春換薄酒孤吟悵相如游倦想人  
在絮幙香簾凝望誤認

幾許煙檣風慢芳草天涯負華堂雙燕記  
簫聲淡月梨花院斫牋紅謾寫東風怨一夜  
落月啼鵲喚四橋吟纜蕩歸心已過江南岸  
清宵夢遠逐飛花亂幾千萬縷垂楊翦春愁  
不斷

好事近

秋水浸芙蓉清曉綺窗臨鏡柳弱不勝愁重  
染蘭膏微沁下階笑折紫玫瑰蜂蝶撲雲  
鬢回首見郎羞走眉繡裙微褪

頻洲漁笛譜卷一

頻洲漁笛譜卷一

二



蘋洲漁笛譜卷二

齊人周密公謹父

長亭怨慢

歲丙午丁未 先君子監州太末  
時刺史楊泳齋員外別駕年存齋  
西安令翁浩堂郡博士洪恕齋一  
時名流星聚見爲奇事倅居據龜  
阜下瞰萬室外環四山 先子作  
堂曰嘯詠撮登覽要蜿蜒入後圃

梅清竹癯虧蔽風月後俯官河相望一水則小蓬萊在焉老柳高荷吹涼竟日諸公載酒論文清彈豪吹筆研琴樽之樂蓋無虛日也余時甚少執杖屨供洒掃諸老緒論殷殷金石聲猶在耳後十年過之則徑草池萍憮然葵麥之感一時交從水逝雲飛無人識令威矣徘徊水竹間悵然久之因譜白石自

製調以寄前度劉郎之懷云

記千竹萬荷深處綠淨池臺翠涼亭宇醉墨  
題香閒簫橫玉盡吟趣勝流星聚知幾誦燕  
臺句零落碧雲空嘆轉眼歲華如許凝竚  
望涓涓一水夢到隔花窗戶十年舊事儘消  
得庾郎愁賦燕樓鶴表半漂零算惟有盟漚  
堪語謾倚徧河橋一片涼雲吹雨

齊天樂

余自入冬多病吟事盡廢小窗淡

月忽對橫枝恍然空谷之見似人  
也泚筆賦情不復作少年丹白想  
或者以九方臯求我則庶幾焉

東風又入江南岸年年漢宮春早寶屑無痕  
生香有韻消得何郎花惱孤山夢繞記路隔  
金沙那面曾到夜月相思翠樽誰共飲清醪  
天寒空念贈遠水邊憑爲問春到多少竹  
外凝情牆陰照影誰見嫣然一笑吟薌未了  
怕玉筍西樓一聲霜曉花自多情看花人自



老

月邊嬌元夕懷舊

酥雨烘晴蚤柳盼顰嬌蘭芽愁醒九街月淡  
千門夜暖十里寶光花影塵凝步襪送艷笑  
爭誇輕俊笙簫迎曉翠幕捲天香宮粉少

年紫曲踈狂絮花縱蹟夜蛾心性戲叢圍錦  
燈簾轉玉拚却舞勾詞引前歡謾省又輦路  
東風吹鬢醺醺倚醉任夜深春冷

紫曲疑  
韋曲

宴清都登雪川圖有賦

老去閒情嬾東風外菲菲花絮零亂輕漚漲  
綠啼鵲暗碧一春過半尋芳已是來遲怕迤  
邐華年暗換應悵恨白雪詩空秋霜鬢冷誰  
覓憑闌自笑清狂事隨花謝愁與春遠持  
杯顧曲登樓賦筆杜郎才減前歡已隔殘照  
但耿耿臨高望眼遡流紅一棹歸時半蟾弄  
晚

梅花引次韻簋房賦落梅

瑤妃鸞影逗仙雲玉成痕麝成塵露冷鮫房

清淚霰珠零步繞羅浮歸路遠楚江晚賦宮  
斜招斷魂酒醒夢醒惹新恨褪素妝愁沈  
粉翠禽夜冷舞香惱何遜多情委珮殘鈿空  
想墜樓人欲挽湘裙無處覓倩誰爲寄江南  
萬里春

瑞鶴仙

寄閒結瑤臺出花柳半空閒遠迎  
雙塔下瞰六橋標之曰湖山繪幅  
霞翁領客落成之初筵翁俾余賦

詞主賓皆賞音酒方行寄閒出家  
姬侑樽所歌則余所賦也調閒婉  
而辭甚習若素能之者坐客驚詫  
敏妙爲之盡醉越日過之則已大  
書刻之危棟間矣

翠屏圍畫錦正柳纖煙綃花明春鏡層欄幾  
回凭看六橋鶯曉兩堤鷗暝晴嵐隱隱映金  
碧樓臺遠近謾曾誇萬幅丹青畫筆畫應難  
盡那更波涵月彩露裛蓮妝水描梅影調

朱弄粉憑誰寫四時景問玉匳西子山眉波  
盼多少濃施淺暈算何如付與吟翁緩評細  
品

倚風嬌近填霞翁譜賦大花

雲葉千重麝塵輕染金縷弄嬌風軟霞綃舞  
花國選傾城暖玉倚銀屏綽約娉婷淺素宮  
黃爭嫵生怕春知金屋藏嬌深處蜂蝶尋  
芳無據醉眼迷花映紅霧修花譜翠毫夜溼  
天香露

英臺近

燭搖花香裊穗獨自柰春冷過了收燈纔始  
作花信無端雨外餘醒鶯邊殘夢又還動惜  
芳心性忍重省 幾多綠意紅情吟牋倩誰  
整香減春衫老却舊荀令小樓深閉東風曲  
屏斜倚知他是爲誰成病

浪淘沙

芳草碧茸茸染恨無窮一春心事雨聲中窄  
索宮羅寒尚悄閒倚薰籠 猶記粉欄東同

醉香叢金鞍何處驟驊驄  
裊裊綠窗殘夢斷  
紅杏東風

浣溪沙

不下珠簾怕燕嗔  
旋移芳檻引流鶯  
春光却早又中分  
杏花無煙然綠暗  
梨花如雪冷  
清明冶游天氣  
冶游心

浣溪沙

絲雨籠煙織晚晴  
睡餘春酒未全醒  
翠鈿輕脫隱香痕  
生怕柳絲縈舞蝶  
戲拋梅彈打

啼鶯最難消遣是殘春

齊天樂

丁卯七月既望余偕同志放舟邊  
涼於三匯之交遠脩太白采石坡  
仙赤壁數百年故事游興甚逸余  
嘗賦詩三百言以紀清適座客和  
篇交屬意殊快也越明年秋復尋  
前盟於白荷涼月閒風露浩然毛  
髮森爽遂命蒼頭奴橫小笛於枕



尾作悠揚杳渺之聲使人真有乘  
槎飛舉想也舉白盡醉繼以浩歌  
清谿數點芙蓉雨蘋颺泛涼吟艦洗玉空明  
浮珠沆瀣人靜籟沈波息仙潢只赤想翠宇  
瓊樓有人相憶天上人間未知今夕是何夕  
此生此夜此景自仙翁去後清致誰識散  
髮吟商簪花弄水誰伴涼宵橫笛流年暗惜  
怕一夕西風井梧吹碧底事閒愁醉歌浮大  
白

大酺春陰懷舊

又稀歸啼荼蘼謝寂寂春陰池閣羅窗人病  
酒柰牡丹初放晚風還惡燕燕歸遲鶯鶯聲  
嬾閒睂秋千紅索三分春過二尚剩寒猶凝  
翠衣香薄傷鵲徑鸚籠一池萍碎半簷花落  
最憐春夢弱楚臺遠空負朝雲約謾念想  
清歌錦瑟翠筦瑤樽幾回沈醉東園酌燕麥  
菟葵恨倩誰訪畫欄紅藥況多病腰如削相  
如老去賦筆吟牋閒却此情怕人問著

霓裳中序第一次簋房韻

湘屏展翠疊恨入宮溝流怨葉缸冷金花暗  
結又雁影帶霜蛩音淒月珠寬腕雪嘆錦牋  
芳字盈篋人何在玉簫舊約忍對素娥說愁  
切夜碪幽咽任帳底沈煙漸滅紅蘭誰采  
贈別洛汜分綃漢浦遺玦舞鸞光半缺最怕  
聽離弦乍闋凭闌久一庭香露桂影弄棲蝶  
過秦樓避暑次甯雲韻

紺玉波寬碧雲亭小冉冉水楓香細魚牽翠

帶燕掠紅衣雨急萬荷喧睡臨檻自采瑤房  
鉛粉霑襟雪絲縈指喜嘶蟬樹遠盟漚鄉近  
鏡匳光裏簾戶悄竹色侵棊槐陰移漏晝  
永簟花鋪水清眠乍足晚浴初慵瘦約楚裙  
尺二曲砌虛庭夜深月透龜紗涼生蟬翅看  
銀潢瀉露金井啼鴉漸起

聲聲慢

逃禪作梅瑞香水仙字之曰三香  
瑤臺月冷珮渚煙深相逢共話淒涼曳雪牽

雲一般淡雅梳妝樊姬歲寒舊約喜玉兒不  
負蕭郎臨水鏡看清鉛素靨真態生香長  
記湘皋春曉仙路迴冰鈿翠帶交相滿引臺  
杯休待怨蘼吟商淩波又歸甚處問蘭昌何  
似唐昌春夢好倩東風留駐瑣窗

聲聲慢

逃禪作菊桂秋荷目之曰三逸

妝額黃輕舞衣紅淺西風又到人間小雨新  
霜萍池蘚徑生寒輸他漢宮姊妹燦星鈿霞

步瀛集卷之二  
珮珊珊涼意早正金盤露潔翠蓋香殘 三  
十六宮秋好看扶疎仙影伴月長閒寶絡風  
流何如細蘂堪餐幽香未應便減傲清霜正  
自宜看吟思遠賦東籬還賦小山

風入松立春日即席次寄閒韻

柳梢煙軟已瓊瓏嬌眼試東風情絲又逐青  
絲亂剩寒輕猶戀芳櫳筍玉新裁早燕杏鈿  
時引晴蜂 當時蘭柱繫花驄人在小樓東  
鶯嬌戲索迎春句愛露牋新染香紅未信閒

情便嬾探花拚醉瓊鍾

浪淘沙

柳色淡如秋。蝶懶鶯羞。十分春事九分休。開盡棟花寒尚在。怕上簾鉤。京洛少年游。誰念淹畱。東風吹雨過西樓。殘夢宿醒相合就。一段新愁。

鷓鴣天

相傍清明晴便慳。閉門空自惜花殘。海棠半坼難禁雨。燕子初歸不耐寒。金鴨冷。錦鴛

閒銀缸空照小屏山翠羅袖薄東風峭獨倚  
西樓第幾欄

夜行船

寒菊欹風棲小蝶簾櫳靜半規涼月夢不分  
明恨無憑據腸斷錦牋盈篋哀角吹霜寒  
正怯倚瑤箏暗愁誰說寶獸頻添玉蟲時翦  
長記舊家時節

齊天樂

曲屏遮斷行雲夢西樓怕聽疎雨硯凍凝華



香寒散霧呵筆慵題新句長安倦旅歎衣染  
塵痕鏡添秋縷過盡飛鴻錦牋誰爲寄愁去  
簫臺應是怨別曉寒梳洗懶依舊眉嫵酒  
滴爐香花圍座暖閒却珠鞦柱芳心謾語  
悵柳外游韁繫情何許暗卜歸期細將梅蕊  
數

滿庭芳賦湘梅

玉沁脣脂香迷眼纈肉紅初映仙裳湘臯春  
冷誰翦茜雲香疑是潘妃乍起霞侵臉微印

宮妝還疑是壽陽凝醉無語倚含章  
絳綃清淚冷東風寄遠愁損紅娘笑李凡桃俗蝶  
喜蜂忙莫把杏花輕比怕杏花不敢承當飄  
零處還隨流水應去誤劉郎

清平樂次甯雲韻

吹梅聲咽簾捲初弦月一寸春霏銷蕙雪愁  
染垂楊帶結畫橋平接金沙軟紅淺隔兒  
家燕子未歸門掩晚妝空對菱花

清平樂再次前韻

晚鶯嬌咽庭戶溶溶月一樹湘桃飛茜雪紅  
豆相思漸結看看芳草平沙游韉猶未歸  
家自是蕭郎飄蕩錯教人恨楊花

乳燕飛

辛未首夏以書舫載客游蘇灣徙  
倚危亭極登覽之趣所謂浮玉山  
碧浪湖者皆橫陳於前特吾几席  
中一物耳遙望具區渺如煙雲洞  
庭縹緲諸峯矗矗獻狀蓋王右丞

李將軍著色畫也松風怒號暝色  
四起使人浩然忘歸慨然懷古高  
謫舉白不知身世爲何如也溪山  
不老臨賞無窮後之視今當有契  
余言者因大書山楹以紀來遊

波影搖漣甃趁薰風一舸來時翠陰清晝去  
郭軒楹纔數里蘚磴松關雲岫快履齒筇枝  
先後空半危亭堪聚遠看洞庭縹緲爭奇秀  
人自老景如舊來舸去棹還知否問古今

幾度斜陽幾番回首晚色一川誰筦領都付  
雨荷煙柳知我者燕朋鷗友笑拍闌干呼范  
蠡甚平吳却倩垂綸手吁萬古付卮酒

掃花游用清真韻

柳花颺白又火冷飴香歲時荆楚海棠似語  
惜芳情燕掠錦屏紅舞怕裏流芳暗水啼煙  
細雨帶愁去歎寂寞東園空想游處幽夢  
曾暗許柰草色迷雲送春無路翠丸薦俎掩  
清樽謾憶舞蠻歌素怨碧飄香料得啼鵲更

苦正愁。好點春陰。倦簫殘鼓。

龍吟曲賦寶山園表裏畫圖

仙山非霧非煙。翠微縹緲樓臺亞。江蕪海樹  
晴光雨色。天開圖畫。兩岸潮平。六橋煙霽。晚  
鉤簾挂。自元暉去後。雲情雪意。丹青手應難  
寫。花底朝回多暇。倚高寒。有人蕭灑。東山  
杖屨。西州賓客。笑譚風雅。貯月杯寬。護香屏  
暖。好天良夜。樂閒中。日月清時。鐘鼓結春風  
社。

風入松爲謝省齋賦林壑清趣

枇杷花老洞雲深  
流水泠泠藍田誰種玲瓏  
玉土華寒暈碧雲根佳興秋英春草好音夜  
鶴朝禽閒聽天籟靜看雲心境俱清好風  
不負幽人意送良宵一枕松聲四友江湖泉  
石二并鐘鼎山林

鳳棲梧賦生香亭

竹窈花深連別墅  
曲曲回廊小小閒庭宇  
忽地香來無覓處  
杖藜閒趁游蜂去  
老桂懸

秋森玉樹澗底孤芳冉冉吹詩句一掬幽情  
知幾許鉤簾半畝藤花雨

少年游賦涇雲軒

松風蘭露滴厓陰瑤草入簾青玉鳳驚飛翠  
蛟時舞噴薄濺春雲冰壺不受人間暑幽  
碧弄珍禽花外琴臺竹邊棊墅處處是閒情

西江月酴醾閣春賦

花氣半侵雲閣柳陰近隔春城畫闌明月按  
瑤箏醉倚滿身芳影翠格素虬晴雪錦籠



紫鳳香雲東風吹玉滿閒庭二十四簾春靚  
清平樂橫玉亭秋倚

詩情畫意只在闌干外雨露天低生爽氣一  
片吳山越水宮煙醉柳春晴海風洗月秋  
明喚取九霞飛珮夜涼跨鶴吹笙

朝中措東山基墅

桐陰薇影小闌干畫永瑣窗閒當日清譚賭  
墅風流猶記東山犀奩象局驚回槐夢飛  
電生寒自有仙機活著未應袖手旁觀

聞鵲喜吳山觀濤

天水碧染就一江秋色黿戴雪山龍起蟄快  
風吹海立數點煙鬟青滴一杼霞綃紅溼  
白鳥明邊颿影直隔江聞夜笛

浣溪沙題紫清道院

竹色苔香小院深蒲團茶鼎掩山扃松風吹  
淨世間塵靜養金芽文武火時調玉軫短  
長清石牀閒臥看秋雲

長清短清  
皆琴曲名

吳山青賦無心處茅亭

山青青水泠泠養得風煙數畝成乾坤一草  
亭雲無心竹無心我亦無心似竹雲歲寒  
同此盟

英臺近賦攬秀園

步玲瓏尋窈窕瑤草四時碧小小蓬萊花氣  
透簾隙幾回翠水荷初蒼厓梅小綺寮掩玉  
壺春色柳屏窄芳檻日日東風幾醉幾吟  
筆曲折花房鶯燕似相識最憐燈影纔收歌  
塵初靜畫樓外一聲秋笛

長相思

燈輝輝月微微  
帳暖香深春漏遲  
夢回聞子規  
欲成詩未成詩  
生怕春歸春又歸  
花飛花未飛

清平樂

小橋縈綠密  
翠藏陰屋千頃  
風煙森萬玉  
依約輞川韋曲  
臨流照影何人  
悠然倚杖看雲  
柳色翠迷山色  
泉聲清和蟬聲

清平樂 杜陵春游圖

錦城春曉苑陌芳菲早可是杜陵人未老日  
日酒迷花惱歸鞦困倚芳醒醒來還有新  
吟人與杏花俱醉春風一路聞鶯

清平樂

靜香真色花與人爭白屬玉雙飛煙月夕點  
破一區秋碧翠羅袖薄天寒笛聲何處關  
山手撚一枝春色東風怨入江南

柳梢青

余生平愛梅僅一再見逃禪真蹟

癸酉冬會疎清翁孤山下出所藏  
雙清圖奇悟入神絕去筆墨畦徑  
卷尾補之自書柳梢青四詞辭語  
清麗翰札遒勁欣然有契於心余  
因戲云不知點胸老放鶴翁同生  
一時其清風雅韻優劣當何如哉  
翁喟曰我知畫而已安與許事君  
其問諸水濱因次韻載名於後庶  
異時開卷索笑不爲生客云

約略春痕吹香新句照影清尊洗盡時妝效  
顰西子不負東昏 金沙舊事休論儘消得  
東風返魂一段真清風前孤驛雪後前村

柳梢青

萬雪千霜禁持不過玉雪生光水部情多杜  
郎老去空惱愁腸 天寒野嶼空廊靜倚竹  
無人自香一笑相逢江南江北竹屋山窻

柳梢青

映水穿籬新霜微月小藥疎枝幾許風流一

聲龍竹半幅驚溪 江頭悵望多時欲待折  
相思寄伊真色真香丹青難寫今古無詩

柳梢青

夜鶴驚飛香浮翠蘚玉點冰枝古意高風幽  
人空谷靜女深幃芳心自有天知任醉舞  
花邊帽敬最愛孤山雪初晴後月未殘時

南樓令次陳君衡韻

開了木芙蓉一年秋已空送新愁千里孤鴻  
搖落江蘺多少恨吟不盡楚雲峯往事夕



陽紅故人江水東  
翠衾寒幾夜霜濃  
夢隔屏山飛不去  
隨夜鵲繞疎桐

南樓令戲次趙元父韻

好夢不分明  
楚雲千萬層  
帶圍寬愁損  
蘭成玉杵元霜纔  
只赤青羽信  
便沈沈水調夜  
樓清清宵誰共  
聽砑牋紅空賦  
傾城幾度欲吟吟  
不就可  
曉是沒心情

聲聲慢九日松澗席

橙香小院桂冷閒庭  
西風雁影涵秋  
鳳撥龍

槽新聲小按梁州鶯吭夜深轉巧凝涼雲應  
爲歌留慵顧曲歎周郎老去鬢改花羞何  
事登臨感慨倩金蕉一洗千古清愁屢舞高  
歌作成陶謝風流人生最難一笑拚樽前醉  
倒方休待醉也帶黃花須帶滿頭

明月引

趙白雲初賦此詞以爲自度腔其  
實即梅花引也陳君衡劉養源皆  
再和之會余有西州之恨因用韻

以寫幽懷

舞紅愁碧晚蕭蕭  
遡回潮竚仙橈風露高寒  
蛩下紫霞簫一雁遠將千萬恨  
懷渺渺翦愁雲風外飄  
酒醒未醒香旋銷  
采江蘺吟楚招清徽芳筆  
梅魂冷月影空描錦瑟瑤樽閒  
度可憐宵二十四欄  
愁倚徧空悵望短長亭  
長短橋

明月引

養源再賦余亦載賡

雁霜苔雪冷飄蕭斷魂潮送輕橈翠袖珠樓  
清夜夢瓊簫江北江南雲自碧人不見淚花  
寒隨雨飄愁多病多腰素銷倚清琴調大  
招江空年晚淒涼句遠意難描月冷花陰心  
事負春宵幾度問春春不語春又到到西湖  
第幾橋

六么令次韻劉養源賦雪

癡雲翦葉簷滴夜深悄銀城飛捷翠隴占祥  
豐年報白戰清吟未了寒鵲驚枝曉鶴迷翠

表山陰今日醉臥何人問安道  
交映虛窻  
淨沼不許游塵到誰念絮帽茸裘歎幼安今  
老玉鑑脩眉未掃白雪詞新草冰蟾光皎梅  
心香動閒看春風上瓊島

六么令春雪再和

迴風帶雨凍澀漏聲悄小窻照影虛白幾誤  
鄰雞報千樹天花綻了鵲立通明曉眼空八  
表宮袍帶月醉裏應迷灞陵道風靜瓊林  
翠沼片片隨春到吟韉十里新堤怪四山青

老玉唾珠塵怕掃句冷池塘草白天寒皎飛  
瓊何在夢覓梨雲度仙島

謁金門次西麓韻

芳事晚數點杏鈿香淺惻惻輕寒風翦翦錦  
屏春夢遠 穉柳拖煙嬌軟花影暗藏深院  
初試輕衫并畫扇牡丹紅未展

好事近次梅谿寄別韻

輕翦楚臺雲玉影半分秋月一餉淒涼無語  
對殘花么蝶 碧天愁雁不成書郎意似秋

葉閒展鴛綃殘譜捲淚花雙疊

聲聲慢柳花詠

燕泥沾粉魚浪吹香芳堤十里新晴靜巷游  
絲花邊裊裊扶春多情最憐漂泊記章臺曾  
綰青青堪愛處是撲簾嬌軟隨馬輕盈長  
是河橋三月做一番晴雪惱亂詩魂帶雨沾  
衣羅襟點點離痕休綴潘郎鬢影怕綠窻年  
少人驚捲春去翦東風千縷碎雲

憶舊游次韻篋房有懷東園

記花陰映燭柳影飛梭庭戶東風綵筆爭春  
豔任香迷舞袖醉擁歌叢畫簾靜掩芳晝雲  
翦玉璫瓏柰恨絕冰弦塵銷翠譜別鳳離鴻  
鶯籠怨春遠但翠冷閒堦墜粉飄紅事逐  
華年換歎水流花謝燕去樓空繡鴛暗老薇  
徑殘夢繞雕櫳悵寶瑟無聲愁痕沁碧江上  
孤峯

水龍吟次陳君衡見寄韻

燕翎誰寄愁榆天涯望極王孫草新煙換柳



光風浮蕙餘寒尚峭倚杖看雲翦燈聽雨幾  
番詩酒歎長安倦客江南舊恨飛花亂清明  
後堤上斜陽風驟散香綿輕霑袖麴塵  
兩岸紋波十里暖蒸香透海闊雲深水流春  
遠夢魂難勾問鶯邊按譜花前覓句解相思  
否

水龍吟次張斗南韻

舞紅輕帶愁飛寶韉暗憶章臺路  
陰香醉雨吹簫門巷飄梭院宇立盡殘陽  
眼迷晴樹夢

隨風絮歎江潭冷落依舊恨人空老柳如  
許錦瑟華年暗度賦行雲空題短句情絲  
繫燕么弦彈鳳文君更苦煙水流紅暮山凝  
紫是春歸處悵江南望遠蘋花自采寄將愁  
與

蘋洲漁笛譜卷二

徵招 九日登高

江蘼搖落江楓冷  
霜空雁程初到  
萬景正悲涼  
柰曲終人杳  
登臨嗟老矣  
問今古清愁多少  
一夢東園十年心事  
恍然驚覺  
腸斷紫霞深知  
音遠寂寂怨

琴淒調短髮已無多怕西風吹  
帽黃花空自好問誰識對花懷  
抱楚山遠九辯難招更晚煙殘  
照

酹月 中秋對月

奩霏淨洗喚素娥睡起平分秋

色雁背風高霜兔冷露脚侵衣  
香濕銀浦流雲珠房迎曉鬢影  
霜爭白玉尊良夜與誰同醉瑤  
席忍記倚桂分題簪花籌  
酒處處成陳跡十二樓空環珮  
杳惟有孤雲知得如此江山依

然風月月底人非昔知音何許  
淚痕空沁愁碧

昔登

霞翁之門 翁爲予言

草窻樂府妙天下因請其所  
賦觀之不寧惟協比律呂而

意味迴不凡花閒柳氏真可  
爲興臺矣翁之賞音信夫  
近觀徵招酹月之作淒涼掩  
抑頓挫激昂此時此意猶宋  
玉之悼屈平也歟一唱三歎  
使人泣然增疇昔之感因為


書之以識予懷云王楠



宛委別藏

遺山先生新樂府

臺灣商務印書館發行



書中首葉印章集印於此

遺山先生新樂府卷第一

水調歌頭十首

少室玉華谷月夕與希顏欽叔飲醉中賦此玉華詩老宋洛陽耆英

劉几伯壽也劉有二侍妾名萱草芳草吹笛石城瓊壁少室三十六峯之名也

山家釀初熟取醉不論錢清溪留飲三日魚鳥亦欣然  
見說玉華詩老袖有忘憂萱草牛背穩於船鐵笛久埋  
沒雅曲意誰傳坐蒼苔歌亂石耿無眠長松夜半悲  
嘯笙鶴下遙天天上金堂玉室地下石城瓊壁別有一  
山川把酒問明月今夕是何年

二與李長源遊龍門

灘聲蕩高壁秋氣靜雲林迴頭洛陽城闕塵土一何深

前日神光牛背今日春風馬耳因見古人心一笑青山  
底未受二毛侵 問龍門何所似似山陰平生夢想佳  
處留眼更登臨我有一卮芳酒喚取山花山鳥伴我醉  
時吟何必絲與竹山水有清音

三 緱山夜飲

石壇洗秋露喬木擁蒼煙緱山七月笙鶴曾此上賓天  
為問雲間崧少老眼無窮今古大樂幾人傳宇宙一丘  
土城郭又千年 一襟風一片月酒樽前王喬為汝轟  
飲留看醉時顛杳杳白雲青嶂蕩蕩銀河碧落長袖得  
迴旋舉手謝浮世我是飲中仙

四

興定庚辰六月望予與河南元好問趙郡李獻能同遊玉華谷將歷崧前諸剎因過少姨祠遂周行廊廡得古仙人詞壁間然其首章直屋漏雨為所漫剝殆不能辨磴木石而上拂拭涿滌迨視者久之始可完讀觀其體則柏梁事則終始二漢字畫在鍾王之間東井又元鼎所都幽州必賢子虞也夫眷眷不忘幽州者非吾田疇尚誰歟田復所事之雖却曹瞞之賞衰俗波蕩中挺挺有烈丈夫語氣其死而不怠益無疑其能道此語亦無疑觀者不當以文體古今之變而疑仙語也噫仙山靈岳宜有閑行博大真人往來其間而世人莫之識也予三人乃今見之夫豈偶然哉再拜留迹以附知音者之末云渾源雷淵題

仙人詞今載于此  
夢入雲山宮闕幽  
鷺鷥同侶鴛鳳流  
桂月竟夜  
光不收世俗擾擾  
成羈湫醉飛星馭  
觀金虬八  
仙浪迹追真遊龜  
玉筌蹄四十秋摩  
霄注壑湏  
人求覓劍如或笑  
刻舟陽燧非無鹿  
里儔元鼎  
以來虛崑邱東井  
徒勞冠帶修松餐  
竹飲度蜃

樓崧頂坐嘯垂直鉤  
祇應慙愧劉幽州

雲山有宮闕浩蕩玉華秋何年鸞鷟同侶清夢入真游  
細看詩中元鼎似道區區東井冠帶事崑邱壞壁浣風  
雨醉墨失蛟虬問詩仙緣底事愧幽州知音定在何  
許此語為誰留世外青天明月世上紅塵白日我亦厭  
囂湫一笑拂衣去崧頂坐垂鉤

五典欽叔飲時予以同州錄事判官入館司之語

長安夏秋雨泥潦滿街衢先生閉戶轟飲隣屋厭歌呼  
慚愧君家兄弟半世相親相愛知我是狂夫禮法略苛  
細言語任乖踈判司官一囊米五車書騎驢冠蓋叢

裏鞍馬避僮奴只有平生親舊歡笑窮年竟日未必古人如酒賤可頻置時為過吾廬

六

賦德新王犬玉溪溪在嵩前費庄兩山絕勝處也

空濛玉華曉蕭灑石淙秋崧高大有佳處元在玉溪頭  
翠壁丹崖千丈古木寒藤兩岸村落帶林邱今日好風  
色可以放吾舟百來年算惟有此翁遊山川邂逅佳  
客猿鳥亦相留父老鷄豚鄉社兒女籃輿竹几來往亦  
風流萬事已華髮吾道付滄洲

七 賦三門津

黃河九天上人鬼瞰重關長風怒捲高浪飛灑日光寒

峻似呂梁千仞壯似錢唐八月直下洗塵寰萬象入橫  
潰依舊一峯閑 仰危巢雙鵠過杳難攀人間此險何  
用萬古祕神姦不用燃犀下照未必飲飛強射有力障  
狂瀾喚取騎鯨客撾鼓過銀山

八史館夜直

形神自相語咄諾汝來前天公生汝何意寧獨有奇偏  
萬事麓踈潦倒半世棲遲零落甘受衆人憐許汜卧牀  
下趙壹倚門邊 五車書都不博一囊錢長安自古岐  
路難似上青天鷄黍年年鄉社桃李家家春酒平地有  
神仙歸去不歸去鼻孔有誰穿



九新長壽齋

蒼烟百年木春雨一溪花移居白鹿東  
掩家具滿樵車舊有黃牛十角分  
去聲得山田一曲涼薄了生涯一笑顧  
兒女今日是山家簿書叢鈴夜掣鼓  
晨撾人生一枕春睡辛苦趁蜂衙  
竹里藍田山下草閣百花潭上千古  
占烟霞更看商於路別有故侯瓜

十西京汜水故城登眺

牛羊散平楚落日漢家營龍拏虎  
擲何處野蔓冒荒城遙想朱旗西  
指萬里風雲奔走慘澹五年兵天  
地入鞭箠毛髮凜威靈一千年成  
率路幾人經長河浩浩東

注不盡古今情誰謂麻池小豎偶解東門長嘯取次論  
韓彭慷慨一樽酒宵次若為平

滿江紅十首 崧山中作

天上飛鳥問誰遣東生西沒明鏡裏朝為青鬢暮為華  
髮弱水蓬萊三萬里夢魂不到金銀闕更幾人能有謝  
家山飛仙骨 山鳥嘆林花發玉杯冷秋雲滑彭殤共  
一醉不爭毫末鞭石何年滄海過三山只是樽中物暫  
放教老子據口牀邀明月

二 內鄉作

老樹荒臺秋興動悠然獨酌秋也老江山憔悴鬢華先

覺人到中年原易感眼看華屋歸零落笑世間惟有醉  
鄉民平生樂 凌浩蕩觀寥廓月為燭雲為幄儘百川  
都釀不供杯杓身外虛名將底用古人已錯今尤錯喚  
野猿山鳥一時歌休休莫

三 內鄉半山亭浮休居士張芸叟窪尊石刻在焉

江上窪尊人道有浮休遺迹尊俎地江山如畫百年岑  
寂白鶴重來城郭在山花山鳥渾相識更與君載酒半  
山亭追疇昔 人易老時難得歡未減悲還及身前與  
身後杳無終極一笑何須留故事千年誰復知今日拚  
醉來橫卧隴頭雲林間石

四方城商帥國器軍中寄全年李欽用欽用時為西臺掾在長安

漢水方城今古道幾回投迹留滯久浩歌狂醉此心誰  
識渭北清光搖草樹故人對酒應相憶記雨窗相對話  
離憂秋風夕風月笛煙霞展身易老時難得鳥飛天  
不盡野春平碧我夢秦東亭上飲舉頭但見長安日便  
與君重結入關期明年必

五送希顏之官徐州

元鼎詩仙知音少喜君留迹還有恨故山飛去石城瓊  
壁萬里征西天有意四方問舍今何日便金虬飛馭解  
移文知無及淮海地雲雷夕自不負鬚如戟望幕中

談笑隱如勍敵此老何堪丞掾事佳時但要江山筆向  
楚王臺上酒酣時須相憶

六

畫戟清香誰得似韋郎詩筆還又見從容車騎神州西  
北竹馬兒童應有語使君姓字人人識是往時曾護國  
西門金湯壁 千日醉三更席事已去尋無迹對暮涼  
燈火悵然如失萬里功名知未免中年離別尤堪惜恨  
洛陽風雨暗旌旗空相憶

七

枕上吳山隱隱見宮眉脩碧人好在斷腸渾似畫圖相

識羅襪塵香來有信玉簫聲遠尋無迹恨不將春色醉  
仙桃迷芳席 嬋娟月韶華日夢已盡愁仍積江花共  
江草幾時終極錦樹吹殘胡蝶老永綃剪破鴛鴦隻拚  
楚雲湘雨一生休休相憶

八

一枕餘醒厭厭共相思無力人語定小窗風雨暮寒岑  
寂繡被留歡香未減錦書封淚紅猶濕問寸腸能著幾  
多愁朝還夕 春草遠春江碧雲暗澹花狼藉更柳綿  
閑颺柳絲難織入夢終疑神女賦寫情除有文星筆恨  
伯勞東去燕西飛空相憶

九再過水南

問柳尋花津橋路年年寒節佳麗地梁園池館洛陽城  
闕白鶴重來人換世淒涼一樹梅花發記水南昨暮賞  
春回今華髮金縷唱龍香撥雲液煖瓊杯滑料羈愁  
千種不禁掀豁老眼只供他日淚春風竟是誰家物恨  
馬頭明月更多情尋常缺

十三泉醉飲

桃李漫山風日暖朝來開徹東溪上落花流水暮春三  
月一片花飛春意減有花堪折君須折恨百年春事短  
長亭忽忽別金縷唱金焦口休直待芳華歇到綠陰

青子只供愁絕坐上常口樽有酒鏡中莫管頭如雪料  
醉來人說次公狂從渠說

念奴嬌

二首 招因為賦此

欽叔欽用避兵太華絕頂有書見

雲間太華笑蒼然塵世真成何物玉井蓮開花十丈獨  
立蒼龍絕壁九點齊州一盃滄海半落天山雪中原逐  
鹿定知誰是雄傑我夢黃鵠移書洪崖招隱逸興尊  
中發箭筈天門飛不到落日旌旗明滅華屋生在邱山  
零落幾換青青髮人間休問浩歌且醉明月

二 飲渾源岳神仙會

小山招隱恨還丹不到人間豪傑南渡衣冠多盛集蕭



灑蘭亭三月陶冶襟靈留連光景觴詠今無復黃壚雖  
近老懷空感存沒誰辨八表神遊古來登覽此地俱  
湮滅天景雲光搖醉眼興在珠宮瑤闕布席松臺脫巾  
石壁散我蕭蕭髮短歌悲慨海口響振林樾

永遇樂

絕壁孤雲冷泉高竹茅舍相望留滯三年相思千里歸  
夢風烟上天公老大依然兒戲困我世間羈鞅此身似  
扁舟一葉浩浩拍天風浪中臺黃散官倉紅腐換得  
塵容俗狀枕上哦詩夢中得句笑了還惆悵可憐滿鏡  
星星白髮中有利名千丈問何時有酒如川自歌自放

摸魚兒

五首 正月二十七日予與希顏陪馮內翰大遊龍母潭韓吏部釣于龍潭遇雷事

見天封題名即此地也既歸宿于近潭田舍翁家是夜雷雨大作望中潭火光如燭明日旁近

言龍起大槐中父老云正月龍起前此未見也龍潭寺南窪尊馮丈所名

笑青山不解留客林邱夜半掀舉蕭蕭暮景千山雪銀

箭忽傳飛雨還記否又恐似龍潭垂釣風雷怒山人良

苦料只為三年長安道上來與浣塵土 清陰渡渺渺

風煙杖履名山元有佳處山僧乞去聲我溪南地十里瘦

藤高樹私自語更須問窪尊此日誰賓主朝來暮暮去

紫山鳥山花前歌後舞從我醉鄉路

二

乙丑歲赴試并州道逢捕雁者云今日獲一雁殺之矣其脫網者悲鳴不能去竟自投于地而

死予因買得之塋之汾水之上累石為識號曰雁邱時同行者多為賦詩予亦有雁邱辭舊所作為無宮商今為改定云

恨人間情是何物直教生死相許天南地北雙飛客老翅幾迴寒暑歡樂趨離別苦是中更有癡兒女君應有語渺萬里層雲千山暮景隻影為誰去橫汾路寂寞當年簫鼓荒煙依舊平楚招魂楚些何嗟及山鬼自啼風雨天也妬未信與鶯兒燕子俱黃土千秋萬古為留待騷人狂歌痛飲來訪雁邱處

三泰和中大名民家小兒女有以私情不如意赴水者官為踪迹之無見也其後踏藕者得二尸水中衣服仍可驗其事乃白是歲此陂荷花開無不並蒂者沁水梁國用時為錄事判官為李

用章內翰言如此曲以樂府雙蕖怨命篇咀五色之靈芝香生九竅燕三危之瑞露美動七情  
韓偓香奩集  
中自叙語

問蓮根有絲多少蓮心知為誰苦雙花脉脉嬌相向只是舊家兒女天已許甚不教白頭生死鴛鴦浦夕陽無語莫謝客煙中湘妃江上未是斷腸處香奩夢好在靈芝瑞露人間俯仰今古海枯石爛情緣在幽恨不埋黃土相思樹流年度無端又被西風誤蘭舟少住怕載酒重來紅衣半落狼藉卧秋雨

四

憶元龍舊家湖海不應年鬢衰槁翩翩竹馬兒童喜驚

見漢江歸報歸計早黃金印征西已付諸郎了紅雲仙  
島渺千里移春濃薰細染春意已傾倒西溪上玉鏡  
脩眉翠埽題詩曾許誰到溪亭未入奚奴錦望斷綠波  
春草君且道人間世虛名得似歡游好風流未老約款  
段隨車鵠夷載酒迎我霸陵道

五

問樓桑故居無處青林留在祠宇荒壇社散鳥聲口寂  
寞漢家簫鼓春已暮君不見錦城花重驚風雨劉郎良  
苦儘玉壘青雲錦江秀色辦作一邱土西山好滿意  
龍盤虎踞登臨感愴千古當時諸葛成何事伯仲果誰

伊呂還自語緣底事十年來往燕南路征鞍且駐就老  
瓦盆邊田翁共飲攜手醉鄉去

最高樓

商於魯縣北山

商於路山遠客來稀鷄犬靜柴扉東家勸飲薑芽脆西  
家留宿芋魁肥覺重來猿與鶴總忘機問華屋高賢  
誰不戀問美食大官誰不羨風浪裏更安歸雲山既不  
求吾是林泉又不責吾非任年年藜藿飯芰荷衣

玉漏遲

壬辰圍城中有懷浙江別業為欽用弟賦

浙江歸路遶西南仰羨投林高鳥升斗微官世累苦相  
縈繞不入麒麟畫裏又不與巢由同調時自笑虛名負

我平生吟嘯 擾擾馬足車塵被歲月無情暗銷年少  
鍾鼎山林一事幾時曾了四壁秋蟲夜語更一點殘燈  
斜照清鏡曉白髮又添多少

石州慢

赴召史館與德新丈別於岳祠西新店明  
以此寄之

擊筑行歌鞍馬賦詩年少豪舉從渠里社浮沈枉笑人  
間兒女生平王粲而今憔悴登樓江山信美非吾土天  
地一飛鴻渺翩翩何許羈旅 山中父老相逢應念此  
行良苦幾許虛名誤却東家鷄黍漫漫長路蕭蕭兩鬢  
黃塵騎驢漫與行人語詩句欲成時滿西山風雨

二

兒女籃輿田舍老盆隨意林壑三重屋上黃茅賴是秋  
風留著舊家年少也曾東抹西塗髣髴爭信星星却歲  
暮日斜時儘栖遲零落如昨青雲飛蓋追隨傾動故  
都城郭疊鼓凝笳幾處銀屏珠箔夢中身世只知鷄犬  
新豐西園勝賞驚還覺霜葉晚蕭蕭滿疎籬寒雀

聲聲慢 內鄉浙江上作

林間鷄犬江上村墟扁舟處處經過袖裏新詩買斷古  
木蒼波山中一花一草也留教老子婆娑任人笑甚風  
雲氣少兒女情多不待求田問舍被朝吟暮醉慣得  
蹉跎百尺高樓更問平地如何朝來斜風細雨喜紅塵



不到漁蓑一尊酒喚元龍來聽浩歌

洞仙歌

超化巖碧軒得欽叔書有相調之語因代書以寄寺有長明燈龕即所見而言

青錢白壁自買愁腸繞更恨歡狂負年少記陽關圖上  
尊酒留連兒女淚輸與閑人坐釣茂陵多病後懶盡  
琴心無復求凰與同調似清風古殿風動幡搖晴晝永  
惟有龕燈靜照看胡蝶飛來澹無情問牆角戎葵為誰  
凝笑

滿庭芳

正大四年戊子十月汴京遇仙樓酒家楊廣道趙君瑞皆山後人其鄉僧李菩薩者

狂人也常就之借宿每酒客散從外來卧具有閑刺則就之不然赤地亦寢一日天寒甚楊憐其羈窮飲之酒僧若愧焉晨起僧持酒盃出同宿者聞嘆聲少焉僧云增明亭前牡丹開矣速

往看之人在而不信也已乃果有兩花僧亦去  
京師觀者填咽酒壚為之一空楊因獲利不貲  
蓋僧以是報楊也

天上殷韓解羈官府爛游舞榭歌樓開花釀酒來看帝  
王州常見牡丹開候獨占斷穀雨風流仙家好霜天槁  
葉穠豔破春柔狂僧誰借手一盃喚起綠怨紅愁看  
天香國豔梅菊替人羞盡揭紗籠護日容光動玉笋瓊  
舟都人士年年十月常記遇仙游

二同座主閑閑公賦

妝鏡韶華牙籤名品慣看培養經年何人曾見槁葉敗  
芳妍知是毗耶座客三生夢猶有情緣薰香手融春暈

雪來見百花前 嫣然誰為笑珠圍翠繞且共留連待  
詩中偷寫畫裏真傳繡帽擁霜口紫塞瓊肌瑩春滿溫  
泉新聲在梁園異事并記玉堂仙

八聲甘州

同張古人觀許由冢古人  
名潛字仲外

許君祠層崖上崢嶸幽林入清深坐高立少風煙濃淡  
百態變晴陰山下一溪流水不受是非侵寂寞懸瓢地  
黃屋無心 木杪巔屹石冢見人間幾度夕昴朝鋌問  
五兵誰作儲天地更生金百年來神州萬里望浮雲西  
北淚沾襟青山好一尊未盡且共登臨

二

玉京岩龍香海南來霓裳月中傳有六朝圖畫朝朝瓊  
樹步步金蓮明月重簾盡燭幾處鎖嬋娟塵暗秦王女  
秋扇年年一枕餘華夢覺問故家桃李何許爭妍便  
牛羊邱壠白草動蒼煙更誰知昭陽舊事似天教道德  
見伶元春風老擁髭鬢黛寂寞燈前

三

半仙亭藍輿雪中迴黃紬日高眠兒婚女嫁奴耕婢織  
共有佳山綠夢裏松腴釀熟竹港咽冰泉萬古霜空月  
此夜清妍不愛朝臺暮省愛羨陂漁艇杜曲山田更  
昭陽遺稿有意續伶元定誰共舊家研削要裴回顧影

燭花前西歸好春風未老留待明年

蝶戀花

戊辰歲長安中作  
五首

一片花飛春意減  
雨雨風風常恨尋芳晚  
若箇花枝偏入眼  
尊前細問春風揀  
醉裏看花雲錦爛  
只記鶯聲不記紅牙板  
留著佳人鸚鵡醵明朝  
賸把長條挽

二甲申歲南都作

牢落羈懷愁有信  
流水浮生幾見中秋閨  
千古詩壇將酒陣  
一輪明月消磨盡  
八月人間秋滿鬢  
桂樹扶疎更與秋風近  
天上姮娥應有恨  
騎鯨人去無人問

三

白鹿原新齋作

負郭桑麻秋課重十角黃牛分犂得山田種鄉社鷄豚  
人與共春風漸入浮蛆瓮 遠屋清溪醒午夢一榻條  
然坐受雲山供四海虛名將底用一聲啼鳥巖花動

四

春到桃源人不到白髮劉郎誤入紅雲島著意酬春還  
草草東風一夜花如埽 過眼風花人自惱已坐尋芳  
更約明年早天若有情天亦老世間元只無情好

五

同樂舜咨郎中夢梅

梅信初傳金點小翠羽多情儘耐風枝裊乞與吟鞋共  
百繞小窗月暗人聲悄 枕上詩成還自笑萬斛清愁

換得春多少臨水幽姿空自照羅浮山下孤村曉

賀新郎曲為良佐所親賦

赴節金釵促愛絃間泠泠細雨非琴非筑別鶴離鸞雲  
千里風雨孤燈夜哭只雌雄蝶蜂同宿汀樹詩成歸舟  
遠認宮眉隱春山綠哥宛轉淚盈菊吳兒越女皆冰  
玉恨不及徘徊星漢流光相屬破鏡何年清輝滿寂寞  
佳人空谷人世事尋常翻覆入塞新聲愁未了更傷心  
聽得江南曲□□□醉紅燭

醉花陰

候館清燈淡相對夜迢迢無奈掩淚惜分飛好夢空迴

留得閑愁在 同心易綰雙羅帶只連環難解且莫望  
歸鞍儘眼西山人更西山外

鳳凰臺上憶吹簫

寶靨留香錦書封淚要教惱亂愁腸恨鏡鸞雙舞辜負  
歡狂日月東城望眼俱夢雲煙樹微茫人何處濃陰靜  
院耕月幽窗 東風萬紅千紫算只有寒梅瘦得何郎  
想淡妝無語孤影昏黃好在藍橋舊路也便水□□□  
□□□□□□□□□□□□□□□□□□□□□□□□□□□□

遺山先生新樂府卷第一



遺山先生新樂府卷第二

臨江仙 自洛陽往孟津道中作

今古北邙山下路黃塵老盡英雄人生長恨水長東幽  
懷誰共語遠目送歸鴻 蓋世功名將底用從前錯怨  
天公浩歌一曲酒千鍾男兒行處是未要論窮通

二 飲昆陽官舍有懷德新丈

世故迫人無好況酒盃今日初拈昆陽城下酹蒼蟾乾  
坤悲夜永笳鼓覺秋嚴 夢寐玉溪溪上路行枝斜出  
青帘故人白髮未應添浩歌風露下相望一掀髯

三 寄德新丈

自笑此身無定在北州又復南州買田何日遂歸休向  
來元落落此去亦悠悠 赤日黃塵三百里嵩邱幾度  
登樓故人多在玉溪頭清泉明月曉高樹晚蟬秋

四

自笑此身無定在風蓬易轉孤根羨君歸意滿離尊眼  
中茅屋口稚子已迎門 迴首對牀燈火處萬山深裏  
孤村故人天末賦招魂新詩憑寄取憔悴不須論

五 內鄉寄崧前故人

昨夜半山亭下醉窪尊人日留題放船直到浙江西水  
壺天上下雲錦樹高低 世上紅塵爭白日山中太古

熙熙外人初到故應迷桃花三百里渾是武陵溪

六 夏節秋林在內鄉北山

夏館秋林山水窟家家林影湖光三年閑為一官忙薄  
書愁裏過笋蕨夢中香 父老書來招我隱臨流已蓋  
茅堂白頭兄弟共論量山田尋二頃他日作桐鄉

七 與欽叔飲二首

邂逅一尊文字飲春風為洗愁顏花枝入鬢笑詩斑登  
臨千古意天澹夕陽閒 南去北來行老矣人生茅屋  
三間何人得似謝東山紫簫明月底高竹倚風鬟

八

明月清風無盡藏平生老子南樓閣閑談笑說封侯誰  
能知許事一笑去來休舊見輞川圖畫裏十年辜負  
歡游百金早晚得菟裘與君成二老來往亦風流

九 孟津河山亭同欽叔賦因寄希顏兄

試上古城城上望水光天影相涵都將形勝入高談河  
山君與我獨恨少髯叅造物戲人兒女劇狙公暮四  
朝三百年都合付醺酣人家誰有酒吾欲典春衫

十

世事悠悠天不管春風花柳爭妍人家寒食盡藏煙不  
知何處火來就客心然千里故鄉千里夢高城淚眼

遙天時光流轉鴈飛邊  
今春看又過何日是歸年

十一

相下與王以道飲席間走筆為賦王予東曹掾時同舍郎也

一段江山英秀氣  
風流天下星口煙花故國五雲鄉  
只知心事在爭向  
鬢毛蒼千古西陵歌舞地興來忘却  
悲涼相逢一醉莫停觴  
東山看老去湖海永相望

十二

醉眼紛紛桃李過  
雄蜂雌蝶同時一生心事杏花詩小  
橋春寂寞風雨鬢成絲  
天上鸞膠尋不得直教吹散  
胭脂月明千里少姨祠  
山中開較晚應有背陰枝

十三

葉葉荷花口處好大明湖上新秋紅妝翠蓋木蘭舟江  
山如畫裏人物更風流 千里故人千里月三年辜負  
歡游一盃白酒寄離愁殷勤橋下水幾日到東州

十四

紫玉雙華相照映錦花仍是瓊兒天邊誰與慰相思洗  
妝無別物只有斷腸詩 水北水南渾一夢眼中紅袖  
烏絲春風同是可憐枝爭教歌酒興不似洛陽時

十五 贈仲經女子楚楚

阿楚新年都六歲掌中一捻嬌春詩中有筆畫難具芝  
香雲作朶魚細錦為鱗 舊說張門多靜女更和靈照

情親外家姓誘談休遣孔兄嗔異時看小妹林下謝夫人

十六

張光甫家兒子咬驢

膝下添丁郎小小鵷雛彩鶴豔初勻書堂合與孟家隣  
誦詩琴解口論學墨沾脣頭玉峴峴眉刷翠更將秋  
水為神看花留待百年春金鞍南陌上驚動洛陽人

十七

連日湖亭風色好今朝賞徧東城主人留客過清明小  
桃如欲語楊柳更多情為愛暮雲芳草句一杯聊聽  
新聲水流花落嘆浮生故園春更晚時節已啼鶯

十八 贈答飛卿弟

壯歲論交今晚歲只君知我平生六年相望若為情  
呂安思叔夜殘月配長庚 濟上買田堪共隱嵩邱朝暮  
陰晴紫雲仙李白雲兄風流成二老林下看昇平

十九

唐子西酒名齊物論又曰養生主

誰喚提壺沽美酒浮生多負歡游窗明窗暗百年休涼  
風吹鴈過春水帶花流 仰視浮雲空自誑往還歲月  
悠悠三山那有鳳麟洲一盃齊物論千古醉鄉侯

三奠子

同國器帥良佐仲澤置酒南陽故城

上高城置酒遙望春陵興興與廢兩虛名江山埋王氣草



木動威靈中原鹿千年後儘人爭  
風雲寤寐鞍馬生  
平鐘鼎上幾書生軍門高密策田畝卧龍畊南陽道西  
山色古今情

二離南陽後作

悵韶華流轉無計留連行樂地一淒然笙歌寒食後桃  
李惡風前連環玉迴文錦兩纏綿芳塵未遠幽意誰  
傳千古恨再生緣閑衾香易冷孤枕夢難圓西窗雨南  
樓月夜如年

行香子浙江上作

漫漫晴波澹澹雲羅傍春江是處紅過桃花解笑楊柳

能歌儘百年身千古意兩蹉跎 酒惡無聊詩苦成魔  
只閑情不易消磨幾人樵逕何處山阿恨夕陽遲芳草  
遠落紅多

江月晃重山 初到崧山時作

塞上秋風鼓角城頭落日旌旗少年鞍馬適相宜從軍  
樂莫問所從誰 候騎纔通薊北先聲已動遼西歸期  
猶及柳依依春閨月紅袖不須啼

感皇恩 洛西為劉兄景元賦秋蓮曲

金粉拂霓裳凌波微步瘦玉亭亭依秋渚澹香高韻費  
盡一天清露惱人容易被西風誤 微雨岸花斜陽汀

樹自惜風流怨遲暮珠簾清竹應有阿溪新句斷魂誰  
解與煙中語

二

夢寐見并州今朝身到未怕清汾照枯槁百年狂興盡  
與家山傾倒黑頭誰辨得歸來早梁苑綠波長安春  
草惆悵行人暗中老故人相送記得臨行曾道故園行  
樂地依然好

三 壽韓侯恬然

水上覓紅雲雲藏仙島雲外晴峰翠於埽東園行樂一  
洗山林枯槁萬金誰辨得安閑早石上玉芝松間瑤

草容易休教使君老壽杯宮袖醉眼風荷翻倒錦堂花  
與月年年好

四張侯壽席此州樂府垂楊一曲方盛

天外想春來春來天上樂府垂楊新動唱扁舟西子併  
與雲帆無恙五湖將底用黃金像水閣靖深晴樓蕭  
爽絲竹留教助清賞松腴仙酎萬斛鷄泉供釀壽杯先  
領取山中相

促拍醜奴兒 口閑閑公

風雨替花愁風雨罷花也應休勸君莫惜花前醉今年  
花謝明年花謝白了人頭乘興兩三甌揀溪山好處

追游但教有酒身無事有花也好無花也好選甚春秋

二學閑閑公體

朝鏡惜蹉跎一年年來日無多無情六合乾坤裏顛鸞  
倒鳳撐霆裂月直被消磨 世事飽經過算都輸暢飲  
高歌天公不禁人間酒良辰美景賞心樂事不醉如何  
三賀人生子

朱麝掌中香可憐兒初浴蘭湯靈椿未老丹枝秀東隣  
西舍排家助喜沽酒牽羊 天與讀書郎便安排富貴  
文章高門自有容車日明年且看青衫竹馬雁雁成行

四

青玉案

浣溪沙

百折清泉遶舍鳴隔年楊柳綠陰成藕花多處一舟橫

驚  
行處自由皆樂事得來無用是虛名等閑榮辱不須

二宿孟津官舍

一夜春寒滿下廳獨眠人起候明星娟娟山月入疎櫺  
萬古風雲雙短髻百年身世幾長亭浩歌聊且慰飄  
零

三外家種德堂

墻外桑麻雨露深堂前桃李有新陰高門因見古人心  
三世讀書無白屋一經教子勝黃金小鄒先與喚瓊  
林

四史院得告歸西山

萬頃風煙入酒壺  
西山歸去一狂夫  
皇家結網未曾疎  
情性本宜閑處著  
文章自付用時無  
醉來聊為鼓隤胡

五集句

芍藥初開百步香  
小闌幽逕隔長廊  
好花都屬富家郎  
此樂莫教兒輩覺  
老夫聊發少年狂  
高燒銀燭照紅妝

六 往年宏辭御題有西山晴雪詩

日射雲間五色芝  
鴛鴦宮瓦碧參差  
西山晴雪入新詩



焦土已經三月火殘花猶發萬年枝他年江令獨來時

七

湖上春風散客愁芳洲煙景記曾游人家渾似玉溪頭  
楊柳青旗沽酒市桃花流水釣魚舟紅塵鞍馬幾時休

八

錦帶吳鉤萬里行青雲人物舊知名百壺春酒過清明  
渺渺荒陂口井路青青楊柳玉闌情殘陽無語下西陵

九

芳草垂楊長樂坡兩行紅粉一聲歌淋漓襟袖酒痕多  
夢裏翠翹驚墮枕愁邊羅襪見凌波春寒春度夜如  
何

十 記定齋記

夢遶桃源寂寞迴春殘滋味似秋懷多情翻恨酒為媒  
數點雨聲風約住一簾花影月移來小闌幽迳獨徘徊

十一 懷李彥深李濟南人繡江在長白山下

綠綺紅埃試拂絃今人誰與子爭先相逢尊酒合留連

金馬玉堂梁苑客  
岸花汀草繡江船  
舊遊回首又三年

十二別緯文張兄

歌枕寒鴉處處新  
花前雁後數歸程  
小紅燈影鬧春城  
兩地相望今夜月  
一尊不盡故人情  
老懷牢落向誰傾

十三

畫出清明二月天  
山城三月只蕭然  
閉門日日枕書眠  
川下杏花渾欲雪  
山中楊柳不成煙  
春風迴首又明年

南鄉子

一雨浣年芳。燕燕鶯鶯滿洛陽。梨雪漸空桃李過，風光  
恰到風流睡海棠。何處最難忘。楊柳高樓近苑牆。喚  
取分司狂御史，何妨暫醉佳人錦瑟傍。

二

烟草入西州。暮雨千山獨倚樓。不似秦東亭上飲，風流  
翠袖春風兩玉舟。事去重回頭。却是多情不自由。為  
向河陽桃李道，休休青鬢能堪幾度愁。

三

風雨送春忙。爛醉花時得幾場。枝上桃花吹盡也，殘芳

一片春風一片香 少日為花狂老去逢春只自傷回  
首十年歡笑處難忘一曲悲歌淚數行

四

少日負虛名問舍求田意未平南去北來今老矣何成  
一線微官誤半生 孤影伴殘更萬里燈前骨肉情短  
髮抓來看欲盡天明能是青青得幾莖

五

幽意曲中傳總是才情得處偏唱到斷腸聲欲斷還連  
一串驪珠箇箇圓 畫扇綺羅筵韓馬風流在眼前坐  
上有人持酒聽淒然夢裏梁園又一年

六 九日同燕中諸名勝登瓊華故基

樓觀鬱嵯峨瓊島煙光太一波真見銅駝荆棘裏摩娑  
前度青衫淚更多 勝日小婆娑欲賦蕪城奈老何千  
古廢興渾一夢從他且放雲山入浩歌

七 飲東原王若章郎中家

促坐燭華紅春到梅邊蠟蒂融南去北來何限客誰同  
酒令歌籌醉不供 聚散落花風恨煞陵臺望眼中人  
世只除開口笑難逢莫惜金杯到手空

八

花譜得新名一尺紅雲賽落京舊說採蓮張靜婉難憑

楚潤元來更有情  
枕上豔歌聲  
虧煞司空自教成  
前日綠窗今夜夢  
分明宿酒殘妝未五更

謁金門

潛司西齋

羅衾薄  
簾外五更風惡  
醉後題詩渾忘却  
烏啼殘月落  
憔悴何郎東閣  
宿酒不禁重酌  
袖裏梅花春一握  
幽懷無處託

好事近

冬夜有懷

夢裏十年心情味  
夢迴猶惡枕上數行清淚  
被驚烏啼落  
西窗瓶水夜深寒  
梅花瘦如削  
只有一枝春在問  
東君留著

道山集卷之二  
朝中措 永寧時作

連延村落並

反步浪

陽崖川路到山迴竹樹攢成風月溪

塘隔斷塵埃

小亭幽圃醅醖未過芍藥初開驢上一

壺春酒主人莫厭頻來

二

盧溝河上度旃車行路看宮娃古殿吳時花草奚琴塞  
外風沙 天荒地老池臺何處羅綺誰家夢裏口行燈  
火皇州依舊繇華

三

時情天意任論量樂事苦相妨白酒家家新釀黃花日



日重陽 城高望遠煙濃草淡一片秋光故國江山如  
畫醉來忘却興亡

四

醉來長缺為誰彈憔悴入幽燕一帶秦川如畫夕陽仙  
掌空閑 門邊翫骸胷中磊磊何苦人間匹馬明年西  
去看君射虎南山

五 瑞香

御香新拆紫囊封冉冉綠雲叢開晚只嘆寒勒妝成又  
怕晴烘 化工也為花中第一薰染偏濃誰有石家紅  
錦重重圍住春風

六綦君美東海名家大父內翰海陵朝以文章顯  
出刺吾州君美以蔭補嘗令湖城晚得見子石  
桂因為  
賦此

添盆新喜萬家傳滿意擲金錢仙果休嗔生晚靈椿最  
得春偏 隆顙犀角丹砂一拂玉潤松堅看取翰林枝  
葉却如東海當年

七 周帥華堂紫牡丹

芳苞初破紫霞盃香動綠雲堆只道人間花盡爭知天  
上春回 朝吟暮繞使君情重不厭頻來好把韶華留  
住莫教百朵齊開

八 寄楊漕

秋鴻社燕偶相逢  
鞍馬又西東  
辜負水南三月  
安排萬紫千紅  
舊游新夢  
綠波南浦  
黃葉西風  
任是麒麟閣上  
爭如鸚鵡杯中

九

小兒子生適有遺羽陽宮瓦者因以羽陽字之

添丁名字入新收  
一長看過頭  
拾得羽陽宮瓦  
不愁撞透煙樓  
遺山野客  
求田問舍  
夢想南州  
說甚河東三鳳  
安排老口班彪

訴衷情

萬人如海一身藏  
隨例大家忙  
東華軟紅塵土  
培損謝三郎  
蘭若寺玉溪庄  
兩茅堂鷄豚鄉社  
鵝鴨比隣好

箇崧陽

二

升平責望富氏族愁損抱官囚自家本無煩惱鬧處要  
鑽頭 山崦寺水心樓去來休醉歸扶路鼓吹鳴蛙部  
曲黃牛

三

行齋活計五車書真欲釜生魚天公也相料理新得掌  
中珠 看驥子弄鵝雛最憐渠青衫竹馬後日迎門好  
箇高閣

攤破浣溪沙 代贈仲經所親

錦瑟年華燕子樓楚雲湘雨等閑休留在貞元供奉曲  
儘風流 約畧睡痕妝鏡晚留連香韻瑣窗秋總道竹  
西歌吹好去來休

秋色橫空

松夜香凝澹幽姿一洗若下宜城甘腴小苦中山賦千  
古齒頰春生燈花喜缸面清愛竹港水泉落枕聲恰值  
劉綱夫婦此日丹成 雲峰翠展畫屏更晴樓水閣樹  
擁烟橫留連光景中年要歌管陶寫襟靈人間世身外  
名笑朝馬晨鐘夢易驚且留看神仙白晝地行

思仙會 効楊吏部體

人無百年人在作千年計傀儡棚頭看過幾場興廢朱  
顏容易改可惜歡娛地勸君酒唱君歌為君醉 滄溟  
一葉正在橫流際阮籍途窮啼得血流何濟天公老大  
不管人間世莫莫休休莫問甚底

漁家傲

午醉醒來春欲去鶯兒燕子都無語好箇一春行樂處  
花無數寶釵貫酒花前舞 十里驛亭楊柳樹多情折  
斷青青縷春到去時留不住西城日日風和雨

喜遷鶯

雲雷天造快嫖姚玉節生平豪妙野宿貔貅江橫組練

畫角一聲霜曉魚鳥簡書知畏草木威名先到更誰似  
並虎頭飛將封侯差早談笑尊俎地兵衛盡戟燕寢  
凝香好伏櫪雄心缺壺高唱意氣不妨傾倒父子一門  
忠力惟有君恩須報濟時了看郎山長對元勲難老

遺山先生新樂府卷第二

五ノ月

三



遺山先生新樂府卷第三

鷓鴣天 隆德故宮同希顏欽叔知幾諸人賦

臨錦堂前春水波蘭亭亭下落梅多三山宮闕空瀛海  
萬里風埃暗綺羅雲子酒雪兒歌留連風月共婆娑  
人間更有傷心處奈得劉伶醉後何

二 木犀

桂子紛翻浥露黃桂花高韻靜生芳薔薇水潤宮衣軟  
婆律高清月殿涼雲岫句海仙方情緣心事兩難忘  
衰蓮枉悞秋風客可是無塵袖裏香

三 蓮

瘦綠愁紅倚暮煙露華涼冷洗嬋娟含情脉脉知誰怨  
顧影依□定自憐風送雨水連天凌波無夢夜如年  
何時北渚亭邊月狼藉秋風拂盡船

四

零落棲遲感興多酒杯直欲捲銀河人間清鏡悲華髮  
世外仙砵爛斧柯長袖舞抗音歌月明人影兩婆娑  
醉來知被傍人笑無奈風情未減何

五

總道忘憂有杜康酒逢歡處更難忘桃紅李白春千樹  
古是今非笑一場歌浩蕩墨淋浪銀釵編袂滿隣牆

百年得意多能幾去聲與兒曹說醉狂

六 中秋飲倪文仲家蓮花白醉中同李仁欽賦

月窟秋清桂葉丹仙家釀熟水芝殘香來寶地三千界  
露入金莖十二槃天澹澹夜漫漫五湖豪客酒腸寬  
醉來獨跨蒼鸞去太華峰高玉井寒

七

少日驪駒白玉珂靈砂犀角費頻磨西城燈火長安夢  
滿意春風似兩坡流素月澹秋河百年狂興一聲歌  
醉歸扶路人應笑頭上花枝奈老何

八 與欽叔京甫市飲

樓上歌呼倒接羅樓前分手却相攜  
雨前雨後花枝減  
州北州南酒價低  
憐木雁笑醺鷄  
鶴長鳥短幾時齊  
醒來門外三竿日  
卧聽春泥過馬蹄

九

拍塞車箱滿載書  
梁鴻元與世相疎  
只緣携手尋歸計  
不恨埋頭屋壯圖  
蒼玉研古銅壺坐  
看兒輩了耕鋤  
年年此日如川酒  
千尺青松儘未枯

十

長恨簫聲隔粉牆  
爭教移住五雲鄉  
一溪春水闌何事  
流出桃花賺阮郎  
風攪夢月侵牀  
情緣消得海生桑

鴛鴦不鎖黃金殿  
雌蝶雄蜂枉斷腸

十一 效朱希真體

十步宮香出繡簾  
惱人簾底月纖纖  
五花驕馬垂楊渡  
辜負仙郎側帽簷  
秋澹澹酒厭厭  
新詩和恨入香奩  
相思恰似鴛鴦錦  
一夜新涼一夜添

十二 宮體八首

候館燈昏雨送涼  
小樓人靜月侵床  
多情却被無情惱  
今夜還如昨夜長  
金玉煖玉爐香  
春風都屬富家郎  
西園何限相思樹  
辛苦梅花候海棠

十三

翡翠鴛鴦百自由鏡中鸞舞只堪愁庭前花是同心樹  
山上泉分兩下流金絡馬木蘭舟誰家紅袖水西樓  
春風殢殺官橋柳吹盡香綿不放休

十四

天上腰支說館娃眼中金翠有芳華行雲着意留歌扇  
遠柳無情隔鈿車周昉畫洛陽花數枝穠豔落誰家  
春寒恨殺如年夜庭樹陰陰欲暮鴉

十五

小字繚綾寫欲成印來眉黛綠分明水流刻漏何曾住  
玉作彈碁儘未平愁易積夢頻驚閑衾欹枕覺霜清

月明不放寒枝穩夜夜烏啼徹五更

十六

自在晴雲覆苑牆徘徊明月駐清光已看紅袖沾口酒  
猶認宮螺映綺窗金翡翠繡鴛鴦春風花煖柳綿香  
殷勤未口閑情賦不願將身作枕囊

十七

複幕重簾錦作天金荷銀燭夜如年漢皋解佩終疑夢  
緱嶺吹笙恰是仙花一夢柳三眠春風無意惜芳妍  
羅帶細看輕盈態元在腰支阿那邊

十八

八繭吳蠶賸欲眠東西荷葉兩相連一江春水何年盡  
萬古清光此夜圓花爛錦柳烘烟韶華滿意與歡緣  
不應寂寞求凰意長對秋風泣斷絃

十九

好夢初驚百感新誰家歌管隔牆聞殘燈收罷空明月  
臘雪消融更暮雲鶯有伴雁離群西窗寂寞酒微醺  
春寒留得梅花在賸為何郎瘦幾分

二十效東坡體

煮酒青梅入座新姚家池館宋家隣樓中燕子能留客  
陌上楊花也笑人梁苑月洛陽塵少年難得是閑身



殷勤昨夜三更雨，乘醉東城一日春。

二十一

酒興濃於琥珀濃，爭教相望水西東。  
人家寒食清明後，天氣輕煙細雨中。  
花不盡，柳無窮，賞心難是此時同。  
阿連近日歌喉穩，唱得春宵燭影紅。

二十二

短髮如霜久已拚，無冠可挂更須彈。  
初聞古寺多張鬼，又說層冰有熱官。  
閑處坐靜中，看時晴天意酒杯乾。  
籬邊老却陶潛菊，一夜西風一夜寒。

二十三

華表歸來老令威頭皮留住姓名非舊時逆旅黃梁飯  
今日田家白板扉沽酒市釣魚磯愛閑真與世相違  
墓頭未要征西字元是中原一布衣

二十四

拋却浮名恰到閑却因隈嬾得顚預從教道士誇懸解  
未信禪和會熟謾山院靜草堂寬一壺濁酒兩蒲團  
題詩寄與王夫子乘興時來看藥欄

二十五

只近浮名不近情且看不飲更何成三杯漸覺紛華遠  
一斗都澆硯磊平醒復醉醉還醒靈均憔悴可憐生

離騷讀殺渾無味好箇詩家阮步兵

二十六

枕上清風午夢殘  
華胥東望海漫漫  
湖山似要閑身管  
花柳難將病眼看  
三迳在一枝安  
小齋容膝有餘寬  
鹿裘孤坐千峰雪  
耐與青松老歲寒

二十七 村裏黃番緙家中白侍郎石曼卿詩

總道狙公不易量  
朝三暮四儘無妨  
舊時鄴下劉公幹  
今日家中白侍郎  
歌浩蕩酒淋漓  
浪浮雲身世兩相忘  
孤峰頂上青天濶  
獨對春風舞一場

二十八

白白紅紅小樹花春風滿意與鉛華煙霄自屬千金馬  
月旦真成兩部蛙 諸葛菜邵平瓜白頭孤影一長嗟  
南園睡足松陰轉無數蜂兒趁晚衙

二十九

偃蹇蒼山卧北岡鄭莊場圃入微茫即看花樹三春滿  
舊數松風六月涼 蔬近井蜜分房茅齋堅坐有藜牀  
傍人錯比揚雄宅笑煞韓家畫錦堂

三十

薄命妾辭三首

複幕重簾十二樓而今塵土是西州香雲已失金鈿翠  
小景猶殘畫扇秋 天也老水空流春山供得幾多愁

桃花一簇開無主儘着風吹雨打休

三十一

顏色如花盡不成命如葉薄可憐生浮萍自合無根蒂  
楊柳誰教管送迎雲聚散月虧盈海枯石爛古今情  
鴛鴦隻影江南岸腸斷枯荷夜雨聲

三十二

一日春光一日深眼看芳樹綠成陰娉婷盧女嬌無奈  
流落秋娘瘦不禁霜塞濶海煙沉燕鴻何地更相尋  
早教會得琴心了辭盡長門買賦金

三十三

玉立芙蓉鏡裏看  
鉛紅無地著  
邊鸞半衾幽夢香初散  
滿紙春心墨未乾  
深院落曲闌干  
舊歡新恨紆衣寬  
幾時忘得分攜處  
黃葉踈雲渭水寒

三十四

百轉嬌鶯出畫櫳  
一雙胡蝶殢芳叢  
葱蘢花透纖纖月  
暗澹香搖細細風  
情不盡  
夢還空  
歡緣心事淚痕中  
長安西望腸堪斷  
霧閣雲窗又幾重

三十五 山陽七賢堂

沙岸縈回入草泥  
霜餘煙景自悽迷  
樹嫌川近重重掩  
雲要村深故故低  
茅蓋屋  
稻分畦  
何人今日此幽棲

十年來往山陽道只道清溪過馬蹄

踏莎行

微步生塵殘妝暈酒朱門如海空回首東風正有去年  
華柔條去作誰家柳 細雨春寒青燈夜久孤衾未煖  
還分手夢中見也不多時怎生望得長相守

玉樓春

吹臺蕭瑟行雲暮一片雨聲連禁樹正當潘岳感秋時  
又到杜陵懷古處 百年同是紅塵路行近醉鄉差有  
趣坐中誰是獨醒人我醉欲眠卿可去

桃源憶故人 代贈良佐所親

楚雲不似陽臺舊只是無心出岫竹外天寒翠袖寂寞  
啼妝瘦 絃聲宛轉春風手殢得行人病酒明日西城  
回首腸斷江南柳

虞美人題蘇小小圖

桐陰別院宜清晝入座春山秀美人圖子阿誰留都是  
宣和名筆內家收 鶯鶯燕燕分飛後粉澹梨花瘦只  
除蘇小不風流倒挿一枝萱草鳳釵頭

二

櫻桃原是仙郎種次第芳菲動開殘山杏沒都紅一樹  
梨花如雪月明中 三生蝶化南華夢只有情緣重曲



闌幽迳小簾櫳好共埽眉才子管春風

### 小重山

醉盡春風意未闌  
纏頭雙鳳錦  
覓端端多情胡蝶送歸  
鞍揚州夢杳藥薦金槃  
羅幌酒醒寒燈前朱麝淺翠  
螺殘一春心事紵衣寬  
青鸞客樓外日三竿

### 二

酒冷燈青夜不眠  
寸腸千萬縷兩相牽  
鴛鴦秋雨半池蓮  
分飛苦紅淚曉風前  
天遠雁翩翩鴈來人北去  
遠如天安排心事待明年  
無情月看待幾時圓

### 定風波

白水秋田萬頃秋風煙平楚散羊牛莫放相公黃閣去  
留取笑談尊俎也風流華表仙人人不識今夕鹿車  
也到百花洲好把襄江都釀酒為壽壽星光彩動南州  
鄧帥漆水公壽筵遼東大使君  
在焉大有道術時年九十三矣

二

白髮相看老弟兄恨無一語送君行至竟交情何處好  
向道不如行道本無情少日龍門星斗近爭信淒涼  
湖海寄餘生耆舊風流誰復似從此休將文字占時名  
楊叔能將歸淄川與予別於山陽作鷓鴣詞留贈云解  
后梁園對榻眠舊游回首一凄然當時好客誰為最李  
趙風流兩謫仙居接棟橡隣田與君詩酒度殘年飄  
零南北如相避開歲還分壠上泉因用其意荅之李趙

謂閑閑公  
與屏山

三 三鄉光武廟懷故人劉公景元

熊耳東原漢故宮登臨猶記往年同  
底事愛君詩句好  
解道河山浮動酒杯中  
存沒悠悠三十載誰會白頭  
孤客坐書空黃土英雄何處在  
須待醉尋蕭寺哭春風

四

離合悲歡酒一壺  
白頭紅頰醉相扶  
見說德星今又聚  
何處范家亭上會  
周吳造物有情留  
此老人道洛西  
清燕百年無六客  
不爭前與後  
好口龍眠老筆畫新圖

永寧范使君園亭會汝南周國器汾陽任亨父北燕吳  
子英趙郡蘇君顯淄川李德之用東城體擬六客詞

五 兒子中中百晬日作

五色蓮盆玉雪肌青搽紅抹總相宜且道生男何足愛  
爭奈隆顱犀角眼中稀六十平頭年運好投老大兒  
都解把鋤犁醉眼看花驢背上豪放阿齡扶路阿中隨

六

何處如今更有詩爭教風髻見橫枝詩到梅邊誰最似  
除是玉顏寂寞酒清時為向雲間公子道聞早安排  
歡賞惜幽姿十日留花花未過容我醉圍紅袖罵烏絲

一落索 戲王全年鼎玉

人見何郎新來瘦不見天寒翠袖繡被薰香透幾時却

似鴛鴦舊 九十日春光在手可惜歡緣未久去去休  
回首柔條去作誰家柳

採桑子

兒家門戶重重掩郎住牆東枉破春工萬紫千紅一夜  
風 伯勞分背西飛燕何日相逢縱得相逢海濶天高  
處處同

婆羅門引四首

望月

素蟾散彩九秋風露發清妍嫦娥儘有情緣留著三五  
盈盈永夜照憑肩看晚妝臨鏡若箇嬋娟 尋常月圓  
恨都向別時偏幾度郵亭枕上野店尊前珠明玉秀笑

一日相看一日仙人共月長似今年

二過孟津河山亭故基

短衣匹馬白頭重過雒陽城百年一夢初驚寂寞高秋  
雲物殘照半林明澹橫舟古渡落雁寒汀 河山故亭  
人與境兩崢嶸爭信黃壚此日深谷高陵一時朋輩謾  
留在窮途阮步兵尊俎地誰慰飄零

三兗州龍興閣感寓

嶧山霽雪九層飛觀鬱崢嶸風煙畫出新亭老眼來今  
往古天地兩無情但浮雲平野短日蕪城 酒狂步兵  
書與劒此飄零口為雲間鷄犬幾度丹成停盃不語竟

何用千秋身後名休自倚湖海平生

四 亦名菊潭秋

商於六里野潭千古口煙霞靈苗鬱鬱無涯浩蕩青冥  
風露金素發清華散霜叢彌岸月影明沙 仙經浪誇  
種瑶草養鉛砂爭信瓊杯芳薦藥鏡黃芽秋香晚節也  
分到山中宰相家休更羨劉阮桃花

梅花引

牆頭紅杏粉光勻宋東隣見郎頻腸斷城南消息未全  
真拾得楊花雙淚落江水濶年年燕語新 見說金娘  
埋恨處蒺藜沙草不知春離魂一隻鴛鴦去寂寞誰親

唯  
有  
因  
風  
委  
露  
託  
清  
塵  
月  
下  
哀  
歌  
宮  
殿  
古  
暮  
雲  
合  
遙  
山  
入  
翠  
顰

二 同張仲經楊飛卿賦青梅

綠  
華  
仙  
萼  
綵  
雲  
間  
雪  
消  
殘  
擁  
香  
口  
隨  
意  
輕  
勻  
淺  
注  
儘  
高  
閑  
向  
道  
是  
梅  
剛  
不  
信  
更  
誰  
占  
東  
風  
最  
上  
番  
韻  
絕  
秀  
絕  
香  
又  
絕  
口  
恨  
千  
山  
復  
千  
山  
才  
情  
似  
記  
何  
郎  
句  
清  
淚  
班  
班  
寂  
寞  
孤  
村  
籬  
落  
小  
溪  
灣  
脩  
竹  
蕭  
蕭  
霜  
月  
苦  
好  
留  
與  
青  
綾  
護  
曉  
寒

品令

西  
齋  
向  
曉  
窗  
影  
動  
人  
聲  
悄  
夢  
中  
行  
處  
數  
枝  
臨  
水  
幽  
花  
相



照把酒長歌猶記竹間啼鳥 風流易老更常被閑愁  
惱年年春事大都探得歡游多少 一夜狂風又是海棠  
過了

惜奴嬌

畫扇高秋恨塵暗秦王女渺東城春烟綠樹燕子來時  
應解說征鞍處記取未忘得蘭膏香聚 枕上新聲斷  
腸是江南句更行雲無心也住未了情緣算唯有相將  
去去枉輕負梨花暮雨

樂府烏衣怨

舊名點絳脣

香冷雲堦後期紅線如何許謝家兒女解得辭巢語

畫棟珠簾恨不經年住忽忽去岸花汀樹寂寞瀟湘雨

二

繡佛長齋半生在伴蒲團過酒壚橫卧一蹴虛空破

頗笑張顛自謂無人和還知麼醉鄉天大酒裏神仙我

江城子

賦十六首  
壯丹

姚家池館魏家隣上畚春姓名新傾國傾城為雨復為  
雲水北水南無別物金屑粉麝香塵折枝圖上看精  
神見來頻盡來真辦作黃徐無負百年身也待不來花  
下醉嫌笑殺洛陽人

二 儂花間體詠海棠

蜀禽啼血染冰蕤。趁花期。占芳菲。翠袖盈盈，凝笑弄晴暉。比盡世間誰得似，飛燕瘦，玉環肥。一番風雨未應稀。怨春遲。怕春歸。恨不高張紅錦，百重圍。多載酒來連夜看，嫌化作彩雲飛。

三釣壇見嚴光傳

醉來長袖舞鷄鳴。短歌行。壯心驚。西北神州，依舊一新亭。三十六峰長劒在，星斗氣，鬱崢嶸。古來豪俠數幽并。鬢星星。竟何成。他日封侯，編簡為誰青。一掬釣魚壇上淚，風浩浩，雨冥冥。

四寄德新丈

春風花柳日相催  
浙江梅臘前開開遍山桃恰到野酴  
醾商嶺東來三百里紅作陣綠成堆  
半山亭下釣魚臺  
拂層崖坐蒼苔  
林影湖光佳處兩三盃  
恨殺玉溪王老子忙箇甚不同來

五 送人歸舊居

草堂蕭灑浙江頭  
傍林邱買扁舟  
隔岸紅塵無路近  
沙鷗枕上有書尊  
有酒身外事更何求  
暮雲歸鳥仲宣樓  
樊貂裘為誰留  
千古書生那得盡  
封侯好在半山亭  
下路聞未老去來休

六 賦芍藥揚州紅

司花著意壓春魁綠雲堆擁香來冉冉紅鸞十步一徘徊  
花到揚州佳麗種金作屋玉為階 門前腰鼓揭春  
雷倚妝臺儘人催鶯語丁寧空遠百千迴不道惜花人  
欲去看直待幾時開

七

內鄉縣廨芳菊堂前大酴醾架芳香絕異常年  
開時人有見素衣美婦迴視之無有也或者以  
為花神故記之

纖條嫋嫋雪葱龍翠陰重暖香融想是春工滿意與薰  
醲百畹種蘭千畝蕙都辦作一簾風 花間人似玉芙  
蓉月明中下瑤宮只恐行雲歸去捲花空賸著瓊盃斟  
曉露留少住莫匆匆

八崧山中作

衆人皆醉屈原醒笑劉伶酒為名不道劉伶久矣笑螟  
蛉死葬糟邱殊不惡緣底事赴清冷 醉鄉千古一升  
平物忘情我忘形相去羲皇不到一牛鳴若見三閭憑  
寄語尊有酒可全傾

九

二更轟飲四更迴宴餘臺盡鄒枚誰念梁園回首便成  
灰今古廢興渾一夢憑底物寄悲哀 青天蕩蕩鏡奩  
開月光來且裴徊何用東生西沒苦相催世事悠悠吾  
老矣歌一曲盡餘杯

十夢德新丈因及欽叔舊游河山亭

河山亭上酒如川  
玉堂仙重留連  
尤恨春風桃李負芳年  
長記鶯啼花落處  
歌扇後舞衫前  
舊游風月夢相牽  
路三千去無緣  
滅沒飛鴻一綫入  
秋煙  
白髮故人今健否  
西北望一潸然

十一

劉濟川來別同宿會康夢與予過田家飲行及太原作此為寄濟川耳昌諸孫在口上時

乃與伯玉知幾游從

來鴻去燕十年間  
鏡中看各衰顏  
恰待蒙泉東畔買青山  
夢裏隣村新釀熟  
攜竹杖款柴關  
人生誰得老來閑  
記清歡見君難  
長路悠悠回首暮雲還  
斷嶺不遮南

望眼時為我一憑闌

十二 觀別

旗亭誰唱渭城詩  
酒盈卮兩相思  
萬古垂楊都是折殘  
枝  
舊見青山青似染  
綠底事淡無姿  
情緣不到木腸  
兒  
髻成絲更須辭  
只恨芙蓉秋露冷  
胭脂為問世間離  
別淚何日是滴休時

十三

河隄煙樹渺雲沙  
七香車更天涯  
萬古千秋幽恨入琵琶  
想到都門南下望  
金縷暗玉釵斜  
津橋春水浸紅霞  
上陽花落誰家  
獨恨經年培養壯  
丹芽寒雁歸時憑



寄語莫容易損容華

十四

行雲冉冉度關山別時難見時難悵望南風早晚送雲  
還心事情緣千萬劫無計解玉連環夕陽人影小樓  
間曲闌干晚風寒料得而今前後望歸鞍寂寞梨花枝  
上雨人不見與誰彈

十五

杏花開過雪成團惜朱顏負清歡只道今年春意已闌  
珊却是地偏芳信晚紅數點小溪灣碧壺香供挽春  
還一枝間淡相看月落山空誰與護朝寒傳語春風留

客好莫容易便吹殘

十六

東原幕府諸公送予西湖行及陽穀作此為寄

江山詩筆仲宣樓  
樊鄒裘儘風流  
獨恨煙花三月出東  
州愛煞津亭亭口口無一語只相留  
來鴻去雁兩悠悠  
別離愁幾時休得似孤城春水一沙鷗  
寄謝西湖追  
送客分手地莫回頭

遺山先生新樂府卷第三

遺山先生新樂府卷第四

清平樂 杏花

香團嬌小拍拍知多少一樹鈿華春事了銷甚珠圍翠繞  
生紅鬧簇枯枝只愁吹破胭脂說與東風知道杏花不看開時

二游少室清微宮雪溪

溪頭來去坐卧汾溪樹管甚人間無著處已被白雲留住  
生平不置肝腸只今物我都忘說與山中魚鳥相親相近何妨

三太山上作

江山殘照落舒清眺澗壑風來號萬竅盡入長松悲  
嘯井蛙瀚海雲濤醯鷄日遠天高醉眼千峯頂上世  
間多少秋毫

四 罷鎮平歸西山草堂

垂楊小渡處處歸鞍駐八十田翁良愧汝把酒千言萬  
語細侯竹馬相從笑渠奔走兒童十里村簫社鼓依  
然傀儡棚中

五

離腸宛轉瘦覺妝痕淺飛去飛來雙語燕消息知郎近  
遠樓前小雨珊珊海棠簾幕輕寒杜宇一聲春去樹

頭無數青山

六

蘭膏香聚醉枕聞低語一刻春宵流水去訴得離情幾  
許桃花紅淺紅深五年烟草歸心留得一枝春在爭  
教綠葉成陰

七

香凝嬌聚玉立臨春樹細看司花留意處都在輕勻淺  
注相逢南陌東城有情只是無情說與新來憔悴鶯  
兒不解丁寧

八憶鎮陽

悲歌聚散世事天誰管  
梳去梳來雙鬢短  
鏡裏看看雪滿  
燕南十月霜寒  
孤身去住都難  
何日西窗燈火  
眼前兒女團圓

九

丹書碧字細說金華事  
試問誰邊堪舉似  
除却青蓮居士  
胎仙八表冷風爭教  
低首樊籠夢裏雲  
裴煙駕倚天壇影  
西東

十 嘲兒子日

嬌鶯姪姪解說三生話  
試看青衫騎竹馬  
若箇張萱許畫  
西家撞透煙樓東家  
談笑封侯莫道元  
郎小小明

年部曲黃牛

十一

贈句龍英孺家中女子阿金張仲繼二女名蘭楚

瓊枝瑤草來自三山島莫道生男堪慰老掌上金兒更好  
胭脂杏蕾生紅繡襦學弄春風好共蘭蘭楚楚畫  
教乞巧圖中

十二

光甫副使壽席鵝雛指渠兒子阿咬

春風傾倒京雒春迴早走馬章臺人未老金翠鵝雛更  
好安排美景良辰放教花柳攬新誰似君家池館又  
添丹桂靈椿

十三

己亥春濟源奉先觀賦杏花

小橋流水一逕脩篁裏走馬章臺人老矣只愛明窗淨  
几杏花白白紅紅花時日日狂風不是碧壺香供真  
成惱破春工

### 浪淘沙

詩句入冥搜欲寫還休人間情是阿誰留千丈游絲不  
落地風外悠悠煙雨晚山稠人倚西樓衡陽歸雁滿  
沙頭一種江城寒夜客一種春愁

### 二

雲外鳳皇簫天上星橋相思竟斷欲誰招瘦煞三山亭  
畔柳不似宮腰長日篆煙消睡過花朝紅薔薇架碧



芭蕉雌蝶雄蜂天不管各自無聊

三

春瘦怯春衣春思低迷雨聲偏與睡相宜懊惱離愁尋  
殢酒已被愁知 煙樹望中低水遶山圍丁寧雙燕語  
心期昨夜狂風花在否明日郎歸

四

金翠畫屏山萬髻千鬟桃源樓閣五雲間恨煞芙蓉城  
下客不借青鸞 風雨杏花殘芳意都闌一燈孤影小  
窗閑繡被薰來香欲盡只是春寒

五 為烟中樹作

楊柳日三眠桃李爭妍千金誰許占芳年買得閑愁無  
著處却恨春偏流水武陵源夢引愁牽東風歸興燕  
翩翩試問西窗前夜月幾度嬋娟

西江月

懸玉微風度曲薰爐熟水留香相思夜夜鬱金堂兩點  
春山枕上楊柳宜春別院杏花宋玉隣牆天涯春色  
斷人腸更是高城晚望

古烏夜啼

玉簪

花中閑遠風流一枝秋只枉十分清瘦不禁愁人欲  
去花無語更遲留記得玉人遺下玉搔頭

人月圓

元都觀裏桃千樹  
花落水空流  
憑君莫問清涇濁  
渭去馬來牛  
謝公扶病羊曇拂涕一醉都休  
古今幾度生  
存華屋零落山丘

二卜居外家東園

重岡已隔紅塵斷  
村落更年豐  
移居要就窗中遠  
岫舍後長松  
十年種木一年種  
穀都付兒童老夫  
唯有醒來明月醉後清風

沁園春除夕二首

腐朽神奇夢幻吞  
侵朝昏變遷悵殘燈  
舊歲鷄聲競早

春風歸興鴈影相先南渡崩奔東屯留滯世事悠悠白  
髮邊虛名誤遍人間浪走恰到求田 青紅花柳爭妍  
意醉眼天公也放顛更雲雷怒捲頰波一注冰霜冷看  
老檣千年園令家居陶潛官罷無酒令人意缺然教去  
付青山枕上明月尊前

二

再見新正去歲逐貧今年送窮算公田二頃誰如元亮  
吳牛十角未比龜蒙面目堪憎語言無味五鬼行來此  
病同藿鹽裏似揚雄寂寞韓愈龍鍾 何人炮鳳烹龍  
且莫笑先生飯甑空便來朝看鏡都無勲業拈將詩筆

猶有神通花柳橫陳江山呈露盡入經營慘澹中閑身  
在香薄批明月細切清風

太常引

五雲樓觀日華東天上建章宮入海混魚龍比自古中  
原更雄紫垣星月禁階燈火朝馬開晨鐘一夢轉頭  
空恍猶在邯鄲道中

二

渚蓮寂寞倚秋煙幽思入哀絃高樹記離筵似昨日郵  
亭道邊白頭青髻舊游新夢相對兩淒然騎馬弄金  
鞭也曾是長安少年

三

官街楊柳絮飛忙  
鞍馬送年芳  
詩興更教狂  
笑能醉花  
前幾場  
滿城桃李一枝香  
雪不屬富家郎  
風雨沒商量  
快來與梨花洗妝

四

東原上清宮同楊飛卿夜話汝梁舊遊追懷欽叔內翰

十年流水共行雲  
相見重情親  
滄海坐揚塵  
便疑是前身  
身後身  
風臺月榭舞裙歌扇樂事幾回新  
莫話洛陽春  
更誰似金鑾故人

五

寄酒泉帥張奧子明子明鄆陽闕去酒泉百里而遠故云

田園松菊自由身  
鞍馬老紅塵  
鵝鴨惱比隣  
莫羨凌

煙寫真 花時風雨長年哀樂白髮爲誰新休唱渭城  
春怕憶著西州故人

六

水光林影入憑闌花柳占春寬三月錦成團爲洗盡山  
陰暮寒 玉峰詩老爲君吟嘯不醉有餘歡人物後來  
看口畫作臨流幼安

七

東園歌管日相娛佳釀出兵厨陶寫在桑榆便鶴到揚  
州未如 歌紅濃露綠陰清吹長下口樓居高枕即吾  
廬更何待將軍報書

水龍吟

少年射虎名豪等閑赤羽千夫膳金鈴錦領平原千騎  
星流電轉路斷飛潛霧隨騰沸長圍高掩看川空谷靜  
旌旗動色得意似平生戰城月迢迢鼓角夜如何軍  
中高宴江淮草木中原狐兔先聲自遠蓋世韓彭可能  
只辦尋常鷹犬問元戎早晚鳴鞭徑去解天山箭

二中秋

舊家八月池臺露華涼冷金波漲寧王玉笛霓裳仙譜  
涼州新釀一枕開元夢恍猶記華清天上對昆明火冷  
蓬萊水淺新亭淚空相向爛熳東原此夕夜如何高



秋空曠一盃徑醉憑君莫問今來古往萬里孤光五湖高  
興百年清賞倩何人喚取飛瓊佐酒作穿雲唱

三 中秋

素丸何處飛來照人只是承平舊兵塵萬里家書三月  
無言搔首幾許光陰幾回歡聚長教分手□婆娑桂樹多  
應笑我憔悴似金城柳不愛竹西歌吹愛空山玉壺清  
晝尋常夢裡膏車盤谷拏舟方口不負人生古來唯有  
中秋重九願年年此夕團圓兒女醉山中酒

四 同德秀游盤谷

接雲千丈層崖古來此地風煙好青山得意十分濃秀

都將傾倒可恨孤峰幾回空見松筠枯槁自都門送別  
膏車秣馬誰更問一作盤中道我愛陂塘南畔小川  
平橫岡迴抱野麋山鹿平生心在長林豐草婢織奴耕  
歲時供我酒船茶竈把人間萬事從頭放下只山間老

五

百年同是行人醉鄉獨有歸休地此心安處良辰美景  
般般稱遂力士鐺頭舒州杓畔不妨遊戲筭為狂為隱  
非狂非隱人誰解先生意莫笑糊塗老眼幾回看紅  
輪西墜一杯到手人間萬事俱然少味范蠡張良儘他  
驚怪陳搏貪睡且陶陶兀兀今朝醉了更明朝醉

六東園醉後

兩年金鳳城邊等閑又見東風菜侯門慣客東園高宴  
青雲飛蓋水上幽亭恍然真似蘭舟同載望紅樓翠壁  
青田白鷺誰信是山陰塞 鬱鬱林梢紫動便安排春  
來天外醉魂搖蕩尊前何恨狂香浩態高枕吾廬倒衣  
命駕心期長在為使君料理潘郎老髩儘花枝戴

七

漢家金粟堆空玉花驚見天池種并州畫角迴腸淒斷  
清霜曉弄世事浮雲白衣蒼狗知誰搏控恨北平老守  
南山夜獵風雨暗貂裘重 總道煙霄失路意平生依

然飛動高城置酒汾流澹澹無言目送寶劔千金儘堪  
傾倒玻璃春甕問波神贖借橫江組練挽青絲夢

眼兒媚

阿儀醜筆學雷家遶口墨糊塗

音茶

今解道疎籬凍隼

遠樹昏鴉乃公行坐文書裏面皺髻生華兒郎又待  
吟詩寫字是甚生涯

木蘭花慢

孟津官舍寄欽若欽用昆弟并長安故人

流年春夢過記書劔入西州對得意江山十千沽酒著  
處歡游興亡事天也老儘消沉不盡古今愁落日霸陵  
原上野煙凝碧池頭風聲習氣想風流終擬覓菟裘

待射虎南山短衣匹馬騰踏清秋黃塵道何時了料故人應也怪遲留只問寒沙過雁幾番王粲登樓

二

擁都門冠蓋瑤圃秀轉春暉悵華屋生存山邱零落事  
往人非追維舊家誰在但千年遼鶴去還歸繫馬鳳凰  
樓柱倚弓玉女窗扉江頭花落亂鶯飛南望裏依依  
渺天際歸舟雲間汀樹水遶山圍相期更當何處算古  
來相接眼中稀寄與蘭成新賦也應為我霑衣

三

賦招魂九辨一尊酒與誰同對零落棲遲興亡離合此

意何窮匆匆百年世事意功名多在黑頭公喬木蕭蕭  
故國孤鴻淡淡長空 門前花柳又春風醉眼眩青紅  
問造物何心村簫社鼓奔走兒童天東故人好在莫生  
平豪氣減元龍夢到琅邪臺上依然湖海沉雄

四

對西山搖落又匹馬過并州恨秋雁年年長空澹澹事  
往情留白頭幾回南北竟何人談笑得封侯愁裏狂歌  
濁酒夢中錦帶吳鉤 嚴城笳鼓動高秋萬竈擁貔貅  
覺全晉山河風聲習氣未減風流風流故家人物慨中  
宵拊枕憶同遊不用聞鷄起舞且須乘月登樓

五遊三臺二首

擁岩岩雙闕龍虎氣鬱崢嶸想暮雨珠簾秋香桂樹指  
顧臺城為誰□□西望但哀絃淒斷似平生只道江山  
如畫爭教天地無情風雲奔走十年兵慘澹入經營  
問對酒當歌曹侯墓上何用虛名青青故都喬木限西  
陵遺恨幾時平安得叅軍健筆為君重賦蕪城

六

渺漳流東下流不盡古今情記海上三山雲間雙闕當  
日南城黃星幾年飛去澹春陰平野草青青水井猶慙  
石甃露盤已失金莖風流千古短歌行慷慨缺壺聲

想醺酒臨江賦詩鞍馬詞氣縱橫飄零舊家王粲似南  
飛烏鵲月三更笑煞西園賦客壯懷無復平生

七送親家丈問夢綱

又東門送客側身西望一長嗟笑萬里功名幾番風雨  
何限雲沙相看已過半百甚年年各在一天涯秋氣偏  
催過鴈踈煙細點歸鴉旌旗未卷髻先華清淚落悲  
如問蜀道登天錦城雖好得似還家關心老來婚嫁要  
與隣屋共烟霞到口征西車馬輸他杜曲桑麻

八送取新歸隱山陽兼簡玉川同社

淡西園暮景對別酒惜臨分愛襍被中臺挂冠神武誰



得如君紛紛道途鞍馬甚當時王粲也從軍處處驚烏  
夜月年年落雁橫汾 菟裘老計在耕耘風被出塵氛  
記沁北丹東松枯石潤菊秀蘭薰林泉竟輸先手漫回  
頭慙愧玉山雲寄謝鷄豚社客草堂未要移文

九 贈吹簫簫者張觚兒暨乃婦田氏台曲賦此

要新聲淘寫奈聲外有聲何愴銀字安清珠繩瑩滑怨  
感相和風流故家人物記諸郎吹管念奴歌落日邯鄲  
老樹秋風太液蒼波 十年燕市重經過鞍馬宴鳴珂  
趁飢鳳微吟嬌鶯巧轉紅卷鈿螺纏頭斷腸詩句似隣  
舟一聽惜蹉跎休唱貞元舊曲向來朝士無多

遺山先生新樂府卷第四

遺山先生新樂府卷第五

臨江仙 留別郝和之

昨日故人留我醉，今朝送客西歸。古來相接眼中稀。  
青衿同舍樂，白首故山違。九萬里風安稅駕，雲鵬悔不  
卑飛。回頭四十七年，非何因松竹底茅屋，老相依。

鷓鴣天 宿趙州

宿酒消來睡思輕，夢中身世可憐生。  
綠衿紅燭櫻桃宴，畫角黃雲細柳營。  
秋歷口，月朧明，步檐倚杖候晨星。  
無窮宇宙無窮事，一笑山城打六更。

二

彈袖垂肩士女圖  
豔歌還似轉鶯雛  
一春楊柳吹綿後  
五月榴花照眼初  
明畫燭倒金壺  
使君曉夙宴西湖  
老來忘來行雲夢  
猶要春風醉後扶

阮郎歸

崢嶸秋氣動

一作靜

千崖川平晚照回  
小橋流水送吟鞋

無人覺往來

歌亂石坐蒼苔  
一杯復一盃

一作哦詩不置才

田家次第有新醅  
黃花細細開

蝶戀花

秋燈連夜寒生暈  
書研朝來龍尾潤  
朧朧窗影暗移時  
槭槭檐聲還一陣  
黃花白酒登高近  
意外陰晴誰處

問青山只管戀行雲忙煞晚風吹不盡

二

流光不受長繩繫樂事且須論早計丹成鷄犬亦登仙  
運去英雄空掩涕花迎酒笑寧無意酒藉花香尤有  
味由來夷跣不多爭喚向花間同一醉

三

秋風茅屋浮雲巘汗漫招來嵇與阮儘從鶴背更腰金  
獨恨騎曹餘手板酒中最好藏疎嬾深註紅螺容細  
卷世間只口沒閒人舉步有閒渠自遠

四

人間髣髴隨秋換，天上月明秋又半月邊。仍有女乘鸞  
萬古與誰期？汗漫天翁若被閒人管，月好却嫌秋夜  
短。如何能得夜年長，月也長如今夜滿。

五

驚沙獵獵風成陣，白雁一聲霜有信。琵琶腸斷塞門秋，  
却望紫臺知遠近。深宮桃李無人問，舊愛玉顏今自  
恨。明妃留在兩眉愁，萬古春山顰不盡。

六

惜花長被花枝惱，一夜落紅紛不埽。綠雲為幄繡為裯，  
不惜春衫還藉草。尊前莫恨春歸早，來歲花開應更

好丁寧雙燕促春還向道惜花人未老

七

楚娘最瘦腰圍小會看新聲歌水調已看天上駐行雲  
更向花間留晚照傾城不博嫣然笑剝破千金猶恨  
少少年恰是惜春時第一莫教容易了

江城子

繡香奩曲

吐興絨縷濕胭脂淡紅滋豔金絲畫出春風人面小桃  
枝看做香奩元未盡揮一首斷腸詩仙家說有瑞雲  
芝瑞雲芝似瓊兒向道相思無路莫相思在秀合歡花  
樣子何日是合歡時

鷓鴣天

著意尋春苦未遲，無情風雨妬芳期。  
青樓天遠無書到，繡被寒多祇夢知。  
雲淡泞，月低迷，洛陽山色見愁眉。  
何時重解香羅帶，細看春風玉一圍。

二

淡淡青燈細細香，四更人語在幽窗。  
西風數點迎秋雨，六尺湘紋滿意涼。  
秦樹遠，楚山長，綠嬌紅小負年芳。  
鴛鴦莫道口離恨，鎖到金籠恰似雙。

定風波

小口香來醉夢中，夢回幽賞惜匆匆。  
只道南枝開未半，



誰喚等閒都逐曉雲空  
蕭灑小溪新雪後唯有蕭蕭  
霜葉卧殘紅幾欲問花應有恨休門爭教不肯嫁春風  
清平樂

村墟蕭灑似是朱陳畫神武衣冠須早挂可待兒婚女  
嫁山深水木清華漁樵好箇生涯夢想平橋南畔竹  
籬茅舍人家

浣溪沙

秋氣興寒酒易消秋懷無酒更無聊夕陽人影卧平橋  
菊就雨前都爛熳柳從霜罷便蕭條夜來風色似今  
朝

二

一片青天舉棹過小舟無地受風波  
漁歌渾是太平歌  
鄉社年豐尋酒易陂塘春暖得魚多  
百年閒過又如何

三

夢裏還驚歲月道戰魚風退不勝秋  
人生雖異水同流  
酒力有神工駐景丹房無藥可燒愁  
陶陶兀兀老時休

四

一片煙蓑一葉舟  
夢中身世是滄洲  
戰魚風退不勝秋

秋月春花行處有蒼苔濁酒醉時休人生雖異水同流

五

爲愛劉翁駐玉華暗將心事許煙霞石田茅屋老生涯  
鐵笛不須從二草頭巾長擬挂三花他年人說漫郎家

虞美人

花心苦被春搖蕩粉豔嬌相向隔簾微雨送幽香未羨  
寒梅踈影月昏黃芳溫一念何時忘笑了還惆悵無  
端開近宋東牆眞箇曉人情思斷人腸

鷓鴣天

八月蘆溝風露清短衣孤劒此飄零蒼龍雙闕平生恨  
只有西山滿意青塵擾擾雁冥冥因君南望湧金亭  
還家剝買宜城酒醉盡梅花不要醒

二

飲量平常發興偏留連光景惜歡緣悲歌慷慨人爭和  
醉墨淋漓自笑顛麟閣畫祖生鞭拍浮多負酒家船  
老來事事消磨盡只有尊前似少年

三

身外虛名一羽輕封侯何必勝躬耕田園活計渾閒在

詩酒風流屬老成 三會水半山亭村村花柳自升平  
錦城未比還家好何處而今有錦城

南鄉子

衰思怯登樓百感中來不自由天意時情誰解得悠悠  
一片黃雲盡角秋 汾水遶城流流盡朱顏到白頭萬  
事且休論一醉都休前日黃花蝶也愁

朝中措

春閨寂寂掩蒼苔風雨卷春迴擬寫碧雲心事筆頭無  
句安排 燈昏酒冷愁牽夢引直似秋懷料得醺醺知  
我枕邊時有香來

點絳脣

連夜春寒夜來好夢孤衾暖寺樓鍾斷却恨更籌短  
一點閒情苦被離愁管西城晚雁飛天遠草色歸心滿

浪淘沙

劉公子家園秋日海棠

何處挽春還華屋金槃一枝紅雪入驚看總爲西園風  
露早特地高閒寂寞曲闌干高髻雲鬟綠羅衫子瘦  
來寬好箇沈香亭畔月只枉秋寒

朝中措

與石子璋別求作樂府得麻字

驚絃裂石筆生華清興入悲茄為愛南山夜獵笑人杜  
曲桑麻高歌醉眼千金駿馬八月仙槎都把平生湖

海看君咫尺龍沙

點絳脣

紅袖憑闌盡圖會見崔徽半吹簫誰伴白地肝腸斷  
未了塵緣可道歡緣短雲山亂武陵溪岸幾誤鶯聲喚

二

把酒留春醉扶紅袖花前倒落花風埽紅雨深芳草  
又恨春遲又恨春歸早花應笑惜春人老枉被春風惱  
秋色橫空

玉蕊輕明洗妝偏費春風手韻香襟袖別是閨房秀  
錦瑟華年醉口東園酒西歸後舊家花柳誰得何郎瘦

鷓鴣天

中秋雨夕同欽叔飲樂府宋宜家

著意朝雲復暮雲良宵留在宋東隣  
元霜玉杵期無定高燭明妝賞更新  
團扇曲盡梁塵萬家秋氣一家春  
月光不照金尊裡只為妖嬈醉得人

江城子

梅梅柳柳開新晴趁清明鳳山行盡出靈泉  
三月晉蘭亭細馬金鞍紅袖客能從我出重城  
賞心樂事古難并玉雙瓶為冠傾一曲清歌休作斷腸聲  
頭上花枝如解語應笑我未忘情

臨江仙



清曉千門開壽宴綺羅香繞芳叢紅嬌綠軟媚光風繡  
屏金翡翠錦帳玉芙蓉珠履爭持添歲酒葡萄酒飲  
金鍾人生福壽古難逢好將家慶事□□□□□

二

楊柳池塘桃李徑華堂壽宴初開團春翠幙舞風迴東  
山攜妓女北海整尊壘玉笋輕敲紅象板金荷漱澀  
傳杯笙歌繚繞宴春臺華山閒日月□野醉蓬萊

青玉案

熙春堂下花無數紅紫映桃溪路蝶往蜂來知幾許翠  
筠亭外綠楊隄畔時聽嬌鶯語綺筵羅列開尊俎總

是神仙侶競舉笙歌馳玉醕介公眉壽年年此日長與  
花為主

南鄉子

遲日惠風柔桃李成蹊綠漸稠把酒尊前逢盛旦凝眸  
十里松湖瑞氣浮功業古難侔宜在凌煙更上頭彩  
色眉間浮喜氣風流千歲三公萬戶侯

玉樓春

謫仙暫下金鑾殿歡宴瑤池春未晚飛瓊獻舞錦靴寒  
弄玉吹簫銀字暖壽觴阿母年年勸猶道碧桃香尚  
淺花開更待幾東風應見華年千歲換

減字木蘭花

瑞雲仙霧拂曉重重遮繡戶一炷清香千尺流霞入壽  
觴家門轉好從此自應長不老來歲春風看□西□  
□令公

朝中措

香輕紅淺露梅腮江上早春來玉佩聲朝丹闕霓旌影  
下瑤階朱門向曉三千珠履十二金釵碧海金鸞來  
報蟠桃一夜花開

西江月

骨相匿犀秀發精神聳鶴孤高少年事業富伊邠便向

中書書考 肘後不傳丹訣眉間新長脩毛一壺春色  
宴蟠桃作介歸榮忠孝

聲聲慢

香浮椒柏暖入酴酥瑞氣曉生簾幙絳闕真人來自五  
雲樓閣青霄路岐遊遍挂冠歸水晶樓閣蕭散處有壺  
中日月放龜鶴好是朱顏難口嬉遊處不減少年行  
樂正好尋春莫負燕期鶯約沉沉洞天向晚按宮商重  
調音樂願歲歲聽新聲笙歌院落

滿庭芳

臘雪溶酥春冰浮玉素蟾三五纔過曉來庭戶何事五

雲多盡道九天麟  
麟墜鏘環佩聲  
裊鳴珂風標爽  
胷中  
崑礪豪氣挽天河  
平生橫槩志  
指揮□□□□干戈  
他年功業翠玉應磨  
福海壽山難老  
金尊滿鯨吸滄波  
歌聲溢玉山扶起  
拚取醉顏酡

### 朝中措

簾旌烘日繡波翻  
霜曉試輕寒  
高宴黃堂初啟  
雲外列仙班  
晝明麗錦香浮  
寶鴨身在蓬山  
三見揚塵滄海  
春風一笑人間

### 千秋歲

玳筵晨啟  
家慶堪圖繪  
新楊弄暖  
簾櫳邃  
捧觴羅袖窄

疊板歌喉脆香雲裏輕裘小帽仙翁喜  
簪玉親賓至  
服彩兒孫戲開口笑扶頭醉口口金穴富口口貂蟬貴  
只恁地團圞共樂千秋歲

念奴嬌

嚴陵臺畔枕清江仙府重金碧玉軸牙籤三萬卷環列  
人間東壁名世高風口遵遺訓繼踵皆豪逸聯翩簪組  
滿門輝映金壁談笑穩步青霄扶搖九萬里垂天橫  
翼大纛高牙三授鉞凜凜威行南國月滿三山春回八  
部宴寢凝香席祈公難老鳳池長醉春色

驀山溪

夏景  
集曲名

梁州夏早南浦荷花媚人月欲圓時賀聖朝生申名世  
桂枝香滿早奪錦標迴春光好少年遊爛醉蓬萊裏  
謁金門貴小鎮西南地品令貫三臺口雄望江南北  
歸朝歡樂好事近佳辰風流子玉團兒為唱千秋歲

一井金

綠陰清晝雨茸梅子黃時候華堂金獸香潤爐煙透舞  
燕迴輕袖歌鳳翻新奏院靜人稀永日遲遲花漏一  
杯為壽笑捧處自傳纖手釵頭花有瑞草宜男不願金  
盈甃不願珠盈斗惟願薰風歲歲人長久

浣溪沙

脩竹移陰未出墻好風斜綽露荷香壺中六月也清涼  
不放靈椿仙客口要看丹桂滿林芳天教光景為人  
長

瑞鶴仙

薰風絃上奏正蛙鳴池沼鷺吟槐柳龍涎噴金獸一番  
疎雨梅黃時候神仙舊友愛五亭山明水秀向口時慶  
旦高明富貴始由天授知否風流儒雅利達叢中似  
公稀有芝蘭挺秀看早晚定成就況雪兒佳麗歌清舞  
妙管取天長地久願年年預借菖蒲勸君壽酒

千秋歲



雙紋綵袖□舞霓裳後□□香霧暖瓊甃綠鬟蟬影動  
小褶湘裙皺歌聲斷彤雲盡日□晴晝 冰絲輕雪藕  
細酌鵝兒酒任醉擁佳人手綵衣行樂事莫惜盃如斗  
千萬壽願如明月天邊久

瑞鶴仙

薰風院宇藹清香凝戶曉涼如雨開簾望蓮渚擁輕紅  
嫩綠三千宮女□商泛羽命雙成嬋娟妙舞記當時初  
下瑤池閨苑翠輶來處 幾許玉簪珠履玳筵綺席壽  
觴初舉從容笑語吹簫伴驂鸞女弄靈樁難老蟠桃頻  
見□□蓬瀛便住省家庭葉葉金貂鳳池穩步

喜遷鶯

清和時序望桂影漸生薰風微度拂金枝傳芳玉葉天  
下瑞麟重覩競勅謝庭蘭振振西廡鸞慶門裡把丹枝  
爭折青雲平步聲譽喧盛世詠少□□□□□□□  
□□□□□□□□□□□□今稱美願與岡陵同固  
更著取繼沂公勲業東平第土

西江月

物外神仙風骨人間富貴功名眉長新有秀毫生蕩座  
酒光花影清暑玉壺晝永少年金印身輕他年旌節  
看歸榮笑傲五湖煙景

浣溪沙

借得陪京尺五天  
碧油旆裏地行仙  
政成多暇且同歡  
梅雨口江銷繡潤  
薰風高閣水晶寒  
長鯨飲罷玉壺乾

二

瓊壓為漿玉作卮  
使君真是吏民師  
碧桃仙酌飲鄉期  
五馬旌口浮喜色  
南溪風月要新詩  
緩趨口口及瑤池

黃鸝遶碧樹

秋景

鴛瓦霜輕翠簾風  
細高門瑞氣口口  
積慶源深有長庚

應夢喬岳生賢妙齡秀發謝廷蘭玉爭妍名動縉紳况  
文章政術俱是家傳 別有神功厚德向東州治獄平  
反玉函高第仙風道骨錫與長年最好素秋節有時畫  
尚高啟賓筵何妨縱樂笙歌口觥船

滿庭芳

丹染吳楓青環越岫鏡天霽色凝鮮畫堂環佩瑞鶻擁  
神仙天遣澄清海宇親曾受黃石奇編興王略智名俱  
美功業妙難言 翩口迥立香飄袞服繡色映貂蟬有  
清詩千首美酒如川長與嫦娥共約放飛輪今夕先圓  
中秋月從今屈指更借一千年

念奴嬌

一年好處是西風繡出東籬寒菊蝶舞口狂誰便道今  
夕清香不足令尹風流年年春事小雨一犁新綠園扉  
人靜抱琴時弄幽獨聞道野老相呼幽尋仙洞乞與  
長生錄鶴髮童顏須待得王母蟠桃初熟只恐將相日  
邊催去鳳沼鳴環玉娉婷一笑為渠且盡醕醑

訴衷情

秋風吹綻北池蓮瑞雲樓閣鮮畫堂今日嘉會齊拜玉  
爐煙斟美酒祝芳筵捧觥船宜春耐夏福祿兼全富  
貴長年

望公門

玉壺清漏起微涼  
好秋光金杯潑豔酒  
酌瓊漿會仙鄉  
新曲調絲筦  
新聲更舞霓裳  
博山爐暖泛濃香  
為壽  
百千長

蝶戀花

紫菊初生朱槿墜  
日好風清漸有中秋意  
更漏乍長天  
似水銀屏展盡遙山翠  
繡幙卷波香引穗  
急管餘絃  
共慶人間瑞滿酌玉杯  
紫舞袂莊椿願祝  
千千歲

折丹桂

秋風秋露清秋節  
秋雨過秋香初發  
二仙生俱好秋天

氣節與秋霜爭烈 秋宵開宴群仙列  
秋娘唱秋雲低 過壽杯雙勸祝千秋鎮長時中秋皓月

永遇樂

龍閣光分鳳毛榮繼當世英妙山岳儲靈長庚應夢還  
慶佳辰到黃花浥露碧瓦凝霜香馥郡齋清曉憶當年  
青雲平步共喜驟躋華要 陰功厚德玉函金篆錫與  
世間難老注意方濃分符屢請雅志人口少棠陰口訟  
樂府新教正好醉山頻倒有誰似萊衣遊戲萱堂壽考  
少年遊

芙蓉花發去年枝雙燕欲歸飛蘭堂花軟金鑪香暖新

曲動簾帷 家人拜上千春壽深意口瓊枝綠髻朱顏  
仙風道骨長似少年時

洞仙歌

千崖滴翠正高秋時候橘綠橙黃又重九有蓬壺仙子  
赤鯉來游風雲會施展經綸妙手 去年稱壽處北斗  
天漿今夜天漿挹南斗聽笙歌雲裏奏月蕩瓊樓瑤臺  
上擁出姮娥酒待脚踏層雲倒天河盡傾向霞觴與君  
為壽

蝶戀花

最是一年秋好處橘綠橙黃半帶金莖露翠幙珠簾開



紫府五雲深處台星聚 昨夜玉皇傳詔語聞道君家  
勲業高前古賜與金丹并玉醕壺中日月留長住

朝中措

金風飄拂瑩蟾光依約桂華香紫府雲輶遊冶朱門錦  
繡高張 笙歌叢裏霞歛灩玉樹芬芳共祝壽齡何似  
今松柏長堅

虞美人

一杯薄酒休辭醉願一千二百歲白雲長伴此身閑桂  
月蘋風分取 壺天口鵲爐香口黃金尾庭院生秋意  
倒傾銀漢作流霞賸看蟠桃碧海記年華

玉樓春

煙爐不斷騰金獸，香霧入簾波影皺。秋堂錦席豔群仙，  
不惜醉羅舞袖口口絃。脆管春風手，嬌媚如花輕似柳。  
勸君須盡眼前歡，酌酒十分千百壽。

卜筮子

壽酒不論盃樂奏，呈歌舞先口中元。七日生風露涼如  
許，好待月嬋娟。好與姮娥語，分付諸郎桂一枝。更覓  
月中兔。

點絳脣

玉宇沉沉綠窗朱戶，還相口口碧池回遠。全似蓬萊島。

今夕笙歌兩兩雲鬟小  
爐煙裊壽觴傾倒長願朱顏好

瑞鶴仙

四山秋氣爽正雲淡銀河露零仙掌輕煙瑞屏障有文  
星一點口從天上襟懷倜儻笑談間光燄萬丈向玉皇  
案底秋毫紙屢承天獎口何況雲龍風虎萬乘故人  
兩朝著望油幢玉帳聽環佩丁東響看彈絃吹竹年年  
高會增壯中秋氣象有月中玉兔長生借公醉賞

鷓鴣天

壽菊纔開蒼四口秋光著意主人家清香未許人間識  
先占重陽口口口兒綬綠母金花斑衣庭下樂無涯

要知他日中書考細步沙隄隄上沙

滿庭芳

偃屈霜清稜層煙碧□□□古人間山光林色常伴住  
人閑元有仙風道骨無心趁玉筍朝班歸來賦不因五  
斗談笑挂衣冠 尤難誰不羨商山橘樂渭水漁竿引  
相君玉子助發幽歡共口壽觴多少南溟共北海波瀾  
君知否廟堂有意相與寒巖

蝶戀花

一霎秋風驚畫扇粉膩紅嬌尚折荷花面草際露垂虫  
響遍珠簾不捲留歸燕 埽掠亭臺開小宴四坐清歡

莫放金盃淺龜鶴延年口壽遠陽春一曲情何限

朝中措

年年金蕊豔西風人與菊花同霜鬢經霜重綠仙姿不  
飲長紅焚香度日儘從容笑語調兒童一歲口盃爲  
壽從今更數千鍾

南歌子

冬景

愛日烘晴晝輕寒護曉霜小春庭院繞天香仙佩珊珊  
來自五雲鄉庭下芝蘭秀壺中日月長要看鬢綠與  
瞳方一笑人間千歲飲淋浪

鷓鴣天

萬古寒光太白精直宜分作兩郎星不然安得難兄弟  
先後充糞三莢生 霜月冷斗杓橫老人今夜亦齊明  
他年莫作郎星看兩兩口躔拱太清

踏莎行

月挂瓊鉤日添繡綫綺窗翻浪重重捲風傳環佩曉珊  
珊畫堂羯鼓催開宴 翠縷香凝玉膏酒豔仙翁莫訴  
玻璃滿鳳啣丹詔下雲霓千秋長侍黃金殿

金菊對芙蓉

銀燭搖紅獸煙噴翠正小春時候爰日和融玉天當日  
生英傑天付與道骨仙風文章冠世詞傾峽水筆埽秋

虹 更有福壽無窮喜克家有子孫又英雄筭人間何  
物可以形容除非後夜團圓月年年共皎潔相同捧卮  
為壽殷勤口滿冷金鍾

滿江紅

寒日春溫照庭院瑞煙芬馥人盡道衡山當日謫仙新  
毓子含榮華孫口茂詩書萬卷生涯足但放懷壽酒十  
分斟添香祝 竹太瘦松偏獨鶴易怨龜何俗筭人間  
無物共供新曲但願長如天上月年年此夕光如玉伴  
長庚百歲永團圓蟠桃熟

南鄉子

梅雪弄芳馨綫日迎長缺日莫爭看琴堂稱賀處娉婷  
滿捧霞觴燦鯉庭鶴笑更龜齡八十仙翁醉復醒好  
倩洛陽馳譽手丹青畫與人間作壽星

水龍吟

玉梅含臘傳香瑞蕤秀英開三四蓮花沉滿熊羆占應  
洛陽名商歲比甘羅便踈同墜累甚觀志向脩文寓直  
仙樓侍宴梁王寶真難儷多少襟懷未試暫超然壺  
中游戲試看獻策歸瞻旒口太常勲紀歌遇巫雲舞回  
鄒莞金釵扶醉有陰功仙賜丹砂十紀壽祺金界

千秋歲



塞垣秋草又報平安好尊俎上英雄儀表金陽生氣象  
珠玉霏談笑春近了梅花得似人難老莫惜金尊倒  
鳳沼看看看到留不住江東小從容帷幄裏整頓乾坤了  
千百歲從今便是中書考

滿江紅

雪塢霜林下一夜報春消息看是處青回柳眼粉勻梅  
額和氣已迴傾斗闕壽星更喜明南極問四并節物奉  
誰歡遼東客熊夢旦非常日珠履開金釵密指雙溪  
千頃共斟瓊液不用殷勤千歲祝姓名已上神仙籍但  
時從王母借蟠桃躬親摘

滿庭芳

絳闕凌風瑤池玩月衆仙侍立清班就中仙伯乘興到  
人間灑落襟懷萬頃詞源壯三峽波瀾偏唯有清游自  
適不肯餌金丹清閑誰得似軒名佚老名利都闕但  
壺中時到方丈蓬山滿泛盃中玉液應知是生長堯年  
憑誰勸雲璈度曲醉口朱顏

鷓鴣天

內府清虛息萬緣逍遙真是地行仙從他玉帶金魚貴  
聽我綸巾羽扇偏傾美醞祝長年休辭澌澌十分圓  
來年此日稱觴處定有重孫戲膝前

二

鶴馭從來玉帝前  
笑談勲業照凌煙  
壽寫仙經千百載  
春在壺中別有天  
香似霧酒如泉  
華堂冰雪映群仙  
靈椿不老青松健  
花裏年年醉管絃

減字木蘭花

幕天席地瑞蠟香  
濃笙管沸白紵衣輕  
鶴髮童顏照座明  
輕簪小珥却是人間真  
富貴好倩丹青畫與人間  
作壽星

蝶戀花

急鼓初鐘催報曉  
樓上今朝捲起重簾  
早環佩珊珊香

裊裊塵埃不到蓬萊島 何用珠璣相映照韵美形清  
自有天然好莫向尊前辭醉倒松枝鶴骨偏宜老

玉樓春

風穿繡幕紅波皺月照寶簾花影透酒凝嫩臉醉紅桃  
喜入蛾眉舒翠柳 瓊英檀暈花裁就煙噴壽爐香滿  
袖金枝元是玉皇孫遐筭願同王母壽

訴衷情

海棠珠綴一重重清曉近簾櫳胭脂誰與勻淡偏向臉  
邊濃 看葉嫩惜花紅口窮如花似蝶歲歲年年占斷  
春風

滿庭芳

十里輕陰一川新綠不應春事來遲試探消息猶未減  
羅衣誰信閨房秀色倚風試桃李先枝呈纖巧吹香滴  
粉慢放鏡奩移芳時常在眼歌清舞軟煙縷霏霏向  
金徽促柱玉局彈碁儘待功成九轉蓬萊近未肯昇棲  
還應是梁鴻舉案同作百年期

驀山溪

群花爛熳春色濃如酒芳草綠鋪砌正酴醾牡丹時  
候佳辰協瑞來降玉宮仙口珠簾捲畫堂深香霧騰金  
獸朱顏不改常如舊金尊莫辭深拚通宵儘從銀漏

笙歌叢裏懽聲度年華看榮貴有兒孫永祝松椿壽

南鄉子

人日過三日元宵便五宵共言今日好生朝皓月光輝  
香動玉梅梢謝女工飛絮周郎待小喬年年燈下醉  
金蕉髻影影蒼球全縷細鵝毛

滿江紅

春前臘後高樓外梅飄香馥正雲輶初下瑤池西口曲  
羅幙笙歌圍粉黛階前青紫團蘭玉更如賓相待袞衣  
新罇浮醪柔懿範康寧福榮耀事都齊足向寶薰煙  
裏壽祺同祝非雪仙姿元不老丹臺已注長生錄更從

今歡宴幾年蟠桃熟

江城子

綠陰庭院燕鶯啼繡簾垂瑞烟霏一片笙簫風過彩雲  
低疑是蕊宮仙子降翻玉袖舞瑤姬冰姿玉骨自清  
奇看孫枝列班齊畫鼓笙歌喜映兩疎眉袖裏桃花口  
霧濕應不惜醉金卮

燭影搖紅

紅葉翻階曉風微扇回輕暖群仙高跨紫雲車來赴蓬  
萊宴繡幙圍香遮遠颺簾花時時影轉彩衣嬉戲王女  
回環綠嬌紅軟曼玉調絃喜音繚繞笙歌院蟠桃花

發正當春煙媚明霞臉休口飛瓊女伴捧瑤觴何妨屢  
勸百年偕老五福齊眉人間稀見

朝中措

年年重五近佳辰符艾一番親滿酌九霞香醞壽君兩  
鬢長春 閨中美秀如何賦得林下精神早辦布襖共  
為雲水閑人

好事近

梅潤乍晴天簾捲畫堂風月珠翠共迷香霧是長年時  
節 瑤池晝宴群仙鸞笙未吹徹王母醉中微笑看蟠  
桃初結



青玉案

蝦鬚簾上銅鉤小。玳瑁內輕寒繞。紅葉微香侵語笑。金釵珠履鳳簫。鼉鼓疑是蓬萊島。萱堂日日春生貌。嫩綠依然鬢邊好。賦口脩齡應不少。年年長見。畫堂口宴樓外青袍草。

天仙子

水曲橋平雙燕語。密密層陰圍繡幙。梅枝不受暑光侵。攜玉斧迎仙女。為問乘鸞何處所。杯酒流行無盡處。繞膝花口前後舞。笙歌移下蓬萊天。付與凌雲侶。京兆近來眉更嫵。

點絳脣

簾捲荷香綺羅人在薰風裏謝庭家世來作蜀月端  
象服魚軒占盡人間貴應難比蟠桃花底一醉三千歲  
鷓鴣天

裊裊香風響珮環廣寒仙子跨青鸞誰教瑞世儀周國  
口賦多才繼小山 鈴閣靜畫堂閑袞衣象服口團圓  
年年此日稱觴處留得萸蒲駐玉顏

又

五福仙娥月殿來依然微步彩雲堆一從別有瑤池宴  
不見蟠桃幾度開 歌宛轉舞徘徊碧梧秋意滿池臺

年年玉露收殘暑長送新涼入壽杯

蝶戀花

玉宇生涼秋恰半月到今宵分外清光滿  
兔魄呈祥  
冰彩爛廣寒宮裏逢華旦  
聰惠風流天與擅玉骨  
冰姿本是飛瓊伴且領綠衣持酒勸  
蟠桃待熟瑤池宴

感皇恩

濃露湛秋容涼生曉斗帳蔥蔥瑞烟裊  
裊佩霞符夢初誕  
雲妃娟妙冰姿和玉骨天然好  
菊韻蓮敷翠眉年少  
消得相如共偕老壽酒深斟惟願早封新號  
更期先插

上宜男草

玉樓春

紫薇朱槿繡開後  
枕簟微涼生玉漏  
玳筵初啟日穿簾  
檀板欲開香滿袖  
紅衫侍女頻斟酒  
龜鶴仙人來獻壽  
歡聲喜氣逐時新  
青鬢玉顏長似舊

念奴嬌

金神按節先下弦  
一夕分明秋色銀漢光浮天  
紺滑星彩遙瞻南極阿母分桃桂蛾饋藥稱慶于今夕  
解顏微笑捲簾初識姑射  
脩脩沆瀣橫空待高承仙掌精調液  
金鼎還丹光十丈  
一噉龜齡千億綠  
髮堂中綵衣庭

下瑞繞仙口宅機雲懽舞雅歌聲動瑤席

鷓鴣天

綵舞萱光喜氣新年年今日慶生辰碧凝香霧籠清曉  
紅入桃花媚小春 須醕酤莫逡巡九霞杯冷更口溫  
壺天自是人難老長擁笙歌醉洞雲

畫堂春

月娥來自廣寒宮步搖環珮丁東戲鸞雙舞駕天風雲  
滿虛空 一翦玉梅花小九霞瓊醴杯濃鳳簫千載莫  
忽忽且醉壺中

點絳脣

冰雪神人歲寒時節迎初誕照溪梅綻秀嶺孤松遠  
香霧氤氲不放重簾卷歌聲緩酒杯深畫堂此會年年  
見

願成雙

繡簾高捲沉烟細燕堂深玳筵初開階下芝蘭勸金卮  
有多少雍容和氣翠眉偕老應難比效鳳鸞鎮日于  
飛惟願一千二百歲永同歡如魚如水

柳梢青

玉嫩紅嬌花如月斜裊金翹楚女腰肢小喬風韻難比  
妖嬈當年約住藍橋便回首仙口路遙一曲清歌千

鍾美酒同慶生朝

遺山先生新樂府卷第五終

三上學所卷五

三七















